

Xujun xi tjit'a ni xi kits'in já postru

B'i ts'in kitsúyaha Jesu já ni'yakuyáha nga Espiritu Santo incha ts'ínkjáihin

¹ Ji nda xinkjián Teofilo, xujun xi tjun y'entúhu kixinyaha ngayjee ni xi kik'atuts'ihin nga kits'in ko tsakúya Jesu

² santa nkúhu nga ngjinji nk'a ján. Kintehe ni nga ngjuai, Espiritu Santo Ntíaná tsakúyakoho ra já postru xi j'ájin ni xi tjihin nga ts'ín.

³ Nga k'ien Jesu ko j'áya ngáha ra ngabayoo, nkjin niyá j'aikúchjihí yjoho já postruhu nga ja tjña tík'un. Yachán nistjin kamaha nga tsakúchjihí yjoho ko kinchjanijmíyakoho jóo Ntíaná ko nkú tjihin ra nga kui batéxuma.

⁴ Nk'ie nga tjñajin saha já postru, b'a kitsúhu nga najmi tu kuitju nanki Jerusalen. B'i kitsúhu:

—Chúyo santaha nga kuitjusun ni xi kitsúya títjun Na'mina. Kui niu xi kinchjanijmíyakohonuu.

⁵ Jua bi ntánjua tsaténtáha xuta tunga jun tu chuba nistjihín ndyjaha nga Espiritu Santo saténtákokhonuu.

⁶ As'ai já xi kama ñjakúko Jesu incha kingjásjaiyaha:

—Ji Nda Ntia, ¿a nd'ai k'uaihí xuta Israel nga kuatéxuma ngáha ra nanki xi ts'e?

⁷ As'ai b'i kitsú Jesu:

—Najmi jun tjihin nga choo mí chubaha ko mí nistjihin kuitjusun ni xi y'enda Ntia Na'miu nga kama.

⁸ Tunga n'ekjáihín ruu nga'yún nk'ie nga kj'uaíjinnuu Espiritu Santo. Kuixínyo ei Jerusalen, ngayjee ante Judea ko ante Samaria ko nga ngúsuhun asuntee ni xi kits'ian.

B'i ts'in ngji Jesu nk'a ján

⁹ Askahan nga ja b'a kitsú Jesu ko nga tijncha base ts'ihin ra já postruhu, as'ai ngjinji nk'a ján. Nku ninti y'é maha ko najmi ta kikiehe ra jóo.

¹⁰ Nk'ie nga tijncha basenjinki nk'a ján jóo nga tífi Jesu, tu johó já xi yja najyun taba j'ainchat'aha.

¹¹ B'i kitsúhu:

—Jun xi nibáhanu Galilea, ¿á b'a n'e tíchasejinkihinu nk'a ján? Xi nkú ts'in kuitjujinnuu Jesu nga kfi nk'a ján, b'ahá ta ts'in kj'uaí ngáha xi nkú ts'in kuayo nga kfi.

B'i ts'in kichj'ajin nda xi y'ejña antehē Juda Iscariote

¹² As'ai asunntu tjenki xi 'mi Yá Olivo incha nibaha já postru nga j'ai ngáha nanki Jerusalen. Kui tjenkiu xi tiña maha Jerusalen nkú ra ma tsa nku kilometru.

¹³ Nk'ie nga incha jas'en ajin nantio, incha ngjinji ni'ya xi jo tjíxjó xi incha tjíntuyá. Kui xu'bi já postru xi tjíntu yo: Pedro, Santiago, Jua, Andre, Felipe, Toma, Bartolome, Mateo, Santiago xi ntíhi Alfeo, Simon xi mako já xi mjehe kjaánko já Roma, ko Juda xi nts'e Santiago.

¹⁴ Nkuhú incha kits'in kjuankjintak'uhun nga tehente kinchjako Ntianá ngayjee já xu'bi ko

já nts'e Jesu, Mariá xi naaha maha ko kj'ai sa jminchjin.

¹⁵ Nku nistjin nk'ie nga kama ñjakú xuta xi s'ejihin Jesu, ma ra tsa unchan ko kan, as'ai Pedro tsasinñajin masehen ko b'i kitsúhu:

¹⁶ —Jun já nts'e, tjihin nga tsitjusun ni xi Espiritu Santo kits'in kinchjaha David. Kui niu xi tjit'a xujun éhen Ntjaná. Kinchjanijmíyaha Juda, nda xi ngjiko já xi j'aikj'ánijé Jesu.

¹⁷ Kui xi ta kama nku nda postru xi nkúhu jin ko ta kik'aihi xá xu'bi.

¹⁸ Tunga najmi ndahá kits'in. As'ai toon xi kama chjhi ra kjuá najmi ndaha ts'atseko ho nku xu'ba. As'ai nintaku tsijnehe, ixí kits'ohón nga tsijne ko tsitju ngayjee ts'ehe.

¹⁹ Kint'é ngayjee xuta xi tjintu Jerusalen ni xi kamoó. Xu'baha Jní 'mi ante xu'bo, én xi tsuhu ra Acedama nga éhen.

²⁰ At'aha b'i ts'in tjit'a xujun salmo:

Kas'e tiya ni'yaha ndo,
 najmi tu ch'a xi kat'ejñaya.
 Ko b'a ts'in ta tjit'a ya:
 Kj'ai xi kats'ínkjáihin xaha.

²¹ 'Kui nga ajihin já xi kitsjenko tehentehe ná nk'ie nga tjñajin saná Nda Ntjaná Jesu,

²² b'aha ra nk'ie nga tsaténtaha Jua ko santaha nistjin nga ngji nk'a ján, ajihin já xu'bi kachj'ajin nku xi kuitsuyakoní nga j'áiya ngaha ra Jesu ngabayoo.

²³ As'ai incha kits'ínkjó jo já, nku xi 'mi Kuse xi ta 'mi ya Barsaba, xi ta Justo chubaha, ko nku xi 'mi Matia.

24 As'ai b'i incha kitsú nga kinchjako Ntíaná:

—Ji Ntía, yai xi nkú ts'in tjíntuyá animaha ngayjee xuta. Takúchjini má xi kui já xi joi xi kichj'ajin

25 tu xi kamaha nku nda postru ko ts'ínkoni xá xi najmi kits'inndjuú Juda Iscariote. At'aha ngatitsun kits'in Juda ko ante xi tjehen ra ngji.

26 As'ai tsasehe jóo yá xi kama ts'e xoo. Tu Matiahá kikanéhe. Kui nga kik'ai xákohe ra já postru xi te nkuu.

2

B'i ts'in j'ai Espiritu Santo

1 Nk'ie nga tsichu nistjihin S'í Pentecoste, nkuhú ante kama ñjakú ngayjee xuta xi s'ejihin Jesu.

2 Tu janeyahá nk'a ján. B'a kama xi nkú ma nga 'yún kjenima ntjo. Kinu'yá kui ni ngayjee aya ni'yoó xi má nga kab'entu jóo.

3 As'ai kama chji asun nintaku jóo ni xi b'a k'un njai nd'í k'un nga kik'aihi.

4 Ngayjee kitsejihin ra Espiritu Santo ko kik'atuts'ihin nga kinchja kj'ai kj'ai én xi nkú ts'in kitsjáha Espiritu nga kuinchja.

5 Kui nistjiun tjíntu nanki Jerusalen xuta judio xi benkjún Ntíaná xi nibaha ngayje tákjá nanki xi tjin asuntee.

6 As'ai kama ñjakú xuta nk'ie nga kint'é ni xi janeyoo. Ndaha najmi incha be ni xi incha kuitsu, at'aha tu éhen ní incha kint'é nga nkúnkú.

7 Tu ni xí kama nkjúhun ra ko b'i ngján b'i kitsúhu xinkjín:

—¿A najmi xuta Galileahá ngayjee xi b'i ts'in tinchja?

8 ¿Nkú ts'in én xi mahaná nga nkúnkáá tínu'yáhaná nga tíincha nchjaha?

9 At'aha tjininná ej xuta Partia, xuta Media, xuta Elam, xuta xi nibáha ante Mesopotamia, xuta Judea, xuta Capadocia, xuta Ponto, xuta Asia,

10 xuta Frigia, xuta Panflia, xuta Egipto, xuta xi nibáha ante Libia xi tiña maha nanki Cirene, ko xuta Roma. Tjin xi ntje judio tjeheñ ra ko tjin xi najmi ntje judio tjeheñ ra tunga s'ejihín ra Ntíaná.

11 Tjin xuta Creta ko xuta Arabe. Ngaten-teé tínu'yáá nga énná tíincha tsuyaha xuta xu'bi kjuachánka xi ts'in Ntíaná.

12 Ngayjee xuta kama nkjúhun. Ndaha najmi be ni xi kuitsu. Kingjásjaiyaha xinkjin:

—¿Nkú tsuhu ra ni xu'bi?

13 As'ai k'ua xi tu tohón kamaha ko b'a kitsú:

—Ch'ihí jóo.

B'i ts'in y'énimíhi Pedro xuta nga kitsúya nkú tsuhu ra ni xi kamoq

14 As'ai tsasinjña ndju Pedro ko já postru xi te nkuu. 'Yún kinchja nga b'i kitsúhu xuta nkjiun:

—Jun xi ntje judio tjeheñnuu ko ngatentoo xi tintsuboo Jerusalem, katumankjinnuu ko tasinñju ni xi xinnuu.

15 Najmi ch'i jái xi nkú nga ts'in tín'enkjíntak'un, at'aha as'aihi chuba ñja yo.

16 Ni xi tíyo, kui ni xu'bi xi kitsúya títjun nda profeta Joel má nga b'i ts'in y'ét'a:

17 B'i títsu Ntíaná:

Kui ni xi kama ñistjin xi fekuu, tsjaha Espirituna ngayjee xuta.

Ntíx'innuu kō ntíchjuúnnuu ts'a k'ue'á énnā nga profeta kama.

Já xunkúnuu skuē ni xi k'uejñá chjihí,
kō jáchánuu kuint'é ni xi xihín nga nijñá ján.

¹⁸ Kui nistjin xu'bo tsjaha Espirituna já musuna kō
jminchjín musuna,
tu xi kuinchjaha ngajona.

¹⁹ Ts'ian kjuankjún nk'a ján,
kō kuakuchjá kjuachánkana t'anankiu.
S'e jní kō nd'í kō nintí tjin.

²⁰ Kama jyun ts'íu kō xi nkúhu jní kama sóo.
B'a kama kintehe ni nga kuichú nistjin xi y'énda
Ntjaná,
kui nistjiun xi chánka kō nkjún tjín.

²¹ N'ek'anke ngayjee xi k'uankihí Ntjaná nga
ts'íinnkihí.

²² Jun já Israel, tasinñju ni xi xinnuu. Ya si-
sion ni xi kits'in Jesu, nda xi nibáha Nazaret.
Kits'in kjuachánka kō kjuankjún kō ni xi tsakúchji
kjuachánkaha Ntjaná. Ntjaná kitsjáha nga b'a
kits'in tu xi y'éjña chjihinuu nga kui kits'in nibáha.

²³ Y'énda tíjün Ntjaná kō be nkúhu nga
tuts'ihín ni nga já kontra n'ekjas'eheñ Jesu. Jun
kichjubénijó kō kin'ek'ion. Já xi najmi ntje Israel
tjehen ra kin'e chjón nga kikjat'a kruu.

²⁴ Tunga Ntjanáhá kits'in ndaíhi ajihín
kju'uhun ngabayoo. Kits'ink'íejña tík'un
ngáha ra. Ndahachí najmi kamaha ngabayoo
kits'ink'íejña'yúhun.

²⁵ 'B'í ts'in yét'a xujun David nga
kinchjanijmíyaha Jesu:
Kikie tehente Ntjaná nginkán,

kixina sijnat'a tu xi najmi tsankjuhunna.

²⁶ Kui kjuaha nga tíma tsjoho ra animana, é n tsjo tsu títbitju tsu'ba, ko tjínkuhu k'an nga chúhun yjonintena.

²⁷ At'aha najmi n'e nga maní antehé xuta k'ien, najmi k'uainteí tsa kfentu nda xi naxu nginkuin.

²⁸ Tsakuchjíní niyá xi fi má nga k'úentu tik'un xuta, n'etsehení kjuatsjo nga kúatejña nginkuin.

²⁹ 'Jun já nts'e, xinya kixi kixinu nga ntje chána David k'ien ko kis'eyanji. Santaha nistjin nd'ai tijnajin saná tsjóho.

³⁰ Kui xi kama nku nda profeta ko kikié nga Ntjaná kitsúya kixi títjuhun nga ntje xi ts'e stjújín xi k'úejñasun antehé nga kuatexuma.

³¹ Kui nga kikié títjuhun David ni xi kama ko kitsúya nga kj'uaiya ngáha ra ngabayoo xi kits'in nibá Ntjaná, nga najmi s'ejña antehé xuta k'ien ko nga najmi kuatsún yjonintehé.

³² 'Jesu, kui xi Ntjaná kits'ínkj'áíya ngáha ra ngabayoo ko jin kiyai nga b'a kama.

³³ Kui xi tiyankjún nd'ai nga tijnat'a Ntjaná ko kits'ínkjáihín Espiritu Santo xi kitsúya títjuhun Na'miu nga tsjáha. Kui xi títs'in nibá ni xi tíyo ko tínu'yó nd'ai.

³⁴ At'aha najmi David xi ngjinji nk'a ján, tunga b'ahá kitsú:

Ntjaná b'a kitsúhu Nda Ntjana:

“Tinchint'aná má batexuma,

³⁵ k'uentú maná xi fi kontrahi kinte tsukui.”

³⁶ 'Kui nga tjihin nga skué kixihi ngatentee xuta Israel nga Jesu, xi jun kikjat'a kruu, kui xi Ntjaná kitsjá xáha nga tibatexuma nd'ai. Kui xi kits'in nibá Ntjaná.

37 Nk'ie nga kint'é jóo ni xu'bi, tu ni xí kik'ie nusin nusihín ra. As'ai b'i incha kitsúhu Pedro ko já postru xingiso:

—Jun já nts'e, ¿mí ni xi tjíhin nga n'ei?

38 B'i kitsú Pedro:

—Tankínchj'aha ruu animanuu. N'ekjóhooon Jesucristo ko saténtó nga nkúnkú tu xi kama ndy-jat'ahanuu ngatitsunnuu. B'a ts'in k'uaihínuu Espiritu Santo xi tsjánuu Ntíaná.

39 At'aha k'uainuu ko kuaihi ntínuu ni xi kitsúya títjun Ntíaná nga tsjáha xuta xi ts'e, ko ta k'uaihi xuta xi kjin tíntu, ngayjee xi Ntíaná kuinchjaha nga kama ts'e.

40 Kui én xu'bi ko kj'ai sa xi kitsú Pedro nga kinchja ko nga kitsjáníyaha xuta. B'i kitsúhu:

—Títjujihun kjua'un xi nibanehe xuta xi najmi naxu nginkun Ntíaná xi tjin nd'ai.

41 As'ai kikaténtá xuta xi kits'ínkjáihín én xi y'énijmí Pedro. Kui nístjiun jan mií xuta j'aijín saha xuta xi ja s'ejihín Jesu.

42 Tehente tsasínñjuhu xuto ni xi tsakúya já postru. Nkuhú incha kik'a xinkjín. Kama ñjakú nga kikjine niñu ko nga kinchjako Ntíaná.

B'i ts'in y'entu xuta xi tjun kis'ejihín Jesu

43 Kama nkjúhun ngayjee xuta, at'aha nkjin kjuankjún ko ni xi tsakúchji kjuachánkaha Ntíaná kits'in já postru.

44 Ngatentee xuta xi s'ejihín Jesu nkuhú kits'in yjoho ko kits'ínchjénko ngujin xinkjín ngayjee ni xi tjíhin.

⁴⁵ Tsatēña xu'bahā ko ni xi t̄j̄ih̄in ko kits'in̄ndzjoh̄o tooh̄on ngayjeē xutā xi nkú t̄j̄in machj̄eh̄en nga nkúnkú.

⁴⁶ Xkī n̄istjin kama ñjakú má ma n̄atsih̄in n̄inku. Ni'yahā tsakj̄anya n̄inkuan nga kikj̄ineko xinkj̄in, nga t̄j̄intuyá tsjo ts'ih̄in rā ko nga n̄imakjuā t̄j̄intuyá animahā.

⁴⁷ Incha ts'intsjoh̄o Nt̄ianá, ko ngayjeē xutā nant̄iō nda kikiehe. Xkī n̄istjin Nt̄ianá kits'in̄ nibájin sahā xutā n̄inku kj'aí sa xi t̄incha b'anki.

3

B'i ts'in kits'in̄nkih̄i Pedrō nku ndā xi najmi ma fi

¹ Nku n̄istjin Pedrō ko Jua incha ngji má ma n̄atsih̄in n̄inku nga chubā jan. Kui chub̄o xi t̄j̄ñahā xutā xi ntje judiō t̄jeh̄en rā nga nchjakō Nt̄ianá.

² Yo b'ejña nku ndā xi tū b'a ts'in̄ najmi mahá fi santa nkúhu nga kitsin. Xkī n̄istjin n'ek'íejña ndō ankjuā má ma n̄atsih̄in n̄inku xi 'mi Ankjuā Tsjo Tj̄in tū xi bankih̄i rā toon xutā xi fas'ehen n̄atsih̄in n̄inku.

³ Nk'ie nga kkie ndō nga t̄ifas'en Pedrō ko Jua n̄atsih̄in n̄inku, tsankih̄i toon.

⁴ As'ai Pedrō ko Jua incha tsasehē ndō ko b'a kitsú Pedrō:

—Chase'ani.

⁵ As'ai tsase ndō nga kikuyá nga k'uaih̄i toon.

⁶ Tunga b'ih̄i kitsú Pedrō:

—Najmi t̄jinna toontaba ko tā ndaha toonsine xi tsjaha tunga ni xi t̄j̄ñahána tsjaha. Ngajoh̄o Jesucristo, ndā xi nibáha Nazaret, an b'a t̄ixihin: T̄isintjein ko t̄itsutjai.

7 As'ai jak'á Pedro ntsja kixi ndo nga kik-jesintjen. Tjen'yún kisakú nga'yúhún ra sjai ndo.

8 Kikjennk'á ko kikjatsú'ba. Sjai jas'enkoho Pedro ko Jua má ma natsihin ninku. Tíkjennk'á ko títs'íntsjohó ts'ihin ra Ntíaná nga tsú'ba.

9 Ngayjee xuta kikiehe nga tsú'ba ndo ko nga títs'íntsjoho Ntíaná.

10 Tu ni xí kama nkjúhún ra ko kitsankjún ngat'aha ni xi kamat'ain ndo. At'aha incha kamankjihin nga kui ndo xi b'ejña ankjuá ninku xi 'mi Ankjuá Tsjo Tjín nga banki toon.

B'i ts'in y'énjimí Pedro má ma natsihin ninku

11 Nda xi kama nkihí najmi ta túbinkféhen Pedro ko Jua. As'ai ngayjee xuta kama nkjúhun nga kama ñjakú má 'mihí Kinte Ni'yaha Salomon, at'aha yo tíncha jóo.

12 Nk'ie nga kikie Pedro ni xu'bi, b'i kitsú:

—Jun já Israel, ¿á tíma nkjúhunnuu ni xu'bi? ¿Á tíchaseheni xi nkúhu tsa nga'yún ts'ajin ko tsa ngat'aha tsa jin subai 'yún yankjúin Ntíaná, tsa kui kjuaha nga kuan'ekjatsú'bahani ndai?

13 Ntíaha ntje cháná Abraham, Isaac ko Jacob kitsjáha kjuachánka Ntíhi. Kui xi Jesu xi jun kin'ekjas'on ko najmi kin'ekjóhon nginkun Pilato nk'ie nga Pilato mjehe ts'íin ndáhi.

14 Najmi kin'ekjóhon nda xi je nginkun Ntíaná, nda xi naxu nginkun Ntíaná. Tu sa ní tsinchu nga n'e ndáhi nku nda xi animá ts'ínk'ien.

15 Jun kin'ek'ion nda xi ts'ínk'íentu tík'un xuta, tunga Ntíanáhá kits'ínk'áíya ngáha ra ngabayoo. Jin kiyai ko tí'miyaihi nga b'a kama.

16 Ngat'aha nga s'ejinni Jesu, kui kjuaha nga Jesu kuats'inchjenni nga kuatsjá nga'yuhun ra ndai xi yo ko tíyo ei. Ngat'aha nga s'ejinni Jesu, kui kjuaha nga kamandaha ndai nginkun.

17 'Be nd'ai, já nts'e, nga najmi yo ni xi kin'o ko ta ndaha já tjíxánuu najmi be ni xi kits'in.

18 Tunga b'ahá ts'in kits'intjusuhun Ntíaná ni xi kitsúya títjun nk'ie nga kits'in kinchja ngayjee já profeta, nga tjihin nga un skuehe nda xi kits'in nibá.

19 Kui nga tankínchj'aha ruu anímanuu ko n'ek'óntjaiyo yjonuu tu xi n'endyjajnuhu ngatitsunuu. Tsa b'a n'oo, Ntíaná tsjánuu nístjin nga chjúntoo

20 ko ts'in nibásenuu nda xi y'énda títjun nga ts'in nibá. Kui xi Jesucristo.

21 Kui xi tjihin nga k'úejña nk'a ján nd'ai santaha nkúhu nga kuichú nístjin nga s'enda ngáha ngayjee ni xi tjin. Já profetaha Ntíaná kinchjaníjmíyaha niu nk'ie.

22 'Xi nkú kitsú Moise nk'ie: "Ntíaná xi Ntíanuu, kui xi kjésintjen nku nda profeta xi nkúhu an. Ajinnuu kuitjuhu. Tasinñju ngatentee ni xi kuitsunuu.

23 At'aha tu yáha ni xi najmi kuasínñjuhu nda profeta xu'bo kuich'onsje ajihin xuta Israel."

24 Samuel ko ngayjee já profeta xi kis'e askahan ta kinchjaníjmíyaha ni xi tíma nístjin nd'ai.

25 'Jun ts'ajun ni xi kinchja já profeta. Ngandanuu Ntíaná y'éndakoho ntje chánuu nk'ie nga b'a kitsúhu Abraham: "Ngayjee xuta naxinantá xi tjin asunntee nda kamat'ain ngat'aha ntje xi s'ehi."

26 Títjun jun Ntíaná kits'in nibásenuu Ntíhi nk'ie nga kits'ínkj'áíya ngáha ra ngabayoo. Nda

kits'ínk_on_u nga b'a kits'ín k_o t_u xi k'úéntuhunu ni ch'onk'un xi man_u.

4

B'i ts'ín kin'ekokjua Pedro ko Jua

¹ Pedro ko Jua t_{in}cha nchjako sa x_uta nantio nk'ie nga incha j'ai já na'mi_u k_o nda k'aku_h já xi kunntá n_{in}ku k_o já saduseo.

² Kui xi kama kjahan at'aha Pedro ko Jua t_{ib}akúyaha x_uta nantio k_o t_{ib}'énijmí nga kj'uaíya ngáha ra x_uta ngabayoo, at'aha j'áíya ngáha ra Jesu.

³ As'ai jakj'ánijé jóo k_o kits'ínkjas'en n_ubayá san-taha n_{is}tjin xi ma ndyju_un, at'aha ja ngixun kui ch_ubo.

⁴ X_uta xi kint'é ni xi kinchja Pedro ko Jua, nkjin maha xi kis'ejih_{in} Jesu. Un ra mi_i tsichu ma já xi kis'ejih_{in}.

⁵ N_{is}tjin xi ma ndyju_un kama ñjakú nanki Jerusalen já k'aku, jáchá xi ta t_{ij}h_{in} xá k_o já chjine'éhen k_uatéxumoo.

⁶ J'ai Ana xi t_{ij}h_{in} nda na'mi títjun, k_o Kaifa, Jua, Alejandro k_o ngatentee já xi y'aha ra já na'mi k'aku.

⁷ As'ai ngjichj'a Pedro ko Jua k_o kin'ekinchá ajih_{in} jóo. B'a kitsú jóo:

—¿Mí xáha xi t_{ij}nn_u? ¿Yá xi t_{ib}'éxán_u nga b'a t_{in}'o?

⁸ As'ai b'i kitsú Pedro nga kitsejih_{in} ra Espiritu Santo:

—Jun já t_{ij}xá k_o jáchá xi t_{ij}h_{in} xá,

⁹ t_{in}'ekokj_uan_i nd'ai ngat'aha k_uanda xi kin'ehe nku nda un k_o xi nkú ts'ín kama nk_{ih}.

10 Kui nga tjihin nga chahanu ngatentoo ko ngayjee xuta Israel nga ngat'aha nga yuhun Jesucristo, nda xi nibaha Nazaret, kama nkihí ra nda xi kabasinjña ej nginkun. Jun kingjat'a kruhuu Jesu tunga Ntjanáhá kits'ínkj'áíya ngáha ra ngabayoo.

11 Jesu, kui ndjio xi najmi kits'in mje já chjinexjóo tunga nd'ai ja j'ai ma ndjio k'aku.

12 Najmi tjin sa kj'ai xi maha ts'ínk'anki xuta. Ntjaná najmi kits'in niba sa kj'ai asuntej xi kama ts'ínk'ankiná.

13 As'ai kama nkjuhun já tjióo nk'ie nga kint'é nga b'a ts'in ndjá tinchja Pedro ko Jua ko incha kieke nga tu já tu k'un tu mahá niu xi najmi 'yún maha xujun. Incha kamankjihin nga kui jóo xi y'emako Jesu.

14 Tunga najmi behé mí nihi xi kjanínehe, at'aha tijncha be nga nda xi kama nkihí kabasinjñakoho jóo.

15 As'ai incha kitsjá kjuá nga kuitju jóo má tíma kjuo ko kinchjanijmíyakoho xinkjín niu.

16 B'i incha kitsú:

—¿Nkú n'eéhe jóo? Ngayjee xuta xi tjintu Jerusalen be kjuankjún xi kits'in jóo ko najmi ma b'e'máá.

17 Tunga tu xi najmi ta nguaindju saha éen ajihin xuta, kui nga tu sahá kuinchankjuhun raá tu xi najmi ta ch'a k'uénijmíhi Jesu.

18 As'ai kinchja ngáha ra jóo. Y'éch'oho nga najmi ta incha k'uénijmíhi ko tsa kuinchjanijmíyaha Jesu.

19 Tunga b'ihí kitsú Pedro ko Jua nga kinchjako já tjióo:

—N'enkjíntak'un má nihi xi b'a tjin nginkun Ntjaná. ¿A nga jun xi kuínú'yá'éihin a ra Ntjanáhá?

²⁰ At'aha jin tjihin nga kuixinyai ni xi kiyaj ko xi kinu'yai.

²¹ As'ai já tjióo tsinchankjuhun tunga kits'in ndaihi ra. Najmi kisakuhu mí nihi xi ts'innijéhe ra, at'aha ngayjee xuta kits'intsjoho Ntíaná ngat'aha ni xi kamo.

²² Ts'ati yachán nú tjin ko yaha ra nga uhun nda xi kamat'ain kjuankjún xu'bi nga kama nkih.

Já postru ko jániy'akúyá xingisoo b'i ts'in incha kinchjako Ntíaná

²³ Nk'ie nga ja kin'e ndai ngaha ra Pedro ko Jua, as'ai ngjisehe xuta xi ts'e ko kitsúyaha ngayjee ni xi kitsú já na'mi k'aku ko jáchá xi ta tjihin xa.

²⁴ Nk'ie nga kint'é xuta xingisoo éin, ngayjee nkuhú kits'in kjuankjintak'uhun nga incha kinchjako Ntíaná. B'i incha kitsú:

—Ji Ntiani, ji xi kin'endai nk'a ján ko asuntee, ntáchak'uun ko ngayjee ni xi tjihin.

²⁵ Ntje chani David xi nda musuhi kin'ekinchjakohoni Espiritu Santo. B'i tsixin:

¿Á xaáhan incha ts'ihin xuta xi tjihin asuntee?

¿Á ni xi najmi chumi ni chjhi ra tjincha ts'innkjin k'uhun?

²⁶ Y'énda yjoho já rei xi tjin asuntee ko kama ñjakú já tjióo.

Incha ngji kontraha Ntíaná ko nda xi kits'in nibá.

²⁷ At'aha kjuaxi nga nanki xu'bi nda rei Herode Antipa ko Poncio Pilato kama ñjakúko xuta xi ntje Israel tjeheñ ra ko xi najmi ntje Israel tjeheñ ra nga incha ngji kontraha Jesu xi Ntíhi, kui xi y'exái nga kin'e nibái. Kui xi je.

28 B'a ts'in kits'íntjusuhun jóo ngayjee ni xi ja y'enda títjuin ko xi tsixínyai nga tjíhin nga kama.

29 'Nd'ai ji Ntiani, chaseihí ni xi mjehe ts'ínni jóo. Tjeihin xuta xi ts'i nga ndjá k'uénjímí én xi ts'i.

30 Nga'yíhin katuma nkihí ra xuta un ko katumá kjuankjún ko ni xi kuakúchji kjuachánkahí. N'echjénni nga n'ei kui niu ngajoho Jesu, kui xi Ntíhi ko tsje.

31 Nk'ie nga ja kamaha jóo nga kinchjako Ntíaná, ts'ajniyá ante xi má nga kama ñjakú. Ngayjee j'aijihin Espiritu Santo ko ndjá incha y'énjímí éhen Ntíaná.

B'i ts'in nkuhú tsasinko xinkjín xuta xi s'ejihin Jesu

32 Nkuhú kits'in animaha ko kjuankjintak'uhun ngayjee xi kis'ejihin Jesu. Ndaha nku najmi b'a kitsú tsa nkuhú kui ts'e ni xi tjíhin. Tu sa ní ngujihín kits'ínchjénko xinkjín ni xi tjíhin.

33 'Yún kis'ehe nga'yún já postru nga kitsúya nga j'áiya ngáha ra ngabayoo Nda Ntíaná Jesu ko ngayjee 'yún nda kits'ínkoho Ntíaná.

34 Ajihin xuto najmi kis'e xi kindyjat'aha tsa mí nihi, at'aha ngayjee xi tjíhin xu'ba ko tsa ni'ya tsatéña ko j'aiko toon xi kik'aihí.

35 J'ai tsjáha já postru ko kui xi tsakjánya toon nga kitsjáha xi nkú tjín machjéhen nga nkúnkú xuta.

36 Y'ejña nku nda xi y'aha ra ntje chá Levi xi kitsin xjo Chipre xi 'mi Kuse, xi já postru y'ét'a j'áihin nga Bernabe k'úín. Kui j'áín xi tsuhu ra: xi tsjá nga'yúhun xuta.

³⁷ Bernabe tsateña nku xu'ba xi tijnaha ko j'ai tsjaha já postru toon xi kik'aihi.

5

B'i ts'in kama mjehe Anania ko Safira k'uanachaha já postru

¹ Nku nda xi 'mi Anania ko Safira 'mi chjuuhun incha tsateña nku xu'ba.

² Jak'á chuba toon xi kik'aihi xu'baha ndo ko tu nkuhú tijká j'ai tsjaha já postru. Ta kieke chjuuhun ni xi kits'in.

³ As'ai b'i kitsú Pedro:

—Ji Anania, ¿á ndanindoo jas'enjihin animahi nga tich'anachaha ri Espiritu Santo? Tsateñai xu'bahí ko tí'baiyjeni toon tibixín.

⁴ Kintehe ni nga tsateñai xu'boo, ¿a najmi jihí ts'i? Nk'ie nga tsateñai, ¿a najmi jihí kama ts'ihí toon? ¿Á b'a kitsúhu animahi nga kichjubéheni chuba? Ntíaná tich'anachaihi, najmi xuta.

⁵ Nk'ie nga kint'é Anania éin, tjen'yún j'aikijnehé nga k'ien. Tu ni xí kitsankjúhún ngayjee xuta xi kint'é ni xi kamo.

⁶ As'ai j'ai k'ua já asti, kik'otikjájnu najyun yjon-intee ko tsitjusjeko nga ngjingjáyaji.

⁷ J'a ra tsa nkú ma jan ora j'ai chjuuhun Anania nga najmi be ni xi kamo.

⁸ As'ai kingjásjaiya Pedro:

—T'inyaní, ¿a b'a tjin kich'o xu'banu nga tsateño?

—Johon, b'a tjin tsateñai —kitsú Safira.

⁹ As'ai b'i kitsú Pedro:

—¿Á kabincha'ahanu xinkiu nga mjehenuu chjút'ayák'uhunnu Espirituhu Ntíaná? Astiu

ankjuo yja já xi k'fingjáyaji x'ihin ko ji ta ngjuaikohi nd'ai.

¹⁰ Ta kuihi chubo j'aikijnet'a sjai Pedro tachjúun nga k'ien. Nk'ie nga jas'en já astiu, kikie nga kjiñña k'ien tachjúun ko tsitjuko nga ngjingjáyajit'aha x'ihin.

¹¹ Tu xí kitsankjúhún ngayjee xuta ninku ko ngayjee xuta xi kint'é ni xu'bi.

B'i ts'in y'entu já postru

¹² Já postru kits'in nkjún kjuankjún ko ni xi tsakúchji kjuachánkaha Ntíaná ajihin xuta, ko ngayjee nkuhú kik'a xinkjín nga kama ñjakú ante xi 'mi Kinte Ni'yaha Salomon.

¹³ Ndaha nku xuta xingiso najmi kama k'un nga kama ngujihin xuta xi kama ñjakú yo, tunga xuta nantiohó tjo nkjún kits'ihin.

¹⁴ Nkjin nkjún já ko jminchjín j'aíjín saha xuta xi s'ejihin Nda Ntíaná Jesu.

¹⁵ Santaha aya nyátée kik'onsje xuta xuta uhun nga kama ko nachan kingjántusún, tu xi nk'ie nga kj'uaaha Pedro ndaha tsa tu nk'íehen kj'uahehe xuta uun, kama nkihi.

¹⁶ Ta j'ai nkjún xuta xi tjintu andai nanki Jerusalem nga j'aiko xuta uhun ko xi tjintujihin jánindo. Ngayjee kama nkihi.

B'i ts'in ngji kontraha já tjíxóo já postru

¹⁷ As'ai tu ni xí kama xintak'uhún nda na'mi tíjuun ko ngayjee já xi makoho, kui xi já saduseo.

¹⁸ Kits'ínkji já xi jak'ánijé já postru ko kits'ínkjas'en nubayá.

¹⁹ Tunga nk'iehé nga nistjen nku ntítsjehe Ntíaná kikjex'á nubayo ko kik'onsje jóo nga b'i kitsúhu:

²⁰ —Tankiún. T_{in}cho má ma natsih_{in} n_{in}ku ko t'inyohoo xuta ngayjee én xi tsjá kjuatik'un.

²¹ As'ai kits'intjusun já postru én xi kik'ih_{in}. Nistjin xi ma ndyjuun jas'en má ma natsih_{in} n_{in}ku ko tsakúya. As'ai j'ai nda na'mi titjuun ko já xi makohoo ante má nga ma ñjakúko xinkjín ko kinchja ñjaha ngayjee já k'aku_{hu} xuta Israel. Kitsjá kju_a nga ngju_aichj'a já postru aya nubayoo.

²² Tunga nk'iehé nga tsichu nubayoo já xi kunntá n_{in}ku, najmi kisakúhu já postru. As'ai kik'óya ngáha nga j'aiko én.

²³ B'i incha kitsú:

—Tjíchja tsjan tsjan ankju_a nubayoo nga kuichii ko t_{in}chasti ankjuo já xi tikunntá yo. Tunga nk'iehé nga kuachjux'ai, ndaha nku najmi kuayai ayoo.

²⁴ Nk'ie nga kint'é én xu'bj_i nda na'mi titjuun ko já na'mi k'aku ko nda k'aku_{hu} já xi kunntá n_{in}ku, ndaha najmi ta be mí ni xi kuitsu. Kingjásjaiyaha xinkjín má kuichúket'a ni xi tímoo.

²⁵ Tunga b'ahá j'ai tsú nku nda:

—Jun, já xi kin'ekjas'on nubayá t_{in}cha natsih_{in} n_{in}ku ko t_{ib}akúyaha xuta nantio.

²⁶ As'ai nda k'aku_{hu} já xi kunntá n_{in}ku ko já xi yankih_i incha ngjikj'á já postru. Najmi incha kits'in'uhun nga j'aiko, at'aha tsankjún tsa ndjio k'uéhe xuta nantio.

²⁷ Nk'ie nga j'aiko, tsinchá nginkun já tjíxá xi kama ñjakú yo. As'ai b'i kitsúhu nda na'mi titjuun:

²⁸ —Ja b'a kik'in sisinnuu nga ndahachí najmi kama k'úénijmíhuu Jesu xuta, tunga tu sahá b'a t_{in}'o. Ngayjee xuta Jerusalem be ni xi t_{ib}akuyó, ko mjenuu nga jin ch'anji ngabayaha ndo.

29 As'ai b'i kitsú Pedro ko já postru xingisoḡ:

—Títjun tǐhin nga kuinú'yá'éihin Ntíaná nga xuta.

30 Jun kin'ek'ion Jesu nga kikjat'a kruu, tunga Ntíaha ntje cháháná kits'ínkj'áíya ngáha ra ngabayoo.

31 Ntíaná kitsjáha kjuachánka nga kits'in nga y'ejnat'aha. Kui xi tǐña títjun nd'ai ko xi ts'ínk'anki xuta, tu xi tsjáha ra xuta Israel nga ngjuaikj'áha ra animaha ko kama ndyjat'aha jéhe.

32 Jin kiyai ko tibixínyai ni xu'bi ko Espiritu Santo ya, Espiritu Santo xi Ntíaná tsjáha xuta xi nt'é'éhen.

33 Nk'ie nga kint'é já tǐxóo én xu'bi, tu ni xí 'yúhún kama kjahan, santaha kama mjehe nga ts'ínk'ien já postru.

34 Tunga nkuhú nda fariseḡ xi 'mi Gamaliel, xi nku nda chjine'én xi bakúya kjuatéxumoo ko xi benkjúhun ngayjee xuta, kui xi b'a kitsú nga kuich'onsje kutju já postru.

35 As'ai b'i kitsúhu já tǐxá xingisoḡ:

—Jun xi ntje Israel tǐhennuu, nda nda chasoo tsa mí nihi xi n'ohḡ jóo.

36 At'aha xi nkú kama nd'ai ngáha, nda chánka kits'in ma yjohḡ nda Teuda ko ma ra ñju unchan já xi kitsjennkíhi. Tunga kin'ek'iehén ndo ko kindzjoya ngayjee xi kitsjennkíhi. B'a ts'in tsichukjehe ni xu'bo.

37 Ko askan ngáha, nǐstjin nga tís'exki ngayjee xuta, j'ai Juda, nda xi nibáha ante Galilea, ko nkjin nkjún xuta kitsjennkíhi. Tunga ta kin'ek'iehén ndo ko kindzjoya ngayjee xi kitsjennkíhi.

³⁸ 'Kui b'a maha, b'a tíxihinnuu nd'ai. Najmi tu nungijiun yjonuu ni xi tìncha ts'in já xu'bi. Najmi tu jun nkú n'ohoo. At'aha tsa ts'e xuta asunntej ni xi tìncha ts'in jóo, kuichúkje.

³⁹ Tunga tsa Ntíanáhá ts'e niu, najmi kamanuu n'ekjio. Kutsa santahá ni ko Ntíaná títbankiún kontróo.

⁴⁰ As'ai kits'ínkjáihin já tjíxóo ni xi kitsú Gamaliel. Kinchjaha já postru, kingjáha ko y'éjña nkjúhun nga k'uénijmíyaha Jesu. Incha kits'in ndai ngáha ra.

⁴¹ Incha tsitju já postru nginkun já tjíxóo nga tsjo tìncha ma ts'ihin ra, at'aha Ntíaná kitsjantehe nga un skuéhe ngat'aha Jesu.

⁴² Ngayje nistjin tsakúya tehente ko y'énijmí má ma natsihin ninku ko xki ni'ya nga Jesu xi kits'in nibá Ntíaná.

6

Kui ngat'ai kis'et'a xá yatu já xi tsasinko já postru

¹ Nistjin nk'ie nga ja tìncha ma nkjin xuta xi yankihí Jesu, as'ai xi nchja én griego b'a kitsú nga najmi nda títs'in xi nchja én hebreo. B'a incha kitsú nga najmi nda tíchasehe jminchjín xi nchja én griego xi ja k'ien x'ihin nk'ie nga tímandzjo nichine xki nistjin.

² As'ai já postru xi te joo kinchja ñjaha ngayjee xuta ni'yakuyáha Jesu ko b'i kitsúhu:

—Jin tihin nga k'úénijmí éhen Ntíaná. Najmi nda tjin tsa k'úejñai nga b'a n'ei, tsa tu xi yámixó chasehe ri.

³ Kui nga jun, já nts'e, t̄inchísjaihinu ajinnu yatu já xi yankjún, xi kitsejih̄in ra Espiritu Santo ko xi nanka ts'innkjink'un, tu xi k'uaih̄i ri xá xu'bj̄i.

⁴ B'a ts'in jin n'ekjas'ehen ri yjoni nga chubakoi Nt̄ianá ko nga k'úenijm̄i éhen.

⁵ Ngayjee xuta kits'ínkjáih̄in ni xi kitsú já postru ko j'ájin já xu'bj̄i: Esteban, nku nda xi 'yún s'ejih̄in Nt̄ianá ko xi kitsejih̄in ra Espiritu Santo, Felipe, Procoro, Nicanor, Timon, Parmena, ko Nicola, nda xi nibáha nanki Antiokia. Kui nda xi najmi ntje judio t̄jehen ra tunga jahá nd'ai s'ejih̄in ra Nt̄ianá.

⁶ Já postru jaich'áha já xi yatui. As'ai já postru kinchjantjai jóo nginkun Nt̄ianá ko kingjénne ntsja.

⁷ 'Yún ngjindju éhen Nt̄ianá nanki Jerusalem ko 'yún nkjin kama xuta ni'yakuyáha Jesu. Ta nkjin já na'mi kis'ejih̄in Jesu.

Kui ngat'ai kichjubénijéhe Esteban

⁸ Esteban 'yún nda kits'ínkoho Nt̄ianá ko kitsjáha nga'yún. Kits'in kjuankjún ko ni i xi tsakúchji kjuachánkaha Nt̄ianá ajih̄in xuta nantio.

⁹ As'ai k'ua xuta ni'ya sinagoga xi 'mi Sinagoga Xuta Ndaí incha ngji kontraha Esteban, ko k'ua xuta Cirene ya, ko xuta Alejandria, ko k'ua xi nibáha ante Cilicia ko ante Asia. Kui xi incha y'ésiko Esteban.

¹⁰ Tunga najmi kamahá ra kits'in nganaha, at'aha Espiritu Santo kitsjáha Esteban kjuankjink'un nanka nga kinchja.

¹¹ As'ai incha y'échj̄ih̄i k'ua já tu xi b'a kuitsuhu nga kui xi kint'é nga Esteban ch'on kitsúhu Moise ko Nt̄ianá.

12 B'a ts'in tsinchákjahān ra xuta nantio ko jáchá xi tjihin xá ko já chjine'éhen kjuatéxumoo. As'ai ngjik'ánijé Esteban ko ngjiko má nga ma ñja já tjíxóo.

13 Ta incha j'aiko já testiyu tsank'á xi b'i kitsú:

—Kui ndai tu nku én ch'on tsuhú títsuhu ninkuhu Ntíaná ko kjuatéxumoo.

14 Kinu'yái nga b'a kitsú nga Jesu, nda xi nibáha Nazaret, ts'íinkatsúnya ninku xu'bi ko nga ts'íink'óntjaiya sin xi kich'aá xi tsakúyaná Moise.

15 As'ai ngayjee já tjíxá xi kab'entu yo tsasehe Esteban ko kieke nga b'a tjin ankjín ntítsje tjin ankjín Esteban.

7

B'i ts'in tsasinntjai yjoho Esteban nginkun já tjíxóo

1 As'ai nda na'mi títjuun kingjásjaiyaha Esteban:

—¿A kjuaxi ni xi tjincha tsu jóo?

2 As'ai b'i kitsú Esteban:

—Jun xi ntje Israel tjeheñnuu ko jun xi tjinñuu xá, tasinñju manú. Ntia chánaná tsakúchjihí yjoho ntje cháná Abraham nk'ie nga tijnña sa ante Mesopotamia, kintehe ni nga ngjuaik'iejña nanki Haran.

3 B'a kitsúhu: “Títjui nankihí ko t'entui xuta xinki. T'ihinnchin ante xi kuakuu.”

4 As'ai tsitju Abraham antehe xuta Caldea ko ngjik'iejña nanki Haran. Nk'ie nga k'ien na'mihí Abraham, Ntíaná kits'in nibáha má tintsuboo nd'ai.

5 E'i najmi kitsjáha ante xi kama ts'e, ndaha nku te má kama kuasín tsuku. Tunga kitsúya títjuhún

ra nga tsjáha nga kama ts'e ei má tintsu_{oo} nd'ai ko nga ntje xi s'ehē askahan ta kama ts'e, ndaha tsa najmi tjíhin ntí Abraham kui nístjiun.

⁶ Ntíaná b'a kitsú yaha Abraham nga ntje xi s'ehē k'úentu má nga najmi kui ts'e, ko nga xuta musu n'e ma, ko nga ñju unchan nú tjíhin un skuehe.

⁷ B'a kitsú ya Ntíaná: “An ts'inkokjua xuta xi musu ts'ín maha. Askahan incha kuitju yo ko ts'íintsjona ante xu'bi.”

⁸ Ntíaná b'a kitsúhu nga ts'ín ni circumcision, tu xi b'a ts'in sakúchji ni nda xi y'éndako. Kui b'a maha, nk'ie nga kitsihin Isaac ko nga ja tjíhin jin nístjin, Abraham kits'íhin ni circumcision. Isaac b'a ta kits'íhin Jacob, ko Jacob b'a ta kits'íhin ntí xi te joho, xi kama ntje cháná.

⁹ Kits'innchiníhí já nts'e Kuse ko tsatéñaha xuta xí tjín ante Egipto. Tunga Ntíanáhá tsasinkoho Kuse

¹⁰ ko kits'ínkj'a t'axíhin ngayjee kju'a'un xi kisatéjin. Kitsjáha kjuankjintak'un nanka ko kjuanda nginkun nda faraon, xi nda reihí xuta Egipto. Nda rej kitsjá xaha Kuse nga kama nda tíjuhun xuta Egipto ko nda k'akuhu ngayjee xuta xi tjín ni'yaha nda rej.

¹¹ As'ai kis'e kjintía ko kju'a'un chánka ngayjee ante Egipto ko ante Canaan, má nga tjintu ntje cháná. Najmi ta kisakúhu ra nichine.

¹² Nk'ie nga kint'é én Jacob nga Egipto tjín tuniñu, kits'ínkjí ntíhí xi ntje cháná maha niyá xi tjuhun.

¹³ Ko niyá xi ma joho Kuse tsakúchjihí yjoho já nts'e. B'a ts'in kikiéhe nda faraon xuta xi ts'e Kuse.

14 'As'ai b'a kitsú Kuse nga ngjuaichj'a Jacob xi na'mihí maha kō ngayjee xutá xi y'ahá rá, xi cháte kō kan ún maha.

15 B'a ts'in j'aik'iejñaha Jacob Egipto kō yō k'ien. Ta yō ya incha k'ien ntíhi xi kama ntje cháná.

16 Askahan ngji s'eyanji Jacob nanki Sikem, má nga tíjña tsjó xi ts'atse Abraham nga kitsjáha tōontaba ntíhi Hamor.

17 'Nk'ie nga tsichu tiña nistjin nga ts'íntjusun Ntjaná ni xi kitsúya tíjuhun Abraham, 'yún nkjin kama sa xutaná xi kik'ientu Egipto.

18 As'ai tsatéxuma yō kj'ai nda rei xi najmi be Kuse.

19 Kui xi ts'anachaha xutaná kō kits'in'uhun ntje cháná. Kits'in kju'a'yúhun rá nga k'uéntu masen ntíhi tu xi kuayáha.

20 'Kui nistjiun kitsin Moise kō Ntjaná kisasíhin Moise. Jan sá kamaha xi cháhá nga kikuhun.

21 Nk'ie nga kis'ejña masen, takjihin nda faraon jakj'áha kō kits'incháha xi nkúhu tsa ntíhi maha.

22 B'a ts'in tsangiyaha Moise ngayjee ni xi maha xutá Egipto. Nku nda chánka kama. Kinchja kō tse ni xi kits'in.

23 'Nk'ie nga jehe yachán nú Moise, animaha nibaha rá nga ngjitsubek'un xutá xinkjín, xi xutá Israel.

24 Nk'ie nga kkie nga tín'e'uhun nku nda xi ntje Israel tjeheñ rá, tsasinko. Kits'ínk'ien nda Egipto xi b'a kits'íhin. B'a ts'in kits'in ngajoyaha ni xi tín'ehe nda xi ntje Israel tjeheñ rá.

25 At'aha b'i kitsú Moise nga kits'innkjink'un: "Kamankjihin xutá xinkjián nga an ts'ínchjénna

Ntjaná tu xi kama ndáihí ra xutana.” Tunga najmi b'ahá ts'in kits'innkink'un xuto.

26 'Nistjin xi ma ndyjuun kieke Moise nga jo já xi ntje Israel tjehen ra tíncha kjánko xinkjín ko mjehe nga kuatekj'áiyaha jóo. B'i kitsúhu: “Jun já, nts'o mahanu xinkiu. ¿Á ta jun tín'e'uhun ruu xinkiu?”

27 As'ai nda xi títs'in'uhun nda xinkuu kitsuniña Moise nga b'a kitsúhu: “¿Yá xi kitsjá xáhi nga ji xi kamaí nda k'akuní ko nga cháséhí tsa nda ko tsa najmi nda tín'ei?”

28 ¿A kohó an mjehi n'ek'ienní xi nkú ts'in kin'ek'iein nda Egipto kujña?”

29 Nk'ie nga kint'é Moise éin, tsanka ko ngjik'iejña ante Madian. Yo y'ejñasún ko yo kis'entuhu jo ntí.

30 'Nk'ie nga j'a yachán nú, nku ntítsje j'aisehe Moise ante kixiu tiña asunntu tjenki Sinai. Ajihin nku na'yá ntsje xi títi tsakúchjihí yjoho.

31 Kama nkjúhun Moise nk'ie nga kieke ni xi tíma chjihí ko ngjise tiñaha tu xi kuase sisihin ra. Tu kint'éhé ntaha Ntjaná nga b'a kitsúhu:

32 “An xi Ntjaha ntje cháhi, Ntjaha Abraham, Isaac ko Jacob.” Ts'atsé nkjún Moise ko najmi kama k'un nga tsase.

33 B'a kitsú Ntjaná: “N'esjei tjabaxín ntéhi, at'aha ante nkjúhún má nga kabisinjñai.

34 Tíbe kjuanimá xi tífa xuta xi ts'an xi tjintu Egipto ko tint'e nga un tíncha maha. Kaf'áijen tu xi ts'in ndáihí ra. T'endai yjohi. An ts'inkjíhi Egipto.”

35 'Najmi kits'in mjehe jóo Moise nga b'i kik'ihin: “¿Yá xi kitsjá xáhi nga ji xi kamaí nda k'akuní

ko nga ch̄aseih̄i tsa nda ko tsa najmi nda t̄in'ei?" Tunga kuih̄i Moise xi kama ch̄jih̄i nt̄itsjehe Nt̄ianá ajin na'yá ntsje xi títi. B'a ts'in Nt̄ianá kits'ínk̄jih̄i ra ko kik'ai xáha nga kui xi kama nda k'akuhu xutaná ko nga ts'ín ndaíh̄i.

³⁶ Kui xi kik'onsje xutaná Egipto. Yachán nú t̄j̄hin kits'ín kjuankjún ko ní xi tsakúch̄ji kjuachánkaha Nt̄ianá Egipto ko ajih̄in Ntáchak'un Niú ko ante kixiú.

³⁷ 'Kui Moise xi b'a kitsúhu xuta Israel: "Nt̄ianá kjésintjen nku nda profeta xi nkúhu an. Ajinnuu kuitjuhu."

³⁸ Kui Moise xi y'ejñajih̄in xuta nga kama ñjakú nk'ie nga y'entu ante kixiú. Kinchjako nt̄itsjee asunntu t̄jenk̄i Sinai ko ta kinchjako ntje chána. Kik'aih̄i nga tsjáná én xi ts'ínk'íentu t̄ik'unná.

³⁹ 'Tunga ntje chána najmi kama mjehe nga kuint'é'éhen. Tu sahá kits'ín t'axín ko kama mjehe nga k'oóya ngáha Egipto.

⁴⁰ B'a incha kitsúhu Aaron: "N'endani ntia xi tsjén t̄it̄j̄unni, at'aha najmi yai mí nihi xi kamaha Moise, nda xi kik'onsjeni Egipto."

⁴¹ As'ai incha kits'ínnda nku turu ntia ko kits'ínk'ien chu nga kitsjáha chje. K̄its'intsjoh̄o ni xi ntsja kits'ínndakoh̄o.

⁴² 'As'ai Nt̄ianá najmi ta kits'ínsih̄in ra xuta xu'bo. Kitsjantehe nga ts'íintsjoh̄o niñu xi t̄j̄in nk'a ján. B'a kama xi nkú ts'ín t̄j̄it'a xujun éhen Nt̄ianá xi y'ét'a já profeta:

Jun xuta Israel, ¿a ahán kik'ainú chje, nk'ie nga tintsuḅoo ante kixiú yachán nú t̄j̄hin?

⁴³ Ni'ya najyuntehe ní ntia Moloc ko niñuh̄u ntia Renfan tsankinkoo.

Sénnistjin kin'endo tu xi n'etsjohoru, kui nga kjin ts'inkjihinuu xi tjejen astun Babilonia.

44 'Kits'innda Moise ninku najyunte xi bakúchji nga Ntjaná tíñajihin xuta xi ts'e. Kin'enda xi nkú ts'in kisakúchjihí nga kamanda. B'a ts'in ante kixiu kis'ejñaha ra ntje cháná ninku najyuntee xi nkú nga kitsú Ntjaná.

45 Kik'aihi ntje cháná nga kama ts'e niu. Incha y'a nk'ie nga incha jas'en ei má tintsuboo nd'ai, nistjin nk'ie nga tjihin xá Josue ko kikjanku xuta xi tíntu ei, xi Ntjaná kik'onsje ngandaha ntje cháná. B'a ts'in kis'ejña ninku najyuntee santaha nkúhu nga y'ejña nda rej David.

46 'Ntjaná kisasihin David ko David kama mjehe nga ts'indaha nku ante Ntjaná, Ntjaha ntje cháná Jacob.

47 Tunga Salomon kits'inndaha ni'ya Ntjaná.

48 B'a tjin kjáihin nga nk'a ján tíña Ntjaná ko nga najmi b'ejñaya ni'ya xi ts'innda xuta. At'aha b'a ts'in y'ét'a éhen Ntjaná nda profeta:

49 Ndjiójmi ján bátejña nga batexuma, ko t'anankiu basinjñasan tsuká.

¿Mí ni'yaha xi n'endanú, titsu Ntjaná, ko má antehe kama ts'inkj'áiya?

50 An ní kits'innda ngayjee ni xu'bi.

51 B'a ta kitsú ya Esteban nga ngjindju:

—Tunga jun najmi mjenuu kuinú'yá'ón. B'a ts'in nu'yó ko tíya animanuu xi nkú joyaha xuta xi najmi be Ntjaná. Nkuhú nga tintsuba kontraha ruu Espiritu Santo. Jun xi b'a k'un xi nkúhu ntje chánuu.

52 ¿Má já profetaha xi najmi kitsjennkí unkie ntje chánu? Kits'ínk'ien já xi kitsúya tíjún nga kj'uaí nda xi naxu ts'ín. Kó nk'ie nga j'ai ndo, jun kin'ekjas'on kó kin'ek'ion.

53 Jun bi ntítsje kits'ínkjas'ennu kjuatéxumaha Ntíaná tunga najmi tín'etjusunnú.

B'i ts'in kin'ek'ien Esteban

54 Nk'ie nga kint'é já tjíxóo ni xi kitsú Esteban, tu ni xí incha kama kjahán ra kó ixí tsatehé nì'yún.

55 Tunga máha Esteban, kitsejín ra Espiritu Santo. Tsasenjinki nk'a ján kó kkie kjuachánkaha Ntíaná kó nga Jesu kabasinjñat'aha Ntíaná.

56 B'i kitsú:

—¡Chasoo! Tíbe nga tjen tixa ndjiojmi ján kó nga Ntíhí Nda'x'iun kabasinjñat'aha Ntíaná.

57 Najmi ta tsasínñuju ra jóo Esteban. Xaáhan incha kits'in. Ngatentee nkuhú nga ngjikj'á.

58 Incha kik'onsje natsihín nantio kó yo incha y'éhe ndjio. Nku ndati xi 'mi Saulo kikunntá nájjuhún já testiyu tsank'óo.

59 Nk'ie nga tís'ehe ndjio Esteban, b'i kitsú nga kinchjako Ntíaná:

—Ji Nda Ntia Jesu, n'ekjáihín animana.

60 As'ai tsasinkunch'in kó 'yún kikjintáya nga b'i kitsú:

—Ji Nda Ntia, najmi tu ch'axkihí ri jái ngatitsun xu'bj.

Nk'ie nga ja b'a kitsú, k'ien.

8

B'i kama nk'ie nga ja kin'ek'ien Esteban

1 Kisasihin Saulo nga kin'ek'ien Esteban, ko ta kuihi nistjin xu'bo kich'atuts'ihin nga tu ni xi kitsjennki unchaha xuta ninku xi tjin nanki Jerusalen. Kindzjoyayje nga ngji ante xi tjin Judea ko Samaria. Tu ja postru y'entu subaha sa Jerusalen.

2 K'ua ja xi nda tjintuyaha kingjayanji Esteban ko kikjintat'a.

3 Tunga tu xi kitsjenki unkiehe Saulo xuta ninku. Xki ni'ya jas'en nga kikjebefe jax'in ko jminchjin ko kits'inkjas'en nubaya.

B'i ts'in kis'enijmi ehen Ntiana ante Samaria

4 Maha xuta xi kindzjoyoo, tu ma xi tjehe ni nga incha ngji, yo incha y'enijmi en nda tsuhu Ntiana.

5 Ante Samaria ngji Felipe nga y'enijmih xuta xi tjin yo nga Jesu xi kits'in niba Ntiana.

6 Kama nja xuto nga kingjenñjuhu ni xi kinchja Felipe nk'ie nga incha kint'e ko kkie ni xi kits'in nga tsakuchji kjuachankaha Ntiana.

7 At'aha nkjin janinda xi tsitjujihin xuta nga 'yun kikjintaya nga tsitju, ko nkjin xuta xi najmi ma fi ko xi nima sjai kama nkih.

8 Kui nga tsjo nkjun kamaha ra xuto.

9 Tunga ta y'ejnaha yo nku nda xi 'mi Simon xi kits'in tje nistjin nk'ie. Kui xi ts'anachaha xuta xi tjin ante Samaria. B'a kitsu nga kui xi nku nda chanka.

10 Ngayjee xuta tsasinñjuhu ndo, b'aha ra xi ndy-jaha ko santaha xi chaha. B'a incha kitsu:

—Kui nda xu'bi xi nga'yun chankaha Ntiana.

11 Incha ts'insihin at'aha nkjin nu kits'in tje ndo. B'a ts'in ts'anachaha xuta.

12 Tunga nk'ie nga tsakúya Felipe nga Ntíaná xi batéxuma kō nga Jesu xi kits'in nibá Ntíaná, kis'ejihin xuta kō kiaténtá jmichjín kō jáx'in.

13 Santaha kō Simon ta kis'ejihin kō kiaténtá. As'ai kitsjenko tehente Felipe kō kama nkjúhun nk'ie nga kieke ni xi tsakúchji kjuachánkaha Ntíaná kō kjuankjún i xi kits'in Felipe.

14 Nk'ie nga kint'é én já postru xi tjintu nanki Jerusalen nga xuta xi tjín ante Samariá kits'ínkjáihin éhen Ntíaná, as'ai kits'ínkji yo Pedro kō Jua.

15 Nk'ie nga incha j'ai jóo yo, kinchjantjai xuta Samariá nginkun Ntíaná tu xi ts'ínkjáihin ra Espiritu Santo.

16 At'aha ndaha nku najmi kjee f'aijihin Espiritu Santo kō tu ntáhá kiaténtáhá xuta nga kits'ínkjáihin Jesu.

17 As'ai Pedro kō Jua kingjénne ntsja xuta kō kits'ínkjáihin Espiritu Santo.

18 Kieke Simon nga kits'ínkjáihin xuta Espiritu Santo nk'ie nga kingjénne ntsja já postru. As'ai kingjén'a toon já postru

19 nga b'i kitsúhu:

—K'uainú kō an nga'yún xu'bi, tu xi nk'ie nga nguenné ntsahana tu yáha ni ta ts'ínkjáihin Espiritu Santo.

20 As'ai b'i kitsú Pedro:

—Kandyjai kō ta kandyja tjoohin, at'aha b'a n'e t'n'enkjintak'uin nga toon ma ch'atsekoho ni xi tsjá Ntíaná.

21 Najmi ji tsuhu ri kō najmi ji tjehen ri xá xu'bi, at'aha najmi kixi tjíya animahi nginkun Ntíaná.

22 T'inch'aha ri animahi ngat'aha ngatitsun xu'bi ko chubanimakoi Ntíaná, tsa tu 'yaha ts'ínnndyat'ahi ni xi kuan'enkjintak'uin.

23 At'aha tibe nga najmi je tjíya animahi ko tibe nga ni ch'onk'uun tjí'yíhin ji.

24 B'i kitsú Simon:

—Chubanimakoo Ntíaná tu xi ndaha nku ni xi kuak'ihinnú najmi nibanehena.

25 Nk'ie nga ja incha y'énijmí éhen Ntíaná yo Pedro ko Jua ko y'éjña chjihí xuta yáha Jesu, as'ai kik'óya ngáha nanki Jerusalen. B'a ts'in incha j'aha nkjin ante nanki xi tjín ante Samaria nga y'énijmí ts'íhin én nda tsuhu Jesu.

B'i ts'in kinchjanijmíko Felipe nku nda xi nibáha ante Etiopia

26 As'ai nku ntítsjehe Ntíaná kinchjakoho Felipe. B'i kitsúhu:

—Tísintjein ko chjúbéi niyá xi bitju Jerusalen nga t'in nanki Gaza.

Ante kixiu f'a niyá xu'bi.

27 As'ai tsisintjen Felipe ko ngji, ko aya niyóo kisatéjin nku nda xi nibáha ante Etiopia. Nku nda eunuko niu, nku nda k'aku xi ts'inxát'aha na Candace xi na reinaha xuta Etiopia. Kui xi f'átjo ngayjee tohon na reina. Ntíaná ngji ts'intsjoho ndo nanki Jerusalen

28 ko ja túb'óya ngáha nankihí. Yá xi tjenko kab'ejñaya ko tít's'inya xujun éhen Ntíaná xi y'ét'a nda profeta Isaia.

29 As'ai Espiritu b'i kitsúhu Felipe:

—T'ihinse tiñaihí nda xi kab'ejñaya yá ján.

³⁰ Nk'ie nga tsichuk'úh_{un}, kint'é Felipe nga xuj_{un} xi y'ét'a nda profeta Isaiá títs'ínya ndo. As'ai b'i kitsúhu:

—¿A tímankjihin ni xi tín'eyai?

³¹ —¿Nkú ts'ín kamankjihinna nga najmi tjín xi kuitsuya sisinna? —kitsú ndo ko tsankihí Felipe nga kuiyájn_{ut}'aha.

³² B'i ts'ín tjít'a má nga títs'ínya ndo:

Ngji n'ek'ien xi nkúhu chutsanka, najmi kikjex'á ts'a,

xi nkúhu chutsanka xi tíchj'ajnu tsankaha.

³³ Kichajnu_{cha} ko najmi naxu kin'ehe kjuá.

Tsichakjá ntjehe at'aha kin'ek'ien.

³⁴ As'ai b'i ts'ín kinchja nda k'aku xi nibáha Etiopía nga kingjásjaiyaha Felipe:

—T'in_{yaní}, ¿yá xi tínchjanijmíyaha nda profeta ei? ¿A kui tínchjanijmíyaha yjoho a ra kj'aíhí xi tínchjanijmíyaha?

³⁵ As'ai kinchja Felipe. Má nga títs'ínya ndo kik'atuts'ih_{in} ra nga kitsúyaha én nda tsuhu Jesu.

³⁶ Nk'ie nga tíncha ts'ín niyá, tu incha tsichuhú má nga tjín ntánijua ko b'i kitsú nda k'aku Etiopía:

—Á ntánijua ei. ¿A najmi kamahá saténtá?

³⁷ B'i kitsú Felipe:

—Tsa ngayjee animahí s'ejihin yáha Jesu, kama.

B'i kitsú ndo:

—S'ejinna nga Jesucristo xi Ntíhi Ntíaná.

³⁸ As'ai b'a kitsú nga s'ejña'yún yóo ko nga joo tsitjuj_{enya} má tjíña ntánijuo. As'ai Felipe tsaténtá ndo.

³⁹ Nk'ie nga incha tsitjujin ntánijuo, Espiritu Santo ngjik_o t'axih_{in} Felipe. Nda k'aku xi nabáha

Etiopiá najmi ta kikiehe Felipe, tunga tsjohó kik'iehe nk'ie nga kits'inndjuú niyáha.

⁴⁰ Tsichu Felipe nanki Azoto ko xki ante ngji nga y'enijmí én nda tsuhu Jesu santaha nkúhu nga tsichu nanki Cesarea.

9

B'i ts'in jakj'á Jesucristo nda Pablo

¹ Saulo tu nku tsinchánkjúhún ra xuta xi s'ejihin Nda Ntjaná Jesu nga mjehe ts'ínk'ien. Kui nga ngjisehe ra nda na'mi tíjuun

² ko tsankihí xujun xi má nga tí'baihi kjuá, tu xi kama ngjuaihi ni'ya sinagoga xi tjin nanki Damasco ko kuangisjai yo xuta xi s'ejihin Jesu ko kj'uaíkonijé nanki Jerusalen, ndaha tsa jáx'in ko ndaha tsa jminchjin.

³ Tunga nk'iehé nga títs'in niyá ko ja tábichú tiña nanki Damasco, tjen'yún kits'in ndzjehé ra Saulo nku nd'í xi nibaha nk'a ján.

⁴ As'ai tsijne t'anankiu ko kint'é nku nta xi b'i kitsúhu:

—Saulo, Saulo, ¿á an tjenki unchahaní?

⁵ —¿Yáha ji, Nda Ntja? —kitsú Saulo.

B'i kitsú xi kinchjakoho:

—An Jesu xi tjenki unchai.

⁶ Tisintjein ko t'in ajin nantio. Yo k'úinyahi ni xi tjin nga n'ei.

⁷ Kitsankjún já xi tjenko Saulo, at'aha kint'é nto tunga najmi ch'a xi kikiehé.

⁸ As'ai tsisintjen Saulo, tunga nk'ie nga kikjex'á tunkun najmi ta kama chjihí ra. Kui nga tu kichjubénkihí ni nga ngjiko jóo nanki Damasco.

9 Yo kamaha jan nistjin nga y'ejña ka. Najmi chumi nihi xi kikjine ko najmi chumi ntáha xi kik'i.

10 Damasco y'ejña nku nda xi tjennkihí Jesu xi 'mi Anania. Kui xi Nda Ntjaná tsakúchjihí yjoho xi nkúhu tsa nchini kik'aihí ko b'a kitsúhu:

—Ji Anania!

—Á an ej, Nda Ntia —kitsú Anania.

11 B'i kitsúhu Nda Ntjaná:

—Tisíntjein ko t'in niyáté xi 'mi Niyá Kixi. Ni'yaha Juda chasjaiyai nku nda xi nibáha nanki Tarso xi 'mi Saulo. Ntjaná tínchjako ndo.

12 Ja kama chjihí xi nkúhu tsa nchini kuak'aihí nga nku nda xi 'mi Anania kafas'en má tíjña ko nga kamjénehe ntsja tu xi kama chji ngáha ra.

13 B'i kitsú Anania:

—Ji Nda Ntia, nkjin xuta títsuyana xi nkú k'uhun ndo ko ni xi najmi nda xi kits'íhin xuta xi ts'í xi tíjntu Jerusalen.

14 Já na'mi k'aku ja kitsjáha kjuá xi má nga kama ngjuaiko kjuá'yún ngayjee xi s'ejihin ji.

15 As'ai b'i kitsú Nda Ntjaná:

—T'in, at'aha an ja j'ajián ndo nga kui xi k'uénijmíhí an xuta xi najmi ntje Israel tjeheñ ra ko já rei ko xuta xi ntje Israel tjeheñ ra.

16 An kuakuchjihí nk'ie nga nkjin kjuanima kj'ujin ngat'ana.

17 As'ai ngji Anania. Jas'en ni'ya má nga tíjña Saulo ko kingjénne ntsja nga b'i kitsúhu:

—Ji nda nts'é Saulo, Nda Ntjaná Jesu xi tsakúchjihí yjoho aya niyá má nga t'nibái, kui kuats'in nibána tu xi kama chji ngáha ri ko tu xi tséjihin ri Espiritu Santo.

18 Tjen'yún tsitjunkihi tunkun Saulo ni xi b'a k'un tjabaxkfi k'un ko kama chji ngaha ra. As'ai tsisintjen ko kisaténta.

19 Nk'ie nga ja kikjine nichine, kisaku nga'yún ngaha ra ko chuba nistjin y'eñajihin xuta xi yankihi Jesu xi tjin Damasco.

B'i ts'in y'énijmí tjuhun éhen Ntiana Saulo nanki Damasco

20 As'ai y'énijmí Saulo éhen Ntiana ni'ya sinagoga xi tjin yo nga b'a kitsú nga Jesu xi Ntíhi Ntiana.

21 Kama nkjühun ngayjee xuta xi kint'éhe. B'i incha kitsúhu xinkjin:

—¿A najmi kuihi ndai xi tjennki unkie xuta xi s'ejihin Jesu nanki Jerusalen? Ko ta kui xa j'aihi ei tu xi ngjuaikonijéhe xuta nginkun já na'mi k'aku.

22 Tunga tu saha 'yún y'énijmí sa Saulo ko y'eña chji nga Jesu xi kits'in niba Ntiana. Kits'inndyjajihin xuta xi ntje judio tjehen ra xi tjin tu Damasco.

23 Nk'ie nga ja nkjin nistjin, as'ai y'éndako xinkjin já judio nga incha ts'ink'ien Saulo.

24 Tunga tjin xi kitsúyaha Saulo ni xi y'enda jóo. Nistjin nistjen incha kikunnta ankjuaha nankiu tu xi ts'ink'iehen Saulo.

25 As'ai xuta xi yankihi Jesu tsasinkoho Saulo. Y'éyaha nku nisin ko kikjejenntjaihi xjoho nankiu nga jyuun.

B'i kama nk'ie nga j'ai tjuhun Saulo nanki Jerusalen

26 Nk'ie nga tsichu Saulo nanki Jerusalen, mjehe nga kamangujinko xuta xi yjankihi Jesu, tunga kit-sankjuhún ra ngayjee jóo, at'aha najmi kis'ejihin tsa ja ta nku nda xi tjennkihi Jesu Saulo.

27 As'ai Bernabe ngjiko Saulo nginkun já postru ko kitsúyaha xi nkú ts'in aya niyóo kieke Saulo Nda Ntíaná ko nga Nda Ntíaná kinchjakoho ko xi nkú ts'in ndjá y'énijmí éhen Jesu nanki Damasco.

28 As'ai y'eña Saulo nanki Jerusalen. Y'emako já postru ko ndjá y'énijmí nga tsakúya yáha Nda Ntíaná Jesu.

29 Kinchjanijmíko ko y'ésiko xuta xi ntje judio tjehen ra xi nchja én griego. Tunga já xu'bi tsangis-jai niyá xi nkú ts'in kama ts'íink'ien Saulo.

30 Nk'ie nga kint'é já nts'eé ni xu'bi, as'ai ngjiko Saulo nanki Cesarea. Ja kamo ko kits'ínkji Tarso.

31 Kis'ehe kjuajyu xuta ninku xi tjín ngayjee ante Judea, ante Galilea ko ante Samaria. 'Yún kis'ejin saha Ntíaná. Kikienkjún Ntíaná nga y'entu ko Espiritu Santo tsasinkoho nga 'yún kama nkjin sa.

B'i ts'in kits'innkihi Pedro nda Enea

32 Nk'ie nga tsú'bak'un Pedro xuta ninku xi tjín xki ante, as'ai ta j'aisehe xuta xi ts'e Ntíaná xi tjín nanki Lida.

33 Yo kieke nku nda xi 'mi Enea xi jin nú tjihin nga kjiñasun nachan, at'aha nta sjai.

34 As'ai b'a kitsúhu:

—Ji Enea, Jesucristo títs'innkihi. Tisintjein ko t'endai kamahi.

Ta kuihi chubo tsisintjen Enea.

35 Ngayjee xuta xi tjintu Lida ko Saron kieke nga tsisintjen Enea ko kits'ínkáihin Nda Ntíaná.

B'i ts'in kits'ínkj'áiyahá Pedro tachjuún Tabita

³⁶ Nanki Jope y'ejña nku tachjuún xi tǝnnkihi Jesu xi 'mi Tabita, j'áin xi tsuhu ra Dorca nga én griego. Kui xi ngayje nǝstjin kits'in ni xi nda ko kitsjáha xuta x'an ni xi machjéhen.

³⁷ Kui nǝstjiun kisate ch'in ko k'ien. Askahan nga ja jejnú yjonintehe, kis'ejña nku aya 'ma.

³⁸ Nk'ie nga kint'é xuta ni'yakuyáha Jesu xi tjintu nanki Jope nga nanki Lidá tjña Pedro, as'ai kits'ínkjisehe jo já, at'aha tiña maha xinkjín nankiu. B'i kitsú jóo nga j'ai nchjako Pedro:

—Najmi tu n'ek'andayai. Nibáasenǝ.

³⁹ As'ai tsisintjen Pedro ko ngjiko jóo. Nk'ie nga ja tsichu nanki Jope, xuta xi tǝncha yo ngjikohe aya 'ma xi má nga kjijña yjoninte k'ien. Ngayjee jminchjín xi ja k'ien x'ihǝn j'aitset'áha Pedro nga tǝncha kjintá ko tǝncha bakú x'ótji ko kj'ai sa najyun xi ts'innda Dorca nk'ie nga y'ejña.

⁴⁰ As'ai kik'onsje Pedro ngayjee xuta xi tǝncha yo ko tsasinkúnch'in nga kinchjako Ntǝaná. Tsase ts'ihǝn ra yjoninte k'ien nga b'i kitsú:

—Ji Tabita, tǝsǝntjein.

As'ai kikjex'ánki tunkun tachjuún. Nk'ie nga kikié nga yo síjña Pedro, y'ejña kutu.

⁴¹ Pedro jakjá ntsja tachjuún ko kikjesǝntjen. Kinchjaha xuta nǝnku ko jminchjín xi ja k'ien x'ihǝn ko kits'ínkjias'en tǝk'un ngáha ra tachjuún.

⁴² Ngayjee xuta xi tjín nanki Jope kint'é ni xi kamoó ko nkjin xi kis'ejihǝn Nda Ntǝaná Jesu.

⁴³ Nkjin nǝstjin kamaha Pedro nga y'ejña nanki Jope ni'yaha nda xi 'mi Simon xi f'áxi tǝbaxín.

10

B'i ts'in ngjisehe Pedro nda Cornelio

¹ Nanki Cesarea y'ejña nku nda xi 'mi Cornelio xi nda jun k'akuhu já jun xi 'mi Já jun Italiano.

² Kui ko ngayjee xuta xi tjintu ni'yaha tjoho ko benkjún Ntíaná. Tsjáha xuta x'an ni xi machjéhen ko tehente nchjako Ntíaná.

³ Nku niyá nkú ra ma nga chuba jan nga ngixuun kama chjih nku ntítsjehe Ntíaná xi nkúhu tsa nchini kik'aihi kamaha. Kikie Cornelio nga jas'en ntítsjee má tíjña ko b'a kitsúhu:

—j*i* Cornelio!

⁴ —¿Mí nihi, Nda Ntia? —kitsú Cornelio nga tsase ko títsankjúhún ts'ihin.

B'i kitsú ntítsjee:

—Tsasínñjuhu Ntíaná ni xi tsinchihi ko tíbe nga tíbaihi xuta x'an ni xi machjéhen.

⁵ Kui nga n'ekjihini nanki Jope já xi kuinchjaha ra Simon, kui xi ta 'mi Pedro.

⁶ Kui xi tíjña ni'yaha nda Simon xi f'áxi tjabaxín, nda xi tíña andai ntáchak'uun síjña ni'yaha.

⁷ Nk'ie nga ja ngji ntítsje xi tinchjako, as'ai kinchjaha Cornelio jo já musuhu ko j'ájin ajihin já jun xi tíihin nku nda jun xi tjoho Ntíaná.

⁸ Kitsúyaha ngayjee ni xi kamo, as'ai kits'ínkji nanki Jope.

⁹ Nístjin xi ma ndyjuun, nk'ie nga títs'in niyá jóo ko nga ja tibichú tíña ajin nantio, Pedro ngji nchjako Ntíaná nk'a ni'ya má nga tíjña, nkú ra ma nga chuba te jo.

10 As'ai tú kama bjohó ra ko mjehe kjine ni. Nk'ie nga tís'echjáhan nichine, kama chjihí nku ni xi nkú joyaha tsa nchini kik'aihi kamaha.

11 Kikie nga tsix'á nk'a ján ko nga nibajen t'anankiu nku ni xi b'a tjín xi nkú joyaha nku najyun tjebe chánka xi tjít'a'yún nga ñjuu nkun.

12 Tjintuyá ayaha niú ngayje tíkjá chú xi b'ema ko xi b'éfe yjohó t'anankiu ko nise xi b'ematjen nk'a ján.

13 As'ai kint'é Pedro nku ntá xi b'i kitsúhu:

—Pedro, tisíntjein. N'ek'iein chú ko chinei.

14 B'i kitsú Pedro:

—Najmi, Nda Ntia. Ndahachí najmi kjee kjine ni xi tjña nkjúhun kjuatéxumoo nga kama chine, ni xi najmi je nginkun Ntjaná.

15 As'ai ta kinchja ngáha ntó niyá xi ma joho. B'i kitsú:

—Ni xi kits'in Ntjaná nga ja je nginkun, najmi tú ji 'mihí nga najmi je.

16 Jan niyá b'a kama, as'ai ngjinji ngáha niú nk'a ján.

17 Nk'ie nga tá títs'innkjink'uhun Pedro nkú tsuhu ra ni xi kama chjihí, tú tsichuhú asti ankjuo já xi kits'in nibá nda Cornelio. Kisakúhu jóo ni'yaha Simon, nda xi f'áxi tjabaxín.

18 As'ai kingjásjaiya tsa yo tjña Simon xi tá 'mi Pedro.

19 Nk'ie nga tú nku títs'innkjink'uhún Pedro ni xi kama chjihí, Espiritu Santo b'i kitsúhu:

—Chase mai. Jan já tíbangisjaihi.

20 Tisíntjein ko títjujein. Najmi tú n'ejó tak'uin nga t'inkoi, at'aha an kats'in nibá jóo.

21 As'ai tsitjujen Pedro nga j'aisehe jóo ko b'i kitsúhu:

—An xi t́binchisjó. ¿Mí xáha xi kj'úáihinu?

22 B'a incha kitsú jóo:

—Nda jun k'aku Cornelio kats'in nibáni. Benkjún Ntjaná ndo ko naxu ts'in ni xi ts'in. Nda ts'in nchjanimiyaha rá ngayjee xuta judio ndo. Nku ntítsjehe Ntjaná b'a kitsúhu nga kjuáichj'aihi nga k'úin ni'yaha ko nga kuasínñjuhu ni xi k'úihin.

23 Kits'ínkjáihin Pedro jóo ko yo incha kits'ínkja nistjen. Nistjin xi ma ndyjuun ngjiko jóo. Ta ngjiko k'ua já ninku xi tjín nanki Jope.

24 Nistjin xi ma joho tsichu nanki Cesarea. Tíkuyá Cornelio ko ta tíkuyá xuta xi kits'ínkint'é, kui xi xuta xinkjín ko xuta xi nda nchjako.

25 Nk'ie nga ja t́fas'en Pedro ayoo, Cornelio j'ai ts'ínkjáihin ko tsasinkúch'int'aha nga kits'intsjoho.

26 Tunga kikjesíntjehén rá Pedro ko b'i kitsúhu:

—Tísíntjein. Ta xutaná xi nkúhu ji.

27 T́inchjako ts'ihin nga jas'en ayoo ko kkie nga nkjin xuta kama ñjakú yo.

28 As'ai b'i kitsúhu:

—Jun yo nga nku nda xi ntje judio tjeheh rá najmi tsjántehé kjuatéxumaha tsa kama ñjako xuta xi najmi ntje judio tjeheh rá ko tsa kjuas'en ni'yaha. Tunga Ntjanáhá tsakúchjina nga najmi tjihin nga kj'uján xuta, tsa xi je ko xi najmi je xi nkú títsu kjuatéxumani.

29 Kui kjuaha nk'ie nga kichubahanú, najmi jo jan tjihinna nga kjúáisenuu. Kui b'a maha, t'inyahanú mí kjuaha nga kichubahanú.

30 As'ai b'i kitsú Cornelio:

—Ma ñju nistjin, nkú ra ma chuba jan nga ngixuun, ni'yana tinchjaka Ntjaná. Tu j'ai sinjñahá nku nda xi túb'at'ai najyun xi yja.

³¹ Kui xi b'a kitsúna: “Cornelio, Ntjaná tsasínñjuhu ni xi tsinchihí ko tibe nga tí'baihi xuta x'an ni xi machjéhen.

³² Kui nga n'ekjihini nanki Jope já xi kuinchjaha ra Simon, kui xi ta 'mi Pedro. Kui xi tíña ni'yaha Simon xi f'áxi tjabaxín, nda xi tíña andai ntáchak'uun síña ni'yaha.”

³³ Kui nga tjen'yún ngjich'ahána ji, ko nda kuan'ei nga kjúái. Kui kjuaha kabintsubahani ei ngayjei nginkun Ntjaná tu xi k'uasinñjuhu ri ngayjee én xi kitsúhi Ntjaná nga kuixinyani.

B'i ts'in y'énijmí Pedro éhen Ntjaná ni'yaha Cornelio

³⁴ As'ai b'i kitsú Pedro nga kik'aha éhen:

—Mankjinna nd'ai nga kjuaxi kjáihin nga najmi ngabi ts'in Ntjaná ajihin xuta.

³⁵ Ts'ínkjáin níhi tu má xuta naxinantáha ni xi tjin asuntee xi benkjúhun ko xi naxu ts'in nginkun.

³⁶ Ntjaná kits'ínkint'é xuta xi ntje Israel tjehen ra én nda tsuhu Jesucristo. Kui xi Nda Ntjaha ngayjee xuta ko kui xi tsjáha xuta kjuajyuhu Ntjaná.

³⁷ Yo én xi kichuba ngayjee ante Judea, b'aha ra ante Galilea nk'ie nga ja kamaha Jua nga tsaténtá ko y'énijmí éhen Ntjaná.

³⁸ Yo xi nkú ts'in Ntjaná kits'in nibájen Espiritu Santo nga j'aitsejihin ra Jesu, nda xi nibáha nanki Nazaret, ko kitsjáha nga'yún. Kui xi kikjatsú'ba nga kits'in ni xi nda ko kits'ínkíhi ngayjee xi tjintujihin jánindo. Ntjaná kits'ínxájihin Jesu.

39 'Jin kiyai ko bixíyai ngayjee ni xi kits'in Jesu ante Judea ko nanki Jerusalem. Kis'et'a kruu nga kin'ek'ien.

40 Tunga Ntíanáhá kits'ínkj'áíya ngáha ra ngabayoo nistjin xi ma jahan ko tsakúchjini.

41 Najmi ngayjee xuta tsakúchjihí yjoho, tu nkuhú jin xi j'ájin títjunni Ntíaná nga kuixínyai xuta xingisoo. Jin kichinekoí ko ki'yukoí nk'ie nga ja j'áíya ngáha ra ngabayoo.

42 'Y'exáni nga tjíhin nga k'úénijmíhí xuta ko kuixínyai nga Ntíaná kitsjá xáha nga kui kuasehe ni xi nda ko ni xi najmi nda kits'in xuta xi tjíntu tik'un ko xi k'ien.

43 Ngayjee já profeta kinchjanijmíyaha Jesu. B'a incha kitsú nga ngat'aha Jesu kama ndyjat'aha ra jéhe ngayjee xuta xi s'ejihin.

B'i ts'in kits'ínkjáihín Espiritu Santo xuta xi najmi ntje judío tjeheh ra

44 Nk'ie nga ta tínchjaha Pedro, tu nibajennehé ra Espiritu Santo ngayjee xuta xi tíncha basínñjuhu én xi tínchja.

45 Kama nkjúhun já nínku xi ntje judío tjeheh ra xi tjenko Pedro nk'ie nga kíkíe nga Ntíaná kitsjáha Espiritu Santo xuta xi najmi judío.

46 At'aha kint'é nga kj'ai kj'ai én kinchja xuta ko nga kits'ínkie yjoho nga Ntíaná xi tjihín kjuachánka. As'ai b'i kitsú Pedro:

47 —¿A tjin xi najmi tsjante nga saténtá xuta xu'bi xi ja kuats'ínkjáihín Espiritu Santo xi nkúhu ñá?

48 B'a kitsú Pedro nga saténtá xuto at'aha ja kis'ejihin Jesucristo. Ja kadoo, tsinchihí Pedro nga k'úéñña sa yo.

11

Pedro b'i ts'in kitsúyaha xuta ninku Jerusalen ni xi kama ni'yaha Corneliu

¹ Kint'é já postru ko já nts'eé xi tjín ante Judea nga xuta xi najmi ntje judio tjehen ra ta kits'ínkjáihin éhen Ntíaná.

² Nk'ie nga j'ai ngáha Pedro nanki Jerusalen, y'ésikoho já judio xi tíncha tsu nga tjihin nga n'e ni circuncision xi nkú nga títsu kjuatéxumoo. B'i kik'ihin:

³ —¿Á ji tsitjas'ehenni ni'yaha ko kichinekohoni já xi najmi kin'ehe ra ni circuncision?

⁴ As'ai kik'atuts'ihin Pedro nga kitsúya chich'in ngayjee ni xi kamo. B'i kitsú:

⁵ —Nk'ie nga tinchjaka Ntíaná nanki Jope, kama chjina nku ni xi nkúhu tsa nchini kik'aina. Kikie nku ni xi b'a tjín xi nkú joyaha nku najyun tjebe chánka xi tít'a'yún nga ñjuu nkun. Nibajehen nk'a ján ko j'aijén santaha má tíjña.

⁶ Nk'ie nga tsase nda nda mí nihi xi tinchaha, kikie chu xi b'ema, chu xi tjín ngijño, xi b'éfe yjoho t'anankiu ko nise xi b'ematjen nk'a ján.

⁷ As'ai kint'e nku nta xi b'i kitsúna: “Pedro, tisintjein. N'ek'iein chu ko chinei.”

⁸ B'a kixian: “Najmi, Nda Ntia. Ndahachí najmi kjee kjié ni xi tíjña nkjúhun kjuatéxumoo nga kama chine, ni xi najmi je nginkun Ntíaná.”

⁹ As'ai ta kinchjakohó ngáhana nta xi nibaha nk'a ján niyá xi ma joho. “Ni xi kits'in Ntíaná nga ja je nginkun, najmi tu ji 'mihí nga najmi je nginkun”, kitsúna.

10 Jan niyá b'a kama, as'ai ngjinji ngáha nk'a ján ngayjee niu.

11 'Ta kuihi chubo tsichu ni'ya xi má nga tíjña jan já xi nibaha Cesarea nga j'aikj'ána.

12 B'a kitsúna Espiritu nga najmi jo jan kamana nga kfínka jóo. Ta ngjikona já nts'eé xi jun xu'bi ko tsitjas'ein ni'yaha ndo.

13 As'ai kitsúyani xi nkú ts'in kieke nku ntítsje aya ni'yaha nga j'ai sinjñat'aha ko b'a kitsúhu: "N'ekjí naki Jope já xi kuinchjaha Simon, kui xi ta 'mi Pedro.

14 Kui xi kuinchjakohi. Én xi kuitsuhi, kui xi ts'íink'ankihi ko ngayjee xuta xi ts'i."

15 'Nk'ie nga kik'atuts'ihin nga kinchja, Espiritu Santo nibajennehe xuta xu'bo xi nkú ts'in nibajennená nga tjuhun.

16 As'ai jáítsjena ni xi kitsúná Nda Ntjaná: "Ntánijua tsaténtáha Jua tunga máha jun, Espiritu Santo saténtáhanu."

17 Kui b'a maha, tsa Ntjaná ta títsjáha ra xuta xu'bo ta kui nihi xi kitsjáná xi s'ejinná Nda Ntjaná Jesucristo, ýáha an tsa k'uechjáha ra Ntjaná?

18 Nk'ie nga kint'é jóo ni xi kitsú Pedro, najmi ta ngji kontraha ra. Tu sahá kits'intsjoho Ntjaná. B'i incha kitsú:

—A xúhu ta kohó xuta xi najmi ntje Israel tjeheh ra kitsjáha Ntjaná nga ngjuaikj'áha ra animaha tu xi kama k'úentu tik'un síhin.

B'i kama nga kis'enijmí éhen Ntjaná nanki Antioquia

19 Nk'ie nga kin'ek'ien Esteban, ta kin'e uncha xuta ninku xi k'oo. Xi kindzjoya incha tsichu santaha ante Fenicia, xjo Chipre ko nanki Antiokia. Tu nkuhú xuta xi ntje judio tjehen ra y'énijmíhi éhen Ntíaná.

20 Tunga kis'ehé ajihin jóo k'ua já xi nibáha xjo Chipre ko já xi nibáha ante Cirene xi incha tsichu nanki Antiokia ko kinchjako xuta xi najmi ntje judio tjehen ra, xi nchja én griego. Y'énijmíhi xuto én nda tsuhu Nda Ntíaná Jesu.

21 Nga'yúhun Ntíaná tsasinkohó ko nkjin kama xi kis'ejihin ko kits'ínkjáihin Nda Ntíaná.

22 As'ai kint'é xuta ninku xi tjín nanki Jerusalem ni xu'bi. Kui nga kits'ínkjahi Bernabe nanki Antiokia.

23 Nk'ie nga tsichu Bernabe yo, kikie xi nkú ts'in Ntíaná títsjáha kjuandaha xuta xi tjín yo ko kama tsjohó. B'a kitsúhu ngayjee xuta nga ngayjehe k'un kas'ejin tehentehe Ntíaná.

24 B'a ts'in kinchja Bernabe at'aha nda animaha. Kitsejihin ra Espiritu Santo ko 'yún s'ejihin Ntíaná. Nkjin nkjún sa xuta kis'ejihin Nda Ntíaná yo.

25 As'ai ngji Bernabe nanki Tarso nga ngjingsjái Saulo.

26 Nk'ie nga kisakúhu, j'aiko Antiokia. Yo y'entujihin xuta ninku nku nú tjihin ko incha tsakúyaha nkjin nkjún xuta. Xuta ni'yakuyáha Jesu xi kis'e Antiokia, kui xi tjun kik'in xuta cristiano.

27 As'ai tsitju nanki Jerusalem k'ua já profeta nga ngji nanki Antiokia.

28 Nku ndo xi 'mi Agabo tsasinjña nk'ie nga Espiritu kits'ínkinchjaha ko kitsúya nga kjintía s'e

ngayjēe asuntee. B'a kama nk'ie nga tjihin xá nda títjun Romá xi 'mí Claudio.

²⁹ Nk'ie nga kiyahá nga b'a kama, as'ai y'éndako xinkjín xutá ni'yakuyáha Jesu xi tjin nanki Antiokia xi má nga tsjá nga nkúnkú ni xi tjihin xi nkú ts'in behe k'un, tu xi kuasinkoho já nts'eé xi tjin ante Judea.

³⁰ B'a incha kits'in ko kits'ínki Bernabe ko Saulo nga kui xi ts'ínkjas'ehen toon chje jácháha xutá ninku.

12

B'i ts'in kin'ek'ien Santiago ko b'i ts'in kin'ekjas'en nubayá Pedro

¹ Kui nistjin xu'bo nda rej Herode Agripa jak'ánijé k'ua xutá ninku tu xi kits'in'uhun ra.

² B'a kitsú nga kicha n'ek'iehen Santiago nda nts'e Jua.

³ Nk'ie nga kieke nga tsjo kamaha já judio ni xi kits'in, ta jak'ánijé Pedro. S'í Pascua b'a kamo, nistjin nga chine ninkuan xi najmi tjihin na'yu san.

⁴ Nk'ie nga jak'ánijé Pedro, kits'ínkjas'en nubayá má nga ñju tjihin kits'ínka xinkjín já jun xi kúnntaha. At'aha mjehe Herode ts'ínkokjua Pedro nginkun xutá nk'ie nga k'ua s'iu.

⁵ Kui nga kichunntaha Pedro nga kiyaha nubayó, tunga 'yuhún kinchako Ntiana xutá ninku nga tbankintjái Pedro.

B'i ts'in tsitju nubayó Pedro

⁶ Ni xi kama nku nistjen kintehe ni nga ts'ínkokjua Herode Pedro nginkun xutá, kjife

Pedro nga kjiñña masehen jo já jun. Jo n'úkicha tjíkjáha. Ko kj'ai já jun xi tíncha kunntá ankjua nubayóo.

⁷ As'ai tu nkuhú ntítsjehe Ntíaná j'ai sinjña yo ko kama ndzjen aya nubayóo. Kits'ínko tjiaha Pedro nga kits'ínkj'áha ko b'i kitsúhu:

—Kítsa tísintjein.

As'ai tsixuntu n'úkicha xi tjíkjá ntsja Pedro.

⁸ B'i kitsú ya ntítsjee:

—T'e'yúnkjái tjabaxín ndayáhi ko tjayai tjabaxín ntéhi.

As'ai b'a kits'in Pedro. B'i kitsú yaha:

—Tjasuntjai najyun ndjuhi ko tsjénkiní.

⁹ As'ai kitsjennkíhi Pedro ntítsjee nga ndaha najmi be tsa kjuaxi a ra najmi kjuaxi ni xi tít'sín ntítsjee. B'a kamaha xi nkúhu tsa chíni tí'baihi.

¹⁰ Incha j'a má tjíntu já jun xi tjun tíncha kunntá yo ko ta j'a xi ma johó. Incha tsichu ankjua kicha xi tjen niyáté xi fi ajin nantio. Tsix'á suba ankjuo. Nk'ie nga incha tsitju ko j'a nku niyáté tjíhin, tjen'yún kindyjahá ntítsjee nga ngji t'axíhin Pedro.

¹¹ As'ai kamankjihin Pedro xi nkúhu tsa j'a ngáha ra ko b'a kitsú:

—Kjuaxi nga Ntíaná kuats'in nibá ntítsjehe. K'uakasje'ana aya ntsja Herode Agripa ko ngayjee ni xi tókuyáha xuta judio.

¹² Nk'ie nga ja kamankjihin ni xi kamoó, as'ai ngji ni'yaha Maria naaha Jua xi ta 'mi ya Marco, má kama ñjakú nkjin xuta nga tínchjako Ntíaná.

¹³ Kits'ínkjane Pedro ankjuo ko takjín xi 'mi Rode j'aisehe.

14 Nk'ie nga kint'é takjiun ntaha Pedro, 'yún kama tsjohō kō tsangatsanka nga ngji tsúyaha xuta xingisoo nga asti ankjuo síña Pedro. Ta ndaha najmi kikjex'á ankjuo.

15 —¿A tíma luku ní? —kik'ihin.

Tunga b'ahá kitsú takjiun nga kjuaxi niu.

—Kutsa ntítsjehe ní Pedro niu —kitsú jóo.

16 Máha Pedro, tu nku títs'ínkjanehé ankjuo. Nk'ie nga kikjex'á ankjuo jóo kō kieke nga Pedro niu, tu ni xí kitsankjúhún.

17 Tunga kits'ínk'ajnihí ntsja Pedro nga b'a kitsú nga najmi kuinchja jóo. Kitsúyaha xi nkú ts'in Ntíaná kik'onsjehe aya nubayóo kō b'a kitsúhu jóo:

—T'inyohoo Santiago kō já nts'eé ni xi kamo.

As'ai tsitju nga ngji t'axín.

18 Nk'ie nga kama seen, ndaha najmi be nkú ts'ín já juun, at'aha najmi be má kafihí Pedro.

19 Kitsjá kjuá Herode Antipa nga kuinchísjai, tunga najmi kisakúhú rá. Kui nga kits'ínkokuaha já jun xi tíincha kunntá nubayóo kō b'a kitsú nga n'ek'ien. Kui nistjiun tsitju Herode Agripa ante Judea nga ngjik'iejña nanki Cesarea.

B'i ts'in k'ien Herode Agripa

20 Herode Agripa tíñachánko xuta nanki Tiro kō xuta nanki Sidon. As'ai nkuhú kits'in yjohō xuta xu'bo nga j'aisehe Herode. Títjun nda kinchjako nda Blastō, kui xi nku nda k'aku ajihin já xi ts'ínxát'aha nda rej. Askahan kinchjako nda rej nga tsankihí kjuajyu, at'aha xuta nankihí jóo nankihí nda rej b'atse nichine.

21 Nistjin xi kitsú Herode nga kuinchjanijmíko jóo, kingja najyun tsjo tjihin ko y'ejña ante má nga ts'in kjuá ko kinchjaya.

22 As'ai b'i kitsú xuta nga incha kikjintáya:

—Najmi nda xi tinchjai. Ntiahá niu.

23 Ta kuihi chubo nku ntítsjehe Ntíaná kitsjá ch'ihin Herode, at'aha najmi tjun y'ejña Ntíaná tsa kits'inkie yjoho nga Ntíanáhá xi chánka. Chjuntu kikjinehe ko k'ien.

24 Tunga ngjindjuhú éhen Ntíaná ko kis'enijmí tu má xi tje'hén ni.

25 Bernabe ko Saulo, nk'ie nga kama ndjuúhu xá xi kik'aihi nanki Jerusalen, kik'óya ngáha nga ngjiko Jua xi ta 'mi Marco.

13

B'i ts'in kik'ai xáha Bernabe ko Saulo

1 Ajihin xuta ninku nanki Antiokia y'entu Bernabe, Simon xi ta 'mi Nda Jma, Lucio xi nibáha ante Cirene, Manaen xi kama cháko Herode Antipa xi tsatéxuma ante Galilea, ko Saulo. Kui jái xi já profeta ko já maestru.

2 Nk'ie nga kama ñjakú nga tijncha ts'intsjoho Ntíaná ko nga tjintu kjintía, as'ai Espiritu Santo b'i kitsúhu:

—N'e t'axinnú Bernabe ko Saulo tu xi ts'ihin xá xi tsjaá.

3 Y'entu kjintía xuta ninku, kinchjako Ntíaná ko kingjénne ntsja Bernabe ko Saulo. As'ai kits'inkji.

B'i ts'in y'énimí éhen Ntíaná Saulo ko Bernabe xjo Chipre

⁴ Kui b'a maha, nk'ie nga kits'ínkjihi ra Espiritu Santo jóo, incha ngji nanki Seleucia ko yo jas'en nku tsutsu xi ngjikoho xjo Chipre.

⁵ Nk'ie nga tsichu nanki Salamina, y'énjimi éhen Ntjaná ni'ya sinagogaha xuta judio xi tjin yo. Ta incha tjenko ya Jua nga tibasinkoho.

⁶ As'ai incha j'atikjá ngayjee xjo Chipre ko tsichu nanki Pafó. Yo kisatéjin nku ndatj'e judio xi 'mi Barjesu. Nku nda profeta kits'ín ma yjoho

⁷ ko tjenko nda titjuhun Chipre. Nku nda kitikjua xi 'mi Sergio Paulo nda titjuun. As'ai kinchjaha Bernabe ko Saulo, at'aha mjehe kuasinñjuhu éhen Ntjaná.

⁸ Tunga ndatj'ee, xi ta Elima 'mi ya nga én griego, ngji kontraha Bernabe ko Saulo. Y'éch'oho nda titjuun tu xi najmi s'ejihin ra yaha Jesu.

⁹ As'ai j'aitsejihin ra Espiritu Santo Saulo, xi ta 'mi ya Pablo. Tsase'a ndatj'ee

¹⁰ ko b'i kitsú:

—ji xi tu nku ch'anachaha ri xuta ko 'yún ch'onk'uin! ji xi ntíhi ndanindoo, at'aha b'a t'n'ei xi nkú ts'ín! ji xi tinchun kontraihi ngayjee ni xi naxu nginkun Ntjaná! ¿A tu nku n'etsitinni ni xi nda tjihin Ntjaná?

¹¹ Nd'ai ngjuai kontrahi nga'yuhun Ntjaná. Kama kai. Chuba nistjin najmi ta chahani ts'íu.

Ta kuihi chubó tjen'yún najmi ta kama chjihí ra ndatj'ee. Kama jyuhun ko chuba kikjatsú'bahá nga tsangisjai nku xi kjébenkihi.

¹² Nk'ie nga kkie nda titjuun ni xi kamo, kama nkjühun ni xi tsakúya Pablo nga yaha Nda Ntjaná Jesu ko kis'ejihin Jesu.

B'í ts'ín y'énijmí Pabló éhen Ntíaná ante Pisidiá

¹³ As'ai Pabló kó já xi tǵenko jas'en nku tsutsu. Tsitju nanki Pafó kó tsichu Perge, nanki xi tíñajihín ante Panfilía. Yo y'éjña Jua jóo kó kik'óya ngáha nanki Jerusalen.

¹⁴ Pabló kó já xingisoo tsitju nanki Perge kó ngji nanki Antiokía, nanki xi tíñajihín ante Pisidiá. Nku xuatu jas'en ni'ya sinagoga xi síjña yo kó y'entu.

¹⁵ Nk'ie nga kin'eya xujun kjuatéxumoo kó xujun já profeta, b'í kitsú já k'akuhú xutá ni'ya sinagoga nga kinchja:

—Jun já nts'e, tsa tǵinnu é n xi k'úénijmíhuu xutá, chubo nd'ai.

¹⁶ As'ai tsisintjen Pabló. Kingjénnk'a ntsja tú xi kuasínñjuhu xutá kó b'í kitsú:

—Jun xi ntje Israel tǵehennu kó jun xi namí ntje Israel tǵehennu xi yankjún Ntíaná, tasínñjunú.

¹⁷ Ntíaha xutá Israel, kui xi j'ájihín ntje cháná kó nku naxinantá chánka kits'ín ma nk'ie nga tǵintu sa ante Egipto, má nga y'entut'á x'an. Askahan nga'yúhun kik'onsjekoho ntje cháná ante Egipto.

¹⁸ Kits'íntsentaha ante kixiú nkú rá ma yachán nú.

¹⁹ Kits'ínkje yatu nanki i xi tǵín ante Canaan kó kitsjáha ntje cháná antehé tú xi kama ts'ehe.

²⁰ Askahan, nkú rá ma tsa ñju unchan kó cháte nú, Ntíaná kitsjá xáha já jue tú xi kuatéxumaha rá naxinantáná santaha nga tsichu nǵstjihín nda profeta Samuel.

²¹ As'ai tsanki naxinantáná nga nku nda rej kuatéxumaha. B'a ts'ín Ntíaná kitsjáha rá nku nda

rej. Yachán nú tǵhín tsatéxuma Saul xi ntíhǵ Cis xi y'ahǵ rá ntjehǵ Benjamin.

22 'Askahan Ntǵianá kikje'áhǵ xóǵ Saul kǵ David kits'in ma ndǵ reihǵ xuta. Kitsúya Ntǵianá yáha David: “Kuasakúna David ntíhǵ Isai. Kui xi nku ndǵ xi tsjo mahǵ anǵmana, xi ts'íntjusunye xi nkú nga ts'in mjena.”

23 Ntjehǵ David nibaha ndǵ xi kitsúya tǵtjun Ntǵianá nga ts'ín nibásehe xuta Israel tu xi ts'ínk'ankihi. Kui ndǵ xi Jesu.

24 Kintehe ni nga j'ai Jesu, Jua y'énijmíhǵ ngayjee xuta Israel. B'a kitsúhu nga tǵhín nga ngjuǵaik'áhǵ rá anǵmahǵ kǵ saténtǵ.

25 Nk'ie nga ja tǵbichúket'a xáha Jua, b'a kitsú: “¿Yá xi tǵbixíun nga an? Najmi an ndǵ xi tǵchuyóhoǵ. Askahan nibá nku xi 'yún nk'a tǵen sa nga an, nga santaha najmi an tsuhuna tsa an kjendáya n'úhu ntéhe.”

26 'Jun já nts'e, jun xi ntjehǵ Abraham kǵ jun xi najmi Israel tǵhennuǵ xi yankjún Ntǵianá, ñá kin'e nibáná én xu'bjǵ xi ts'ínk'ankiná.

27 At'ahǵ xuta Jerusalen kǵ já tǵxáhǵ najmi kamankjihǵn yáha Jesu kǵ tǵ ndaha ni xi tǵt'a xujuhǵn já profeta xi n'eya xkǵ xuatu. Incha kitsú nga ngabaya tǵhen rá Jesu. B'a ts'in incha kits'íntjusun ni xi y'é't'a já profeta.

28 Ndaha tsa najmi kisakújihǵn mí kǵuaha nga kama n'ek'iehen, tunga tsinchihǵ rá Pilato nga n'ek'ien Jesu.

29 'Nk'ie nga ja kits'íntjusun jóǵ ngayjee ni xi tǵt'a xujun éhen Ntǵianá má nga tǵnchǵanjmíyaha Jesu, as'ai kikjejent'a kruu kǵ kingjǵyanji.

³⁰ Tunga Ntjanáhá kits'ínkj'áíya ngáha ra ngabayoo.

³¹ Jesu nkjin nistjin tsakúchjiji yjoho já xi tsitjukoho ante Galilea nga ngjikoho nanki Jerusalen. Nd'ai kui já xu'bo xi tíncha tsuyaha xuta ni xi incha kieke.

³² Jin ta tibixínyai én nda tsu xu'bi xi tínchja ni xi Ntjaná kitsúya tíjuhun ntje cháná nga tsjáha.

³³ Kui niu xi ja kits'intjusun Ntjaná ngandaná ñá xi y'ahaná ntjehe ntje cháná, nk'ie nga kits'ínkj'áíyaha Jesu ngabayoo. Xi nkú ts'in tjit'a xujun salmo xki jo: “Ji xi Ntina, an xi tsichu ma Na'mihi.”

³⁴ Ntjaná kits'ínkj'áíya ngáha ra Jesu ngabayoo tu xi najmi ta kuatsúhun yjonintehe. At'aha b'a kitsú: “Tsjanuu kjuandana xi kixihin David.”

³⁵ 'Kui nga b'a ta ts'in tjit'a yaha kj'ai salmo: “Najmi k'uaínteí nga kuatsún yjonintehe nda xi ts'i.”

³⁶ David, nistjin nga y'ejña kits'in ni xi mjehe Ntjaná, as'ai k'ien. Kama ñjakúko xi cháha ko jentu yjonintehe.

³⁷ Tunga máha nda xi Ntjaná kits'ínkj'áíya ngáha ra ngabayoo, kui xi najmi jentu yjonintehe.

³⁸ 'Kui b'a maha, jun já nts'e, tjihin nga cháhanu ni xu'bi. Jesu kits'in nga kama ndyjat'aha xuta jéhe. Kui nihi xi tib'enijmí nd'ai.

³⁹ Kjuatéxumaha Moise najmi kamaha kits'in ndainuu ngayjee jé xi tjinuu nginkun Ntjaná, tunga Jesu ts'in ndaíhi jéhe ngayjee xuta xi s'ejihin.

⁴⁰ 'Kui nga chúhun ruu yjonuu nga najmi tu jun nibanenuu ni xi y'ét'a já profeta. At'aha b'i ts'in tjit'a xujun éhen Ntjaná:

41 Chasoo, jun xi chajnucho xuta xingisoo,
katuma nkjunnuu ko kandyjajihinsón.
At'aha an ts'ian nku ni nistjin nga tintsuoo,
nku ni xi najmi s'ejinnuu ndaha tsa tjin xi
kuitsuyanuu.

42 As'ai tsitju ni'ya sinagoga Pablo ko já xi tjenko.
Xuta xi tjin yo incha tsanki nga k'úinya saha ni
xu'bi xuatu xinkuu.

43 Nk'ie nga tsitju xuto, nkjin xuta judio ko xi
najmi judio xi benkjún Ntíaná kitsjennkíhi Pablo
ko Bernabe. Kui b'a kitsúhu xuto nga tihin nga
k'úentujin kjuandaha Ntíaná.

44 Xuatu xinkuu xi mjehé kama ñjakúyjee xuta xi
tjin yo tu xi kuasínñjuhu ra éhen Ntíaná.

45 Tunga nk'ie nga incha kikie já judio xuta
nkjin, 'yún kama nchini. Ngji kontraha ni xi
tib'énimí Pablo ko ch'on kitsúhu.

46 As'ai 'yún ndjá kinchja sa Pablo ko Bernabe.
B'i incha kitsú:

—Kamachjéhen nk'ie nga jun títjun kis'enijmínuu
éhen Ntíaná, tunga najmi tín'ekjáihín ruu éen.
B'a ts'in tibakuchjihinu nga najmi tjeheennuu nga
kuintsuba tik'un síún. Kui kjuaha nga tu sahá xuta
xi tjin asuntee kuankínk'ienijmíhi ri nd'ai.

47 At'aha b'i kitsúni Ntíaná nga y'éxáni:

Ji xi nkú joyaha nku nd'i
xi tsjaha xuta xi tjin asuntee,
tu xi k'úinkohoni én xi ts'ínk'ankihí xuta
santaha má fekuhu asuntee.

48 Nk'ie nga kint'é én xu'bi xuta xi najmi ntje
judio tjehehen ra, kama tsjoho ko b'a incha kitsú
nga tihin kjuachánka éhen Ntíaná. Kis'ejihin ni xi

y'énijmí Pabło ngayjee xuta xi ja j'ájin Ntíaná nga tjihin nga k'úentu tík'un sín.

⁴⁹ Ngjindju éhen Ntíaná nga kis'enijmí ngayjee ante xu'bo.

⁵⁰ Tunga já judiohó tsinchá'a jminchjín xi benkjún Ntíaná kō xi nda behe xuta, kō tā tsinchá'a já k'akuhū nankiu xi má nga tsinchákjahan. Kitsjennkí unkie Pabło kō Bernabe kō kik'onsje nankihj.

⁵¹ As'ai y'étsujne ndyjo tsuku Pabło kō Bernabe tu xi tsakúchjhi nga najmi kui xi tjihin jé. As'ai incha ngji nanki Iconio.

⁵² Xuta xi yjankihj Jesu xi y'entu Antiokia, nanki xi tíñajihin Panfilia, kis'e nkjúhun kjuatsjo kō kitsejihin ra Espiritu Santo.

14

B'i ts'in ja ma kis'ehé ra ndjio Pabło kō Bernabe nanki Iconio

¹ Nk'ie nga jas'en Pabło kō Bernabe ni'ya sinagogahā xuta judio xi tjin nanki Iconio, incha y'énijmí éhen Ntíaná nga ixí nkjihín xuta judio kō xi najmi judio kis'ejihin ni xi tíncha b'énijmí.

² Tunga já judio xi najmi s'ejihin yáha Jesu tsinchákjahan xuta xi najmi judio xi má nga ch'on ts'in kuasehe já nts'eé.

³ Nkjin nistjin ts'andayahā Pabło kō Bernabe yo. Incha behe k'un nga Nda Ntíaná Jesu tibasinkohō kō ndjá kinchjanijmíyaha kjuandahā Nda Ntíaná. Kin'echjén jóo nga kits'in kjuankjún kō kama ni xi tsakúchji nga kjuaxi én xi tinchja.

4 As'ai tsakjánya yjohō xuta nantio. Tjín xi kamako xuta judio ko tjín xi kamako já postru.

5 Já nankiu ko já judio y'éndako já tjíxóo tu xi ts'ín'uhun ra ko k'uéhe ra ndjio já postru.

6 Nk'ie nga kint'é já postru niu, Listra ko Derbe incha tsanka, nanki xi tjíntujíhin ante Licaonia. Ko ngji ya ante xi tjíndai yo

7 má nga ta incha y'énjímí én nda tsuhu Jesu.

B'i kama nanki Listra nk'ie nga ntia t'n'e ma Pablo ko Bernabe

8 Listra y'ejña nku nda nima xi tu b'a ts'in najmi mahá fi nkúhu nga kitsin. Kui xi y'ejña

9 nga tsasínñjuhu ni xi tínchja Pablo. As'ai Pablo tsase'a ndo ko kieke nga s'ejihin xi má nga kamanda.

10 As'ai b'i kitsúhu nga 'yún kinchja:

—Tisijnña kixi.

As'ai ixí kikjennk'áhá ndo ko kikjatsú'ba.

11 Nk'ie nga kieke xuto ni xi kits'in Pablo, b'i incha kitsú nga incha kikjintáya nga én Licaonia:

—Ja kaf'aiejnjinná jo ntia. Yjonintehe xuta incha kab'a.

12 B'a incha kitsú nga Bernabe xi ntia Zeus ko nga Pablo xi ntia Hermes, at'aha Pablo xi tínchja.

13 As'ai nda na'mi xi ts'inxáha ntia Zeus j'aiko turu ko naxú tsjo k'un ankjuaha nankiu, má nga síjña ninkuhu ntia Zeus. Nda na'miu ko xuta nantio incha mjehe tsjáha chje já postru.

14 Tunga nk'ie nga kamankjihin Bernabe ko Pablo ni xi tímoo, kikjentiyajen najyuhun ko kitsa ngjihin xuta nantio nga incha kikjintáya nga

15 b'i incha kitsú:

—Jun já, ¿á b'a t́n'ehenu? Ta xuta ní xi nkúhu jun. Tíb'enijmí ajinnu nga t́hin nga k'úentu ni xu'bi xi najmi chumi ni chj́hi ra ko n'ekj́hon Ntia xi t́ña t́k'un. Kui xi kits'innda nk'a ján, t'ananki, ntáchak'uun ko ngayjee ni xi t́hin.

16 Nistjin nk'ie kitsj́ante Ntíaná nga xuta xi t́in asuntee ts'ín sin chá xi be.

17 Tunga tu nkú kitsj́há ra xuta ni xi nda tu xi tsakúchj́hi yjoh. At'aha kui xi ts'in nibáná ts'í ko tsjáná chan xi nda. Tsjáná nichine ko ts'íntsehe animaná kjuatsjo.

18 B'a kitsú Pablo ko Bernabe. As'ai tu ni xí kis'enkihí ra kjuanima nga k'uéch'oho xuta ngat'aha chje xi mjehe tsjá.

19 As'ai já judio xi nibaha nanki Antiokia ko nanki Iconio j'ainchá'a xuta nkjiun. Incha y'éhe ndjio Pablo ko kikjebéfehe natsin nantio. Ja ka'me incha kitsú.

20 Tunga nk'iehé nga kama ñjakúndaihi Pablo xuta xi yjankihí Jesu, tsisintjen Pablo ko jas'en ajin nantio. Nistjin xi ma ndyjuun ngjiko Bernabe nanki Derbe.

21 Y'énijmí Pablo ko Bernabe én nda tsuhu Jesu nanki Derbe ko nkjin nkjún xuta xi t́in yo kit-sjennkihí Jesu. As'ai kik'óya ngáha jóo nanki Listra, Iconio ko Antiokia.

22 Nk'ie nga incha j'a yo, b'a incha kitsúhu xuta ni'yakuyóo nga t́hin nga k'úentujín tehente ni xi s'ejihin. B'í kitsú yaha:

—Nkjin t́kjá kjuanima bitjajiáán tu xi bitjas'enjihinná nga Ntíaná xi batéxumaná.

23 Xki ninku xi t́in nanki xu'bo incha kinchjako Ntíaná ko y'entu kjintía, as'ai y'ét'a xá já xi

kuasehe ninku. Kits'inkjas'en jóo aya ntsja Ntíaná at'ahá kis'ejihin Ntíaná.

B'i ts'in incha j'ai ngáha Pablo ko Bernabe nanki Antiokia xi tijnajihin ante Siria

²⁴ As'ai incha j'a Pablo ko Bernabe nanki xi tjin ante Pisidia ko incha j'ai ante Panfilia.

²⁵ Nk'ie nga ja y'énimí éhen Ntíaná nanki Perge, incha ngji nanki Atalia.

²⁶ Yo jas'en nku tsutsu xi ngjikohó nanki Antiokia, yo má nga kin'ekjas'en aya ntsja Ntíaná nga tjuhun ni tu xi kuasinkohó rá xá xi ts'in. J'ai yo at'ahá ja kama ndjuú xóo.

²⁷ Nk'ie nga j'ai nanki Antiokia, kinchja ñjakúhu xuta ninku ko kitsúyaha ngayjee ni xi kits'inkohó Ntíaná ko xi nkú ts'in Ntíaná kitsjantehe xuta xi najmi ntje judio tjehen rá xi má nga ko kui s'ejihin éhen Ntíaná.

²⁸ Nkjin nistjin ts'andayaha Pablo ko Bernabe yo nga y'entujihin xuta xi yjankihí Jesu.

15

B'i ts'in y'enda já postru ko jácháha ninku kjuasti xi tjun kisakú

¹ As'ai tsichu nanki Antiokia k'ua já xi nibaha ante Judea. Kui xi b'i ts'in tsakúyaha xuta ninku:

—Tsa najmi n'enuu ni circuncision xi nkú ts'in tijná sin chá xi y'ét'aná Moise, najmi kama k'uanuiu.

² Kui nga Pablo ko Bernabe y'ésikoho jóo. 'Yún kinchjanijmíyakoho jóo niu. Kui nga b'a ts'in incha y'endakoho xinkjin xuta ninku nga Pablo ko Bernabe ko k'ua já ninku nanki Antiokia incha ngjuai

nanki Jerusalen xi má nga kuinchjanijmíyako_{ho} já postru ko jácháha ninku nanki Jerusalen kjuasti xu'bi.

³ As'ai tsitju já xi kits'ínkji xuta ninku. Incha j'a ante Fenicia ko ante Samaria nga tíncha tsuya xi nkú ts'in kits'ínk'óntjaiya yjoh_o ko kis'ejihin Ntíaná xuta xi najmi ntje judio tjehe_n ra. Ngayjee já nts'eé tu xí tsjohó kamaha nga kint'é é_n xu'bi.

⁴ Nk'ie nga incha j'ai nanki Jerusalen, xuta ninku, já postru ko jácháha ninku kits'ínkjáíh_{in}. As'ai kitsúya jóo ngayjee ni xi kits'ínk_oho Ntíaná.

⁵ Tunga tsisintjehén k'ua já fariseo xi ja kis'ejihin Jesu ko b'i incha kitsú:

—Xuta xi najmi ntje judio tjehe_n ra tjíhin nga n'ehe ni circuncision ko tjíhin nga s'enijmíhi nga ts'íntjusun kjuatéxumaha Moise.

⁶ As'ai kama ñjakú já postru ko jácháha ninku nga kinchjanijmíyako_{ho} xinkjín ni xu'bi.

⁷ Nk'ie nga ja 'yún tse kinchjanijmíyaha niu, as'ai tsisintjen Pedro ko b'i kitsú:

—Jun já nts'e, ja yo nga nd'ai j'ájihinna Ntíaná ajinnuu xi má nga an xínyaha xuta xi najmi ntje judio tjehe_n ra é_n nda tsuhu Jesu tu xi s'ejihin ra.

⁸ Ntíaná be animaha ngayjee xuta ko kui tsakúchji nga ta kits'ínkjáíh_{in} xuta xu'bo nk'ie nga kitsjáha Espiritu Santo xi nkú ts'in kitsjáná.

⁹ Najmi ngabi kits'in Ntíaná ajihin xuta xu'bo ko ajinná. Tu sahá ta kits'in je animaha tu ngat'aha nga kis'ejihin Jesu.

¹⁰ 'Kui b'a maha nd'ai, ¿á títbankín kontra_{ha} ruu Ntíaná nga mjehenuu n'ek'anjihinu xuta xi s'ejihin ra Jesu ch'á xi najmi tsichukjuaha ra ntje

cháná kō xi tā ndaha ñá najmi chúkjuaná nga ch'anjiá?

11 S'ejin níná nga k'uankiá tu ngat'aha kjuandaha Nda Ntíaná Jesu xi nkú kō tā ts'in k'uanki xutá xu'bo.

12 As'ai kindyjanta ngayjee xutá kō tsasínñjuhu ni xi kitsú Bernabe kō Pablo, xi nkú ts'in Ntíaná kitsjáha nga'yún nga kits'in ajihin xutá xi najmi ntje judio tjeheñ rā kjuankjún kō ni xi tsakúchji kjuachánkahā Ntíaná.

13 Nk'ie nga ja kamaha nga incha kinchja Bernabe kō Pablo, b'i kitsú Santiago nga kinchja:

—Jun já nts'e, tasinñjunú.

14 Ja kuatsúyaná Simon xi nkú ts'in Ntíaná kik'atuts'ihin rā nga kama nimaha xutá xi najmi ntje Israel tjeheñ rā kō j'ájin ajihin xutá xu'bo nku naxinantá xi tā kama ts'e.

15 Tā kui nij xi kitsú já profeta má nga b'i ts'in y'ét'a:

16 Askahan kjúái ngáhana

kō ts'inndáya ngáhana ni'yaha David xi ja tsijneya. Ts'inndáya ni xi tsatsuun kō kjesintjen ngáhana,

17 tu xi xutá xingisoo kuangisjaihina,

ngayjee xutá xi j'aján.

18 B'a kitsú Ntíaná, kui xi y'éjña chji ni xu'bi santaha nkúhu nú chá ján.

19 'Kui nga b'a tíxihinna nga najmi tu nchjá n'ehe raá éen xutá xi najmi ntje Israel tjeheñ rā xi s'ejihin Ntíaná.

20 Tu sahá n'ekjihí xujun nga b'a k'úhín nga najmi tu kjine nichine xi chje kik'aihi rā ntia xi ts'innda xutá, nga najmi tu katjantuko jminchín

nga najmi kjee bixan, nga najmi kjine yjoho chu xi nubantu, ko nga najmi kjine jni.

21 At'aha santaha nkúhu nk'ie tjín xi b'énijmí kjuatéxumaha Moise xki nanki nk'ie nga n'eya kjuatéxumoó xki xuatú ni'ya sinagoga.

B'i tsu xujun xi kits'ínkji já postru ko jácháha ninku Jerusalen

22 As'ai y'éndako xinkjín já postru ko jácháha ninku ko ngayjee xuta ninku nga kj'ujín já xi ts'ínkjiko Pablo ko Bernabe nanki Antiokia. Y'ét'a xá Judá xi ta 'mi Barsaba ko Silá. Já k'aku ajihin já nts'eé já xu'bi.

23 B'i tsu xujun xi kamanda:

"Jin, já postru ko jácháha ninku Jerusalen, t'ín'ekj'íhi kjuasuniña já nts'eé xi najmi ntje judio tjehen rá xi tjintu nanki Antiokia ko nanki xi tjintujín ante Siria ko ante Silicia.

24 Kinu'yái nga tjín k'ua já xi ei tsitjujihinni, já xi najmi jin y'exái. Kits'in ntjinnu ni xi tsakúya jóo ko kits'inndyjajinnu xi nkú ts'in s'ejinnu.

25 Kui nga tjínkuhuni nga y'ét'a xái já xi t'ín'ekj'iko Bernabe ko Pablo. Kui xi tjonj

26 ko kui xi ja kitsjáha yjoho nga tsa kuayá ngat'aha Nda Ntíaná Jesucristo.

27 T'ín'ekj'í Judá ko Silá, kui xi kuinchjakonuu nga kuitsuyanuu ni xi y'endaj.

28 'At'aha Espiritu Santo ko jin b'a mani nga nda tjín nga tu nkuhú ch'á xu'bi xi n'ek'anjihí, xi tjihin nga n'etjusun.

29 Najmi tu chino nichine xi chje kik'aihi rá ntia xi ts'innda xuta, ta ndaha jni, ta ndaha yjoho chu xi kinubantu, ko najmi tu suntuko jminchjín nga

najmi kjee bixon. Tsa k'úéntu t'axíún ni xu'bi, nda n'oo. Nda kat'enuu.”

³⁰ As'ai incha ngji já xi kis'et'a xóo ko incha tsichu nanki Antiokia. Yo kinchja ñjakúhu ngayjee xuta ninku ko kits'ínkjas'eheñ xujun.

³¹ Nk'ie nga kits'ínyaha xujun xuta ninku, tsjo incha kamaha at'aha kichjuxihin ni xi tít's'in ntjihí.

³² Juda ko Sila xi ta já profeta tse kinchjanijmíko xuta ninku. B'a ts'in kisakú nga'yúhün rá já nts'eé ko ndjá tsinchajin ni xi kis'ejihin.

³³ Já xi incha tsichu nanki Antiokia ts'andaya jaha yo, as'ai incha kik'óya ngáha nanki Jerusalem. Nda ts'in incha kits'ínkjihi já nts'eé.

³⁴ Tunga y'ejñahá Sila yo.

³⁵ Pablo ko Bernabe ta y'entu Antiokia nga tsakúya éheñ Ntíaná ko y'énijmí én nda tsuhu Jesu-cristo. Nkjin já nts'eé xi b'a ta incha kits'in.

B'i ts'in incha kits'in ngabihí xinkjín Pablo ko Bernabe

³⁶ J'a nístjiun, as'ai Pablo b'i kitsúhu Bernabe:

—Tankihintsubek'áán já nts'eé xi tjíntu má nga y'enijmíáá én nda tsuhu Nda Ntíaná tu xi chahaná nkú ts'in tjíntu.

³⁷ Mjehe Bernabe nga ngjuaiko Jua xi ta 'mi ya Marco.

³⁸ Tunga b'ahá kitsú Pablo nga najmi nda tjín tsa ngjuaiko nda xi kits'in nga maha ante Panfilia, nda xi najmi kits'inndjuúko ho xáha nga tjuhun.

³⁹ Kits'in ngabihí xinkjín, at'aha kits'ínstiko. Kui nga Bernabe ngjikoho Marco xjo Chipre. Niyá ntá incha kits'in.

⁴⁰ Máha Pablo, Sila ngjiko. Incha tsitju nk'ie nga já nts'eé kits'ínkjas'ehen aya ntsja Ntíaná.

⁴¹ As'ai incha j'a ante Siria ko ante Cilicia. Kitsjáha nga'yúhun xuta ninku xi tjin yo.

16

B'i ts'in kitsjennkíhi Timoteo Pablo

¹ As'ai tsichu Pablo nanki Derbe ko nanki Listra. Yo kisakúhu nku nda xi tjenki Jesucristo xi 'mi Timoteo. Naaha Timoteo ntje judio tjeheh ra ko s'ejihin Ntíaná, tunga nda griegohó na'mihi.

² Já nts'eé xi tjintu Listra ko Iconio nda ts'in incha kinchjanijmíyaha Timoteo.

³ As'ai b'a kitsú Pablo nga Timoteo tsjénkohó ko kits'ihin ni circumcision, tu xi najmi ch'on kamaha ra xuta judio xi tjintu ante xu'bo. At'aha ngayjee xuta be nga ntje griego tjeheh ra na'mihi Timoteo.

⁴ Xki ante má nga j'a kitsúyaha xuta ninku ni xi y'énda já postru ko jácháha ninku Jerusalen, tu xi ts'íintjusuhun.

⁵ Kui b'a maha, xuta ninku 'yún kama 'yún tak'uhun Ntíaná ko xki nistjin 'yún incha kama nkjin.

B'i ts'in ngji Pablo ante Macedonia

⁶ J'a niyá Pablo ko já xi tjenko nanki xi tjintujin ante Frigia ko ante Galacia, at'aha Espiritu Santo najmi kitsjantehe nga k'uénjmi éhen Ntíaná nanki xi tjin ante Asia.

⁷ Nk'ie nga tsichu tiña nanki Misia, mjehe jóo kjuas'en ante Bitinia, tunga najmi kitsjantehé ra Espirituhu Jesu.

⁸ Kui nga tu j'a niyáhá ni nanki Misia nga incha ngji nanki Troa.

⁹ Nk'ie nga jyuun xi nkúhu tsa nchini kik'aihi Pablo nga kama chjiji nku nda xi nibáha Macedonia xi kabasinjña ndju. “Nibái ante Macedonia ko tsinkoni”, kitsúhu.

¹⁰ Nk'ie nga kama chjiji Pablo niu, tjen'yún y'enda ní yjoni tu xi kuankihinni ante Macedonia. At'aha b'a tsixin nga Ntiana tinchjani tu xi k'úenijmíhi ri én nda tsuhu Jesucristo xuta xi tjin yo.

B'i ts'in incha tsichu Pablo ko Sila nanki Filipino

¹¹ Tsitjui nanki Troa ko nkúhu nga tsankihinni xjo xi 'mi Samotracia. Nistjin xi ma ndyjuun tsichij nanki Neapoli.

¹² Yo tsitjuhuni nga tsankiin Filipino. Nanki k'akuhu ante Macedonia niu, má nga tjintu nkjin xuta Roma. Chuba nistjin kamaní yo.

¹³ Nku xuatu tsitjui ajin nantio ko tsankiin tiña má f'a ntáje nga tsankinnchisjai ante má ma ñjakú xuta nga nchjako Ntiana. Tintsubai yo nga tsixinyaihi éhen Ntiana jminchjin xi kama ñjakú.

¹⁴ As'ai nku tachjuun xi benkjún Ntiana xi 'mi Lidia, xi nanki Tiatira nibáha ko najyun kuan batéña, nk'ie nga tibasínju, Ntiana kits'ínko animaha tu xi 'yún nda ts'in ts'insihin ra ni xi tinchja Pablo.

¹⁵ Kisatentá tachjuun ko xuta xi tjintu ni'yaha. As'ai b'i kitsúni:

—Tsa b'a tábixiún nga s'ejin kjuaxina Ntiana, nibá n'ekj'áyo ni'yaná.

Kits'in kjuá'yúhuni nga kuintsubai ni'yaha.

B'i ts'in incha ngihi nubayá Pablo ko Sila

16 Ni xi kama nk'ie nga t́bankín ante má ma ñjakú xuta nga nchjako Ntíaná, kiséjiiin nku takjín musu xi t́ñajihín ntjo xi maha basejin ni xi 'ma t́ña. Ts'in ngana nkjún toon já ntíaha nga b'éña chji ni xi basejin.

17 B'i kitsúní nk'ie nga kitsjennkíní ko kíkjintáya t́jennkíní:

—Kui jmii xi ts'ínxát'aha Ntíaná xi t́ña nk'a ján. T́bakú nnyánuu xi nkú ts'in k'uankihinu.

18 Nkjin nistjin tu nku b'ahá kits'in. Tu chahán kama stihí Pablo, kits'ínk'ótjiya ko b'a kitsúhu ndaninda xi t́ñajihín takjún:

—Ngajoho Jesucristo b'a tíxihin nga títjujihín takjún.

Ta kuihi chubo tsitjujihín takjún ndanindoo.

19 Nk'ie nga kíkíe já ntíaha takjún nga najmi ta kama ts'ín nganaha toon, jakj'ánijé Pablo ko Sila. Ngjiko kjuá'yún ajin nantio. Nginkun já t́xóo incha ngjiko.

20 Nk'ie nga incha tsichuko jóo nginkun já jue, b'i incha kitsú:

—Já xi ntje judio t́ehen ra jái. Xutaná t́incha ts'ínndyjajihín.

21 Ni xi najmi ma ñá n'ekjálhín ko ta ndaha najmi ma n'éé t́incha bakúya, at'aha já Romahá ñá.

22 As'ai ko xuta nkjiun ngji kontraha Pablo ko Sila. B'a incha kitsú já jue nga n'esje najyun ndjuhu jóo ko nga yá s'ehé ra.

23 Askahan nga ja kingjáha nkjin nnyá, kits'ínkjas'en nubayóo ko b'a kitsúhu nda xi basehe nubayóo nga 'yún kúnnta jóo.

24 Nk'ie nga b'a kik'ihin ndo, ngjiko jóo. Kits'ínkjas'en má nga 'yún ndjáha núbayóo ko y'ékj'á'yún tsjantsjan sjai jóo.

B'i ts'in incha kama ndáhi Pablo ko Sila núbayóo

25 Tunga nkú ra ma nga masen nistjen, Pablo ko Sila tíncha nchjako Ntíaná ko tíncha sehe Ntíaná. Já núbayá xingisoo tíncha basínñju nga b'a tíncha ts'in.

26 Tu nkuhú chón xi tu xí 'yúhún kama. Xí y'étsujneyáha santaha má tjíyanji núbayóo. Tjen'yún tsix'ahá ngayjee ankjuá núbayóo ko tsixuntu ngayjee n'úkicha xi tjíntukj'áha já núbayóo.

27 Nk'ie nga j'áha nda xi basehe núbayóo ko kkie nga tjen tixa ankjuá núbayóo, as'ai ts'asje kichaha xi má nga mjehe ts'ínk'ien yjoho. At'aha b'a kitsú nga kits'innkjink'un nk'ie nga ja kabitju já núbayóo.

28 Tunga b'ihí kitsú Pablo nga kikjintáya:

—Najmi tu n'e'uihin yjohi. Tintsuba tente ní ei.

29 As'ai tsanki nd'í ndo ko kitsa jas'en ayoo. Ixi túb'atsé nkjúhún nga tsasinkúnych'int'aha Pablo ko Sila.

30 Kik'onsje ko b'i kitsúhu:

—Jun já ntia, ¿mí ni xi tjíhin nga ts'ian tu xi k'uankihina?

31 B'i incha kitsú jóo:

—N'e s'ejin Nda Ntíaná Jesucristo. B'a ts'in k'uankihini ji ko xuta xi tjíntu ni'yahi.

32 Y'énijmíhi éhen Ntíaná ndo ko ngayjee xuta xi tjíntu ni'yaha.

³³ Ta kuihi chubo nga jyuun tsanéjnu ndo má uhun Pablo ko Sila. Ko kisaténtá ndo ko ngayjee xuta xi tjintu ni'yaha.

³⁴ Ngjiko ni'yaha ko kits'inkjen ko tsjo kik'ientuhu ngayjee nga kis'ejihin Ntjaná.

³⁵ Nk'ie nga ja kama seen, kits'inkji já jue já xi b'a kuitsuhu nda xi basehe nubayoo nga ts'iin ndaíhi Pablo ko Sila.

³⁶ Kitsúyaha ndo Pablo én xi j'aik'íhin nga b'i kitsúhu:

—Ja kuats'in nibá én já jue nga k'uasjé'anuu. Kui nga titjusjehenu nd'ai ko kas'enuu kjuajyu nga n'oo niyá.

³⁷ Tunga b'ahá kitsú Pablo nga kinchjako já xi kits'in nibá já jue:

—Ta Roma ní tjeHENI. ¿Nkú ts'in nga kis'eheni nginkun xuta nga ndaha najmi titjun kin'ekokjuaNI, as'ai kin'ekjas'enni nubayá? ¿Á nd'ai mjehe ra k'onsje 'mahani? ¡Najmi kama ni xi tincha tsu! Kui ní kanibák'osjeni.

³⁸ Kik'óya ngáha jóo ko j'ai tsúyaha já jue ni xi kitsú Pablo. As'ai incha kitsankjún já jue nk'ie nga incha kint'é nga já Roma niu.

³⁹ Kui nga incha j'ainkihí ra kjuan'endyjat'a. Kik'onsje ko tsankihí nga incha kuitjujin nantio.

⁴⁰ Nk'ie nga ja tsitju'a Pablo ko Sila nubayoo, ngji ni'yaha Lidia. Askahan nga ja kamaha nga kokie já nts'eé ko kitsjáha nga'yúhun, incha ngji ngáha.

17

B'i ts'in ja ma kichjubéhe Pablo ko Sila nanki Tesalonika

1 J'a Pablo ko já xi tjenko nanki Amfipoli ko nanki Apolonia. As'ai incha tsichu nanki Tesalonia má tijnaha nku ni'ya sinagoga xuta judio.

2 Xi nkú ts'in nkaha Pablo jas'en yo jan xuatu tjihin nga kinchjanijmíyakoho xuta ni xi tjit'a xujun éhen Ntjaná.

3 Kitsúyaha xuta ko y'éjna chjihí nga tjihin nga un skuéhe xi kits'in nibá Ntjaná ko nga kj'uaíya ngáha ra ngabayoo. B'i kitsúhu jóo:

—Jesu xi tít'enjímínuu nd'ai, kui xi kits'in nibá Ntjaná ngajoho.

4 K'ua xuta xi ntje judio tjehe ra kis'ejihin ko incha kamako Pablo ko Sila. Ko b'a ta incha kits'in nkjin nkjún xuta griego xi benkjún Ntjaná ko nkjin jminchjín xi benkjúhun naxinantóo.

5 As'ai kama xintak'un xuta judio xi najmi s'ejihin. Incha tsinchá'a k'ua já ts'e ch'onk'un ko kinchja njaha xuta nkjiun. Xaáhan kits'in xuta. As'ai incha j'ai kjan ni'yaha Jason nga tsangisjai Pablo ko Sila tu xi k'onsjehe ko ts'ínkjas'ehe ra xuta nkjiun.

6 Nk'ie nga najmi kisakúhu Pablo ko Sila, incha ngjiko kjuá'yún nginkun já tíxóo Jason ko k'ua já nts'eé xi tíntu yo. B'i incha kitsú nga incha kikjintáya:

—Já xi títs'inndyjajihin ngayjee xuta asuntee ta ko ei ja incha j'ai.

7 Jason kits'ínkjálihín jóo ni'yaha. Ngayjee jóo tífi kontraha kjuatéxumaha nda títjun k'aku Cesar ko b'a tíincha tsu nga tíjna sa kj'ai nda rej xi 'mi Jesu.

8 Nk'ie nga kint'é én xu'bi xuta nkjiun ko já tíxóo, xaáhan incha kits'in.

9 Askahan nk'ie nga y'échjántjai yjohō Jason kō já xingisoo, kin'e ndaí ngáha ra.

B'i incha kits'in Pablo kō Sila nanki Berea

10 As'ai já nts'eé tjen'yún kits'ínkjihí Pablo kō Sila nga jyuun nanki Berea. Nk'ie nga tsichu yo, jas'en ni'ya sinagogaha xuta judio.

11 Xuta judio xu'bi 'yún nda sa animaha nga xi tjín nanki Tesalonika kō tsjo ts'in kits'ínkjáihín én xi kinchja Pablo. Xki nistjin incha kits'inya xujun éhen Ntíaná tu xi incha skuehe tsa kjuaxi ni xi tís'enijmíhi.

12 Kui b'a maha, nkjin xuta xi ntje judio tjehen ra xi kis'ejihín én xi y'a Pablo. Ajihín xuta xi nchja griego ta kis'ejihín nkjin jminchjín xi benkjúhún xuta kō nkjin já.

13 Tunga nk'iehé nga kint'é xuta judio xi tjín nanki Tesalonika nga nanki Berea ta túb'énijmí Pablo éhen Ntíaná, incha j'ai yo kō ta tsinchákjahan xuta.

14 As'ai kitsa kits'ínkjihí já nts'eé Pablo andai ntáchak'uun. Tunga y'entuhú sa Berea Sila kō Timoteo.

15 Já xi tsasín niyáha Pablo ngjikohō santaha nanki Atena. As'ai kik'óya ngáha nga ja kits'ínkjáihín én xi kits'ínk'at'aha Pablo, xi kuitsuyaha Sila kō Timoteo nga tjíhin nga kitsa ngjuai tjenkkihí.

B'i ts'in y'énijmí Pablo nanki Atena

16 Nk'ie nga tókuyá Pablo nanki Atena nga kuichú Sila kō Timoteo, kama stihí nga kikie nga tjín nkjún ntia xi ts'ínnda xuta yo.

17 Kui b'a maha, aya ni'ya sinagoga kinchjanijmíkoḥo xuta judiḥo ko xi najmi judiḥo xi benkjún Ntíaná, ko xki nistjin kinchjanijmíko xi kisatekjá nyátée.

18 As'ai kinchjako Pablo k'ua já nkjink'un xi 'mi já epicureo ko k'ua xi 'mi já estoico. K'ua b'i incha kitsú:

—¿Nkú títsu ndai nk'ie nga b'a nkjún ts'in tinchja?

Kj'ai ngá b'i incha kitsú:

—Kj'ai ra ntiaha tíb'éjña chji.

B'a incha kitsú jóo at'aha én nda tsuhu Jesu ko nga kj'uaíya ngáha ra xuta ngabayoo y'énijmí Pablo.

19 As'ai incha ngjikoho jóo ante xi 'mi Areopago ko b'i kitsúhu:

—¿A kama ko jin chai mí ni tsetsehe xi tíb'enijmí?

20 At'aha tíchubai ni xi najmi kjee nu'yái. Kui nga mjeheni chahani nkú tsuhu ra niu.

21 B'a incha kitsú at'aha ngayjee xuta nanki Atena ko xuta xi xin nankihí xi tjíntu yo incha tsjohḥo nga kuinchjanijmíyaha ko a ra kuasínñjuhu nku kjuankjink'un tsetse.

22 As'ai tsasinjña ndju Pablo kamasehen já xi kama ñjakú Areopago ko b'i kitsúhu:

—Jun já Atena, mankjinna nga jun xi 'yún yankjún ntia xi tjin asuntee.

23 At'aha nk'ie nga tsú'ba ajin nankinuu, kikie nga nkjin maha ntia xi yankjún. Ko ta kikie nku nachan chje má nga b'i ts'in tjit'a: “Ntia xi najmi yaha.” Kui b'a maha, Ntia xi yankjún nga najmi yo, kui xi tíb'enijmínuu.

24 'Ntjā xi kits'innda asuntee kō ngayjee ni xi tjíhin, xi batéxumaha nk'a ján kō t'anankiu, najmi ninku xi xuta ts'innda b'ejñaya.

25 Najmi machjéhen tsa xuta kuasinkoho. Najmi chumi nihi xi machjéhen. At'aha kui xi tsjáná nistjin kō tsjáná ntjō kō ngayjee ni xi tjinná.

26 Kui xi nkuhú ntjē kits'inndaha ngayjee xuta xi tjín nga ngúsuhun asuntee. Y'éjña nga nkjé kō má nga k'úentu nga nkúnkú.

27 'B'a kits'in tu xi ngayjee xuta kuangisjaihi Ntjaná, tsa tu ahá ni sakúhu nga kuangisjai. B'a tjín kjáihin nga najmi kjin tjñaná Ntjaná nga nkúnkáá.

28 At'aha Ntjaná tintsuba tík'uhunná, tinimaá kō tjinná nistjin, xi nkú nga ta kitsú k'ua já nkjink'un xi tjín ajinnuu: "Ntíhi ní Ntjaná ñá."

29 'Kui b'a maha, tsa ntíhi Ntjaná ñá, najmi tjíhin nga n'enkjíntak'aán tsa b'a tjín Ntjaná xi nkú joyaha sénnistjin xi kamandakoho toonsine kō tsa toontaba kō tsa ndjio. Kui niu xi ts'innda xuta. Xi nkú ts'in maha kō xi nkú ts'in ts'innkjink'un, b'a incha ts'ínk'íé.

30 'Ntjaná najmi kits'in kuenta ni xi kits'in xuta nistjin nk'ie, at'aha najmi kjee behe xuta. Tunga nd'ai tu má xi tjeheén ni nga tjintu xuta Ntjaná b'a títshu nga ngjuaikj'áha ra animaha ngayjee.

31 At'aha Ntjaná ja tjñaha nistjin nga naxu kuasehe ni xi nda kō ni xi najmi nda kits'in xuta. Nda xi Ntjaná kitsjá xáha nga b'a ts'in, kui xi b'a ts'in. Kits'ínkj'áya ngáha ra ngabayoo nda xu'bo. B'a ts'in tsakúchjihí ra ngayjee xuta nga kjuaxi niu.

32 Nk'ie nga kint'é jóo nga kj'uaíya ngáha ra xuta ngabayoo, tjín xi tsajnukiehe Pablo. Tunga k'uahá

xi b'i kitsú:

—Mjení kuinú'yái ni xu'b'i kj'aí nistjin ngáha.

³³ As'ai tsitju yo Pablo.

³⁴ Tunga k'uahá xi kis'ejihin ko kamakoho. Kis'ejihin nda xi 'mi Dionisio, xi ta ma ñjakúko jóo ante xi 'mi Areopago, ko nku tachjuún xi 'mi Damarí ko kj'aí sa.

18

B'i kits'in Pablo nanki Corinto

¹ As'ai tsitju Pablo Atena ko ngji nanki Corinto.

² Yo kisakúhu nku nda judio xi 'mi Akila xi kitsinjín ante Ponto, ko Priscila xi chjuúhun maha. Kui xi as'ai incha nibahá ante Italia, at'aha Claudio xi nda tíjún k'aku Roma b'a kitsú nga tjihin nga kuitju nanki Roma ngayjee xuta xi ntje judio tjeheh ra. As'ai Pablo ngjisehe jóo

³ ko y'eñajihin. Kits'inxáko nga kits'innda ni'ya najyunte, at'aha ta kuihi xá xi maha jóo.

⁴ Xki xuatu ngji nchjako Pablo xuta ni'ya sinagoga. Y'éña chjihí xuta xi ntje judio tjeheh ra ko xi ante Grecia y'aha ra nga kjuaxi ni xi tinchja.

⁵ Nk'ie nga tsitju Sila ko Timoteo ante Macedonia ko tsichu nanki Corinto, tu nku y'énimíhi Pablo éhen Ntíaná ko y'éña chjihí xuta xi ntje judio tjeheh ra nga Jesu xi kits'in nibá Ntíaná.

⁶ Tunga xuta judio ngji kontraha Pablo ko ch'on kitsúhu. Kui nga y'étsujnehe najyuhun Pablo ko b'i kitsúhu jóo:

—Jun katjinénuu ngabayanuu. Najmi an nguainéna. Nd'ai k'uatuts'ihin nga kfínsehe xi najmi ntje Israel tjeheh ra.

7 As'ai tsitju yō kō ngji ni'yaha nku nda xi 'mi Ticio Justo xi benkjún Ntíaná. Kui xi tiña ni'yaha sijná ni'ya sinagoga.

8 As'ai nda xi 'mi Crispo xi nda k'akuhu xuta sinagoga kō ngayjee xuta xinkjín kis'ejihin Nda Ntíaná. Kō ta nkjin xuta Corinto kis'ejihin kō kisaténtá nk'ie nga kint'é ni xi t'ib'énjímí Pablo.

9 As'ai Nda Ntíaná kinchjakoho Pablo nga nistjen xi nkúhu tsa nchini kik'aihi. B'i kik'ihin:

—Najmi tu binkjuin. T'enjímí sahani éen. Najmi tu b'echjái tsu'bai.

10 At'aha an tijnakoho. Najmi ch'a kamaha ts'in'uhin. At'aha nkjin xuta tjinna nanki xu'bi xi s'ejihin an.

11 Yō y'ejña Pablo nku nú masen tjihin nga tsakúya ajihin xuta Corinto éhen Ntíaná.

12 Tunga nk'ie nga tjihin xá nda Galion ante Akaya, nkuhú kits'in yjoho xuta xi ntje judio tjeheh ra nga ngji kontraha Pablo. Incha ngjikoho má ts'ínkokjua xuta Galion

13 kō b'i incha kitsú:

—Kui ndai tifi kontraha kjuatéxumani, at'aha kj'ai ts'in t'ibakúyaha xuta nga tjihin nga chankjún Ntiani.

14 Nk'ie nga ja kunchja Pablo, tu tjuhún Galion kinchjako xuta judio nga b'i kitsúhu:

—Jun xuta judio, tsa tjin má tsangane ndai kō tsa mí ni ch'on tjihin xi kits'in, tjihin nga ts'intSENTA kō kuasinñjúnúu.

15 Tunga ni xu'bi kjuatéxumanu kō kj'ai sa ni xi manuu y'aha ra ni. Kui nga t'enda subahanu niu. Najmi mjena ts'ihin kua ni xu'bi.

16 As'ai kik'onsje jóo natsihin ante má nga ts'ínkokjua xuta ndo.

17 As'ai ngayjee xuta jakj'á Sostene xi nda k'akuhu xuta sinagoga ko ta yohó y'éhe ndo. Tunga ndaha najmi kits'ínsihin Galion ni xi kamoó.

B'i ts'in kik'óya ngáha Pablo nanki Antiokia

18 Nkjin nistjin ts'andaya yo Pablo. As'ai kit-subakjá já nts'eé at'aha ja tifi ante Siria. Nk'ie nga tsichu nanki Cencrea nga kits'in niyá, j'ájnu kaha yjoho at'aha ja tít's'íntjusun nku ni xi kits'ínkie Ntjaná. As'ai jakj'á nku tsutsu ko ngji ante Siria nga tjenko ts'ihin Akila ko Priscila.

19 Nk'ie nga incha tsichu nanki Efeso, yo incha kits'in ngabihí xinkjín. Kama kinchjanijmiko Pablo xuta judio ni'ya sinagoga.

20 As'ai tjín xi tsankihí nga nkjin nistjin k'úéjña yo, tunga najmi kits'in yuhú Pablo.

21 B'i kitsú:

—Tífia. Tsa Ntjaná b'a kuitsu, kjúáise ngáhanuu. As'ai jakj'á nku tsutsu xi tsitju Efeso.

22 Nk'ie nga tsichu nanki Cesarea, ngjikjaniñaha xuta ninku ko as'ai ngji nanki Antiokia.

23 Askahan nga ja ts'andayahá chuba nistjin yo, tsitju nga j'a xki nanki xi tjín ante Galacia ko ante Frigia. Kitsjá nga'yúhun ngayjee xuta xi yankihí Jesu xi nkú ts'in ndjá kuincha nginkun Ntjaná.

B'i ts'in y'énijmí Apolo éhen Ntjaná

24 As'ai tsichu nanki Efeso nku nda judio xi 'mi Apolo xi kitsin nanki Alejandria. Tsjo ts'in b'énijmí ndo ko 'yún be xujun éhen Ntjaná.

25 Tsangiya ni xi tsakúya Nda Ntjaná Jesu ko ngayjehe k'un y'énijmíhi xuta. Tsakúya sisin yáha

Jesu, tunga najmi 'yúhún mankjihin á saténtáha xuta. Tu xi nkúhú ts'in tsaténtá xuta Jua be.

²⁶ Ndjá y'énjímí ndo ni'ya sinagoga. Nk'ie nga kint'é Akilá ko Priscila ni xi y'énjímí, ngjiko t'axín ko kitsúya sisihin xi nkú ts'in mjehe Ntíaná nga k'úéntu xuta.

²⁷ Nk'ie nga kama mjehe Apolo nga ngjuai ante Akaya, já nts'eé xi tjin Efeso tsasinkohó. Kits'índaha nku xujun xuta ni'yakuyáha Jesu xi tjin Akaya tu xi nda ts'in ts'ínkjáihin ra. Nk'ie nga tsichu Apolo yo, tsasinko nkjún xuta xi ja s'ejihin Jesu tu ngat'aha kjuandaha Ntíaná.

²⁸ At'aha nginkun gayjee xuta ndjá tsakúya nga najmi kjuaxi ni xi bakúya xuta judio. Tsakúya ni xi jtít'a xujun éhen Ntíaná. B'a ts'in y'éjña chjihi nga Jesu xi kits'in nibá Ntíaná.

19

B'i kits'in Pablo nanki Efeso

¹ Nk'ie nga tjña Apolo nanki Corinto, Pablo j'ajin asunntu tjenki xi tjin ante Asia ko tsichu nanki Efeso. Yo kisakúhu k'ua xuta xi yjankihí Jesu. As'ai b'i kitsúhu jóo:

² —¿A kin'ekjóhon Espiritu Santo nk'ie nga kis'ejinnuu Jesu?

B'i incha kitsú jóo:

—Ndahachí najmi kjee nu'yái tsa tjin Espiritu Santo.

³ —¿Nkú n'e kisatentó? —kitsú Pablo.

—Xi nkú ts'in tsaténtá Jua —incha kitsú.

⁴ B'i kitsú Pablo:

–Xuta xi ngjik'áha ra animaha tsaténtá Jua, tunga b'ahá kitsúhu nga tjihin nga s'ejihin xi kj'uaí askahan nga kui. Jesu, kui xi askahan j'ai.

⁵ Nk'ie nga kint'é jóo ni xu'bi, as'ai ksaténtá nga kits'ínkjáihin Jesu.

⁶ Nk'ie nga kingjénne ntsja Pablo jóo, j'aitsejihin ra Espiritu Santo ko kj'ai kj'ai éhen incha kinchja ko Ntjaná kitsjáha én xi kinchja.

⁷ Ma ra te jo jáx'in xi b'i incha kamat'ain.

⁸ Jan ra sá kamaha Pablo nga ngji ni'ya sinagoga ko ndjá kinchjako xuta. Kitsúyaha ko y'éjña chjihí nkú tjihin ra nga batéxuma Ntjaná.

⁹ Tunga k'uahá xi ndjá kits'in animaha. Najmi kits'ínkjáihin nga s'ejihin ni xi títsu Pablo. Nginkun ngayjee xuta tu ch'ohón ts'in incha kinchjane xuta xi s'ejihin Jesu. Kui nga ngji t'axihin Pablo. Má nga bakúya nda xi 'mi Tiranó ngjiko xuta xi yankihí Jesu. Yo tsakúyaha xuta xki nístjin.

¹⁰ Jo nú kamaha nga b'a kits'in. Kint'é éhen Ntjaná ngayjee xuta xi tjín ante Asia, xi judio ko xi griego.

¹¹ Ntjaná kitsjáha nga'yún Pablo xi má nga kits'in kjuankjún xi i.

¹² Santaha xuta ngjiko pañu ko najyun xi kits'ínko Pablo. Kui xi j'aikoho xuta uhun. As'ai kamanda ko tsitjujihin jánindo.

¹³ Ta kikjatsú'ba yo k'ua já judio xi b'ema xki ante ko m'osje jánindo. Kui xi incha kama k'un kits'ínchjén nga'yúhun Nda Ntjaná Jesu. B'i incha kitsúhu jánindo:

–Ngajoho Jesu xi tób'énijmí Pablo b'a tí'miíhi nga titjujiun yo.

14 Yatu jáhā ndā na'mi k'aku judio xi 'mi Esceba b'a incha kits'in.

15 Tunga kinchjahá ndanindoo nga b'i kitsúhu jóo:

—Be Jesu ko ta be Pablo, tunga, ¿yáha jun?

16 As'ai nda xi tijnajihin ndanindoo jakj'á já xi yatuu. Kikjanko ko kits'in nganaha. As'ai tsanka jóo nga kama uhun. Xi kjintustihí nga incha tsitju ni'yaha ndo.

17 Ngayjee xuta xi tjin Efeso, xi judio ko xi griego, kint'é ni xi kamo. Incha kitsankjun ngayjee ko b'a incha kitsú nga tihin kjuachanka Nda Ntjaná Jesu.

18 Nkjin xi kis'ejihin Jesu incha j'ai tsuya nginkun xuta xingisoo ni ch'onk'un xi incha kits'in nk'ie.

19 Xi incha kits'in tj'e j'aiko xujun tj'ehe ko kis'eti xujun nginkun ngayjee xuta. Nk'ie nga kin'esjehe xki xujun xi kis'etiu, chate ra mii toontaba kama chjhi xujun.

20 B'a ts'in 'yún ngji tse ko ngji ndju éhen Ntjaná.

21 Askahan b'a kitsú kjuankjintak'uhun Pablo nga ngjuai nanki xi tjin ante Macedonia ko ante Akaya ko as'ai ts'in niyá nga ngjuai santaha nanki Jerusalen. B'i kitsú:

—Askahan nga kuicha yo, tihin nga ta kfian nanki Roma.

22 As'ai kits'inkji Macedonia Timoteo ko Erasto, já xi incha basinkoho. Ko máha kui, y'ejna sa chuba nistjin Asia.

B'i ts'in ngji kontraha xuta Efeso ni xi tsakúya Pablo

23 Kui nistjiun xuta xi yankihi Jesu nanki Efeso nku kjuasti j'ajin.

24 Nku nda xi 'mi Demetrijo xi ts'innda ninku toontaba xi. B'a ts'ink'íentu ninku xi ts'innda xi nkúhu ninkuhu ntia Artemisa. Kui nistjiun já xi kui xáha ts'in 'yún ts'in ngana toon.

25 Demetrijo kinchja ñjakúhu já xi ts'inxát'aha ko já xi ta kui xáha ts'in. B'i kitsúhu jóo:

—Jun já, yo nga b'éjñaná toon xá xu'bi.

26 Tunga tíyanú ko tínu'yó ni xi títs'in Pablo ei Efeso ko santaha tu má nankihí ni xi tjin ante Asia. B'a títsu nga ntia xi ts'innda xuta najmi ntia. Nkjin xuta ja incha kits'ínkjáihin ni xi t'ibakúya ndo ko incha kits'ínk'óntjaiya kjuankjintak'uhun.

27 Najmi tu suba xána títs'ínkji kinte. Ta títs'in nga nku ni xi najmi ta chumi ni chjihí ra kama ninkuhu ntia chánka Artemisa. Najmi ta chankjúhun kjuachánkaha ntia xu'bi, ntia xi benkjúnyje xuta xi tjin ante Asia ko nga ngúshun asuntee.

28 Nk'ie nga incha kint'é jóo niu, tu xí incha kama kjahán ra. B'i incha kitsú nga kikjintáya:

—¡Chánkaha Artemisa, ntiaha xuta Efeso!

29 As'ai xuta ndaha najmi be mí nihi xi ts'ín. Nkúhú kik'a xinkjín nga ngjikj'á Gayo ko Aris-tarko, kui xi já Macedonia xi tjenko Pablo. Incha kikjebéfe nga ngjiko ante má ma ñjakú xuta nantia.

30 Mjehe Pablo nga ngjuaisehe xuta xi kama ñjakú yo, tunga najmi kitsjántehé ra xuta xi yjanki Jesu.

31 Ko ta já k'aku xi tjin ante Asia xi nda nchjako Pablo incha kits'ínkjihí én nga tsankihí nga najmi tu ngjuai ante má nga kama ñjakú xuta.

32 B'i ngján incha kinchja xuta nga xaáhan incha kits'in. Kō santaha nkjin nkjún xi najmi be á yo kama ñjakúhu.

33 As'ai tjín xi jakj'áha Alejandro. Xuta xi ntje judio tjehen ra kitsuniñaha ndo nginkun ngayjee xuta. Kingjén nk'a ntsja Alejandro nga tsanki nga nguén jyu xuta tu xi kuinchjantjaihi xuta judio.

34 Tunga nk'ie nga kkie xuta nga ta nda judio niu, nkuhú kits'in ntaha nga b'i incha kitsú nga kikjintáya nkú ra ma tsa jo ora:

—¡Chánkahá Artemisa, ntiaha xuta Efeso!

35 As'ai nda xi ts'inxát'aha já k'aku kamaha kits'ínk'íéjyu xuta nkjiun. B'i kitsú:

—Jun já Efeso, ngayjee xuta be nga nankiná Efeso kunntá ninkuhú ntia chánka Artemisa kō sénnistjihin xi nibaha nk'a ján nga j'aikijne ei.

36 Tíjña chji chji ni xu'bj. Kui nga tjenjyúhunu kō n'enkjintak'un ni xi n'oo.

37 At'aha já xi kaf'áikoo ei najmi ni xi tíncha nínku jakj'á ndyjé kō ta ndaha najmi ch'on títshu ntia ts'aña.

38 'Tsa Demetriō kō já xi ts'inxáko tjínkoho kjuā xuta xi kj'ai, tjín já jue kō tjín já tjíxá. Yo kats'ínkōkjuā xinkjín.

39 Kō tsa tjín sa kj'ai ni xi mjenuu, nk'ie nga ma ñja já tjíxoo s'enda niu.

40 At'aha kama satéjéneé ngat'aha ni xi kama nd'ai, nga xaáhan tín'eé. Tsa chasjaiyaná ngat'aha niu, najmi yaá nkú kuixíaán.

41 Nk'ie nga ja kamaha nga b'a kitsú, kits'ínkji ngáha ni'yaha xuta xi kama ñjakú yo.

20

B'i kama nk'ie nga j'a Pabło ante Macedonia ko ante Grecia

¹ Askahan nga ja kis'ejyú xuta nkjiun, Pabło kinchja ñjaha xuta xi yankihí Jesu ko kitsjá nga'yúhun. As'ai tsitju nga ngji Macedonia.

² Xki nanki xi tjín ante Macedonia j'a ko 'yún kitsjá nga'yúhun xuta nínku nga kinchjako. Askahan tsichu Grecia.

³ Jan sá kamaha nga y'ejña yo. Nk'ie nga ja kuakj'á tsutsu xi ngjuaikoho ante Siria, tu kint'éhé én nga já judio ja y'éndako xinkjín nga ts'ín'uhun. Kui nga ta ante Macedonia ngji ngáha.

⁴ Kui já xu'bi xi kitsjennkíhi Pabło: Sopater xi Berea nibáha xi ntíhi Pirro maha, Aristarco ko Segundo xi Tesalonika incha nibáha, Gayo xi Derbe nibáha, Timoteo, Tikico ko Trofimo xi Asia incha nibáha.

⁵ Incha ngji títjun jái ko nanki Troa kikuyáni.

⁶ Jin bi askahan nga j'a s'í nk'ie nga chine nínkuan xi najmi tjíhin na'yu san, tsitjas'ein nku tsutsu ko tsitjuí Filipo. Nístjin xi ma uhun tsichu tjennkii jóo Troa. Yo ts'andayaní yatu nístjin.

B'i kama nk'ie nga j'ai Pabło nanki Troa

⁷ Nk'ie nga túb'atuts'ihín tuntjóo kama ñjakúí tu xi chineheni niñu. As'ai Pabło tsakúyaha xuto, at'aha nístjin xi ma ndyjuun ngjuai ngáha. Tu nku ngjindjukohó éen santaha nkúhu nga masen nístjen.

⁸ Chun ndzjen ndzjen yo, at'aha nkjin maha nd'í seti xi tjín nk'a ni'ya xi má nga kama ñjakúí.

9 Tu nkuhú ndati xi 'mi Eutiko xi ankjuá nk'oo kab'ejña stiü. Kui xi kis'efe nk'ie nga 'yún ngjindjuko Pablo éen. 'Yún nkjún kis'efe tjain. As'ai tsijnenki. Ni'ya xi ma jahan niba nga tsijnenki. Ja ka'me nga kichjusintjen.

10 As'ai tsitjuen Pablo ko ngjik'uhun. Kitsubakj'a ndatiu ko b'i kitsú:

—Najmi tu binkjun. Tíñahá ndo.

11 As'ai ta ngji ts'innđuú ngáha éhen Pablo. Tsakjánya ninkuon, incha kikjine niñu ko ta ngjindjuhú ngáha nga tsakúyahá xuto santa nkúhu nga kama seen. As'ai ngji.

12 Máha ndatiu, incha ngjiko tík'uhun xuta ni'yahá ko incha kisakú nga'yúhun ngat'ahá ni xi kama.

B'i ts'in kits'in niyá Pablo tu xi kuichúhu nanki Mileto

13 Ja kamoó. Jín tjen tsankinkohoní tsutsu nanki Ason, yo má nga chúyahí Pablo. B'a ts'in y'éndakoni, at'ahá mjehe nga niyá t'ananki ts'ín.

14 Nk'ie nga kisakúni Pablo nanki Ason, as'ai jas'enkoní tsutsu ko tsankiñ nanki Mitilene.

15 Tsitjuí nanki Mitilene ko nistjin xi ma ndyjuun tsitjai xjo Kio. Nk'ie nga kama ndyjuun tsitjandái nanki Samo, nku ante má bichú tsutsu. Kin'ekj'ályai nanki Trogilio ko nistjin ma ndyjuun tsichí nanki Mileto.

16 B'a kin'ei at'ahá Pablo mjehe kj'ua niyá nanki Efeso tu xi najmi k'uandayahá ra nanki xi tjin ante Asía. Kits'in xatíhi yjoho nga kuichú nanki Jerusalem, tsa tu ahá ni sakúhu nga k'úejña yo nk'ie nga kuitju S'í Pentecoste.

B'i ts'in kinchjako Pablo jácháha xuta ninku Efeso

17 Nk'ie nga tsichij nanki Mileto, kits'ínkji én Pablo nga kinchjaha jácháha xuta ninku Efeso.

18 Nk'ie nga incha j'ai jóo, b'i kitsú Pablo:

—Yo xi nkú ts'in tsátejñajin tehentenuu santa nkúhu nga tuts'ihin ni nga jáa ei ante Asia.

19 Nimakjua ts'asjé yjona nga kits'inxát'aha Ntíaná. Kikjinta nga un kikiena ni xi y'éndat'áinna já judio.

20 Tunga najmi kingjent'íahá ra nga y'enjímínuu ni xi ts'e ngandanuu. Tsakuyánuu niyátée ko xki ni'yanuu.

21 Y'ejña chjihí xuta xi ntje judio tjeheñ ra ko xuta xi najmi ntje judio tjeheñ ra nga tjihin nga ngjuaikj'áha ra animaha nginkun Ntíaná ko nga s'ejihin Nda Ntíaná Jesucristo.

22 'Nga tít'e'éheñ Espiritu Santo nd'ai tífia Jerusalen. Najmi be mí nihi xi kamat'an ján.

23 Tunga xki ante má nga fia tsuya tíjunna Espiritu Santo tsa nubayá ko tsa kjuá'un tókuyána.

24 Tunga najmi kjintahána tsa kuayá. Ngat'a ts'an najmi 'yún chjihí ra ni xu'bo. Tu nkuhú ni xi mjena. Mjena nga kuichúket'a tsjo tsjo ni xi títs'ian ko ts'inndjaá xá xi kitsjána Nda Ntíaná Jesu, nga xinya sisian én nda tsuhu Jesu xi b'éjña chji kjuandaha Ntíaná.

25 'Be nd'ai nga najmi ta chahanú ngatento xi jáisenuu, jun xi y'enjímínuu nkú ts'in batéxuma Ntíaná.

26 Kui b'a maha, nistjin nd'ai tíxinyahanuu nga najmi an y'anjiá tsa tjín xi ndyja.

27 At'aha najmi chumi nihi xi y'ejná 'manuu. Ngayjee ni xi mjehe Ntjaná y'enijmínuu.

28 Kui b'a maha, chúhun ruu yjonuu ko chúhun ngayjee xuta ninku. At'aha Espiritu Santo kitsjá xánuu nga jun xi chasoho xuta ninkuhu Nda Ntjaná xi jnihi ts'atsekoho.

29 At'aha be nga askahan nga kfián kj'uaíjinnuu já xi mjehe ts'ijnndyja xuta ninku xi nkú ts'in chu kjoon ajihin chutsanko.

30 Santaha ajinnuu s'e xi kuakúya ni xi najmi b'a tjín tu xi xuta ninku tsjénnikihí ra.

31 Kui nga tintsuba ndahanu. N'ekj'áitsjon nga nistjin nistjen jan nú najmi kits'inkj'áíya nga ntánkán tsatendzjá nga kitsjaníyáhanuu nga nkúnkú.

32 'Nd'ai já nts'e, títs'inkjas'ennuu aya ntsja Ntjaná. Katasinkonuu én xi tínchja kjuandaha Ntjaná, kui éhen xi kamaha tsjánuu nga'yún nginkun Ntjaná ko tsjánuu ni xi ts'ínkjáihín ngayjee xuta xi tsichu ma je nginkun Ntjaná.

33 Najmi kits'in mje toontabanuu ko tsa toonsinenuu ko ta ndaha najyunnuu.

34 Jun yo xi nkú ts'in kits'inxá tu xi kisakúhuna ni xi kamachjénna ko ni xi kamachjéhen já xi kitsjenkona.

35 Tehente y'ejná chubayanuu nga tjihin nga n'exáá tu xi kujsinkohoná xuta xi najmi tjihin ni xi machjéhen. N'ekj'áitsjon éhen Nda Ntjaná Jesu xi b'i títsu: "Xi tu tsjáhá ra ni xuta xi kj'ai, kui xi 'yún s'e saha kjuatsjo nga xi ts'ínkjáihín niu."

36 Nk'ie nga ja kama nga b'a kitsú Pablo, tsasinkunch'in nga kinchjako Ntjaná ko b'a ta incha kits'in jóo.

37 Incha kikjintá ko kitsubakjá ko kikjexu'ba tsaha Pablo.

38 'Yún incha kik'ie babaha jóo at'aha b'a kitsú nga najmi ta incha skuéhe Pablo. As'ai incha ngjisín niyá santaha má kjijña tsutsu xi ngjuaikohó.

21

B'i ts'in kits'in niyá Pablo nga ngji nanki Jerusalen

1 Nk'ie nga y'entui já nts'eé xi tjín nanki Efeso, tsitjas'ein nku tsutsu. Tsankin naxui naxui xjo Cos. Nistjin xi ma ndyjuun tsichij xjo Roda ko askahan tsichij nanki Patara.

2 Yo kisakúni kj'ai tsutsu xi tífi ante Fenicia. Tsitjas'ein ko tsankinkoi.

3 Kiyaj xjo Chipre. Skjúhun tsitjai nga tsankiin ante Siria. As'ai tsichij nanki Tiro, at'aha yo tjihin nga chjújen ch'á xi y'a tsutsuu.

4 Kisakúni xuta xi yjankihí Jesu xi tjín yo. Yatu nistjin ts'andayani. Kui xi b'a kitsúhu Pablo nga najmi tu ngjuai nanki Jerusalen, at'aha Espiritu Santo tsakúchjihí ni xi kama.

5 Nk'ie nga j'a nistjin xi yatuu, tsitjui yo ko incha ngjisín niyáni ngayjee jáx'in ko jminchjihin ko ntíhi santaha natsin nantio. As'ai tsinchakúunch'iin andai ntáchak'uun ko kichubakoi Ntjaná.

6 As'ai b'i ngján kinubakjái xinki, jin tsitjas'ein tsutsuu ko kui incha kik'óya ngáha ni'yaha.

7 Nku tsutsu tsitjukoi Tiro ko tsankiin nanki Tolemaida. Kisuniñaihi já nts'eé xi tjín yo ko ts'andayani nku nistjin.

8 Nistjin xi ma ndyjuun tsitjuj ko tsichij nanki Cesarea. As'ai tsankiin ni'yaha Felipe ko tintsu**ba**koj. Felipe xi ta b'énijmí én nda tsuhu Jesu ko ta tjihin xá ajihin já yatu xi basinko já postru.

9 Ta tjiintuhu ñju istinchjin xunkú xi Ntíaná tsjáha éhen.

10 Ja tjihin nkjin nistjin nga tintsu**ba**j yo nk'ie nga j'ai nku nda profeta xi 'mi Agabo xi nibaha ante Judea.

11 J'aitsubek'únni, jakj'a tjabaxín ndayáha Pablo ko y'ét'a'yúnkoho ntsja ko sjai. As'ai b'i kitsú:

—B'i títsu Espiritu Santo nga b'i ts'in k'uét'a'yúhun já judio xi tjin Jerusalen nda xi ts'e tjabaxín ndayái. Ts'íinkjas'en aya ntsja já xi najmi ntje Israel tjeheh ra.

12 Nk'ie nga kinu'yái niu, b'a kik'iihin Pablo ko b'a ta kitsúhu xuta xi tjin yo, nga najmi tu ngjuai nanki Jerusalen.

13 As'ai b'a kitsú Pablo:

—¿Á tích'íhinu ko tín'e bahanú? Tjínkuhu k'an nga najmi tu nku nga s'et'a'yán. Ta tjinu níhi k'an nga santaha kuayá Jerusalen ngat'aha Nda Ntíaná Jesu.

14 Nk'ie nga najmi kits'in yu Pablo ni xi tí'miihi, najmi b'a ta kik'in saha ri.

—Katuma xi nkú ts'in mjehe Ntíaná —tu tsixíhín sai.

15 Askahan y'endaj yjoni ko tsankiin nanki Jerusalen.

16 Kitsjennkíni k'ua já xi yjankihi Jesu xi tjin nanki Cesarea ko ngjikoni ni'yaha nku nda xi nibáha xjo Chipre xi 'mi Mnason xi ja nd'ai

tjennkihi ra Jesu. Kui xi kitsjánteni nga kuintsubai ni'yaha.

B'i ts'in kik'inyaha Pablo ni xi ts'in nga tsichu nanki Jerusalen

¹⁷ Nk'ie nga tsichii nanki Jerusalen, tsjo ts'in kits'ínkjáinni já nts'eé.

¹⁸ Nístjin xi ma ndyjuun Pablo ko jin tsank-intsubek'uin Santiago. Yo tjintu ngayjee jácháha xuta ninku nk'ie nga tsichii.

¹⁹ As'ai Pablo kikjaniñaha jóo ko kitsúyaha nga nkúnkú ni xi kits'in Ntíaná ajihin xuta xi najmi ntje judio tjeheh ra nga kits'ínchjén xáha Pablo.

²⁰ Nk'ie nga kint'é jóo niu, incha kits'intsjoho Ntíaná. As'ai b'i incha kitsú jóo:

—Ji nda nts'e, ja yai nga nkjin mij maha xuta judio xi s'ejihin Jesu ko ngayjee 'yún benkjún kjuatéxumo.

²¹ Kik'inyaha nga ji títakuyái nga tjihin nga ts'in t'axín kjuatéxumaha Moise ngayjee xuta judio xi tjintujihin xi najmi judio, ko nga b'a títixín nga najmi ts'íihin ni circuncision ntíhi, ko nga najmi ts'íintjusun sin cháná.

²² 'Kui b'a maha, ¿nkú n'e'hená? At'aha kuint'é xuta nga ja kaf'ái ei.

²³ Kui nga tu sahá b'i n'e'heni. Ei tjintujinni ñju já xi ts'íintjusun nku ni xi kits'ínkie Ntíaná.

²⁴ T'inkoi jóo ko n'e jekoi yjohi nginkun Ntíaná. T'echjintjai tu xi kj'ujánu kaha ra yjoho jóo. B'a ts'in skuehe ngayjee xuta nga ko ji tín'etjusuin kjuatéxumo ko nga najmi kjuaxi ni xi kint'é.

²⁵ 'Xuta xi najmi judio xi ja s'ejihin Jesu, jin ja kin'ekjihí nku xujun má tít'a ni xi y'endai.

B'a kik'i_{ih}in nga najmi tu k_jine yjoho chu xi ch_je kik'a_{ih}i ra nt_ia xi ts'innda x_uta, ta ndaha j_ni ko ta ndaha yjoho chu xi kinubantu, ko nga najmi tu katjantuko jminchin xi najmi k_jee bixan.

²⁶ As'ai ngjiko Pablo já xi ñjuu. N_istjin xi ma ndyjuun kits'in jeko yjoho nginkun Nt_ianá. Jas'en n_{ats}ihin n_inku tu xi k_uitsuyaha nk_je k_feku nga ts'in je yjoho ko nk_je k_j'u_aiko ch_jeh_e nga nk_unk_u.

B'i ts'in kichjubénijé Pablo

²⁷ Nk'ie nga ja t_ibichú_ke n_istjin yatu xi mach_jén nga ts'in je yjoho x_uta nginkun Nt_ianá, k_ikie k'_ua já judio xi nibaha ante Asia nga kabasinjña Pablo má ma n_{ats}ihin n_inku. As'ai tsinchá'a ngayjee x_uta nk_jiun ko jak'_{án}ijé Pablo.

²⁸ Yún incha kikjintáya nga b'i incha kitsú:

—Jun já Israel, t_is_ink_on_i! Kui nda_i xi t_ibakúyaha ngayjee x_uta tu má xi t_jehén ni nga tífi kon_{tr}aha x_utaná, k_juatéxumo_o ko ante xu'_bi. Santaha jas'enko já griego e_i n_{ats}ihin n_inku nga kits'insi nginkun Nt_ianá ante nk_jún xu'_bi.

²⁹ B'a incha kitsú jóo at'aha k_j'a_i n_istjihin k_ikie Trofimo, nda xi nanki Efeso nibáha, nk'ie nga t_jen_{ko} Pablo ajin n_{ant}io. B'a incha kitsú k_juankjink'uhun jóo nga Pablo jas'enko ndo má ma n_{ats}ihin n_inku.

³⁰ As'ai xaáhan incha kits'in ngayjee x_uta nk_jiun ko incha tsangatsanka nga j'ai. Incha jak'_{án}ijé Pablo, kik_jebéfe nga kik'onsje n_{ats}in n_inku ko t_jen'yún y'échjahá ank_jua n_{ats}iun.

³¹ Nk'ie nga ja m_jeh_e x_uta n_{ant}io ts'_iink'ien Pablo, tsichuhu én nda jun k'aku Roma nga xaáhan t_incha ts'in ngayjee x_uta Jerusalen.

³² Kítsa kinchja ñjaha já juhun kō tsangatsanka má nga kama ñja xuta nkjiun. Nk'ie nga kkie xuta nga nibá nda jun k'aku kō já juhun, najmi ta kingjáha ra Pablo.

³³ As'ai j'ai tiña nda jun k'aku, jakj'ánijé Pablo kō b'a kitsú nga jo n'úkicha s'et'a'yuhun. Kingjásjaiya yá ndaha niu kō mí nihi xi kuats'in.

³⁴ Tunga b'i ngjáhán kinchja xuta kō ndaha najmi kamankjihin nda jun k'aku ni xi tímoo, at'aha xaáhan tìncha ts'in xuta. Kui nga b'a kitsúhu nga ngjuainijéhe Pablo má tjíntu já juun.

³⁵ Nk'ie nga tsichukohō já juun antjío xi tjín má incha tjíntu, santaha ts'agankihí já juun Pablo, at'aha 'yún kjan tìncha maha xuta nkjiun.

³⁶ Nkjin nkjún incha maha xi b'i tìncha tsu nga yjanki:

—jKat'en ndo!

B'i ts'in tsasinntjai yjohō Pablo

³⁷ Nk'ie nga ja tín'ekjas'en Pablo má incha tjíntu já juun, b'i kitsúhu nda jun k'aku:

—¿A kama kuinchjakohō ichí?

B'i kitsú nda jun k'aku:

—¿A mahi én griego?

³⁸ ¿A najmi jihí nda Egipto xi nd'ai ngáha k'in kontraihi nda titjun Romā kō k'inkoi ante kixiu ñju mij já ts'ínk'ien anīma?

³⁹ B'i kitsú Pablo:

—Nda judioná. Tarso kitsian, nanki chánka xi tjíñajihin ante Cilicia. Tíbankihi. K'uaíntení ichí nga kuinchjaka xuto.

⁴⁰ Nk'ie nga kik'aintehe, tsasinndjusún Pablo antjío kō kingjénnk'a ntsja tu xi ngjuén jyuhu xuta.

Nk'ie nga kingjén jyu xuta, as'ai én hebreo kinchja Pablo.

22

¹ —Jun já nts'e ko já xinkjián, tasinñju mo ni xi xinnu nd'ai nga kúásinka yjona.

² Nk'ie nga kint'é xuta nga én hebreo tinchja Pablo, tu sahá 'yún kindyjanta nch'ánch'án sa.

³ B'i kitsú Pablo nga ngjindju:

—Nda judioná. Tarsu kitsian, nanki xi tijnajihin Cilicia, tunga nanki xu'bihí kama chá. Gamaliel tsakúya sisinna xi nkú ts'in tijná kjuatéxumaha ntje cháná. B'a ta ts'in 'yún kitsenkján Ntiana xi nkúhu jun ngatento.

⁴ Kitsjennkí unkie xuta xi s'ejihin Jesu nga mjena ts'ink'ién kai. Jak'anjé ko kits'inkjas'en nubayá jáx'in ko jminchín.

⁵ Kama kuitsuya nga kjuaxi ni xi tíxian nda na'mi tíjuun ko ngayjee jáchá xi ta tjihin xá. Nistjin nk'ie kui incha kitsjana xujun xi ts'inkjas'ehe xutaná xi tjin nanki Damasco má nga kama xá xi tífihina. Ngjingsja Damasco xuta xi yankihí Jesu tu xi kjuáikonijehena Jerusalem, má nga n'enijéhe ra.

⁶ Tunga ni xi kamahá, nk'ie nga títs'ian niyá ko nga ja tibichú tiña Damasco, nkú ra ma masen nistjin niu, tu tjen'yún y'étjindaihina nku nd'í chánka xi nibajehen nk'a ján.

⁷ Jáikijne t'anankiu ko kint'e nku nta xi b'a kitsúna: “Saulo, Saulo, ¿á unchahaní?”

⁸ As'ai kingjasjáiyaha: “¿Yáha ji, Nda Ntia?” Ko b'a kitsúna: “An Jesu xi nibáha Nazaret xi unchai.”

⁹ Já xi tjenkona kieke nd'íu ko kitsankjún, tunga najmi kint'éhé ntaha xi kinchjakona.

10 'As'ai b'a kixihin: “¿Mí nihi xi mjehi nga ts'ian, Nda Ntia?” Ko b'a kitsúna Nda Ntíaná: “Tisintjein ko t'in Damasco. Yo k'úinyahi ngayjee ni xi kis'enda nga tjihin nga n'ei.”

11 As'ai incha kikjebénkina já xi tjenkona nga ngjikona Damasco, at'aha kits'in kana nga'yuhun nd'íu.

12 'Damasco tjña nku nda xi 'mi Anania xi 'yún benkjún Ntíaná, xi ts'intjusun xi nkú ts'in tjt'a kjuatéxumaha Moise. Nda nchjanijmíyaha ra ndo ngayjee xuta judio xi tjin yo.

13 Kui xi j'aisena ko b'a kitsúna: “Nda nts'e Saulo, katuma chji ngáha ri.” Ta kuihi chubo kama chjina ko kkie xi nkú tjin.

14 B'a kitsúyana: “Ntiaha ntje cháná j'áihin, nga ji xi kamankjihin ni xi mjehe ko nga chai Nda xi naxu nginkun Ntíaná ko nga kuinú'yái ntaha.

15 At'aha ji k'úinyaihi ngayjee xuta yáha kui ko kuixínyaihi xuta ni xi kiyai ko kinu'yái.

16 Nd'ai najmi ta chuyá sahani. Tisintjein. B'a t'ihin Nda Ntíaná nga kats'inndyjat'ahi jéhi nga saténtái.”

17 'As'ai jáa Jerusalen. Nk'ie nga tinchjaka Ntíaná natsihin ninku, kama chjina nku ni xi nkúhu nchini kik'aina.

18 Kkie Nda Ntíaná ko b'a kitsúna: “N'e xatíhi yjohi nga kitsa tjtui Jerusalen. At'aha najmi ts'ínsihin jóo én xi kuixínyaihi nga k'úinyaihi yáha an.”

19 B'a kixihin: “Ji Nda Ntia, be jóo nga xki ni'ya sinagoga ngjik'anijé ko kingjaha xuta xi s'ejihin ji.

20 Ko nk'ie nga t'n'ek'ien Esteban, xi kitsúyaha xuta yáha ji, ta síjña yo ko kisasinna ni xi kamo,

ko santaha kikunntá najyuhun já xi kits'ínk'iehen.”

²¹ Tunga b'ahá kitsúna Nda Ntíaná: “T'in. At'aha kjin ts'inkjíhi nga k'úinseihí xuta naxinantá xi tjín asuntee.”

B'i kama nk'ie nga mjehe xuta nga s'ehe Pablo

²² Tíbasínñjuhu xuta Pablo, tunga nk'ie nga b'a kitsú, b'i incha kitsú xuta:

—¡Tu sahá kat'en nda xi b'a tjíun! ¡Najmi machjéhen tsa k'úéjña tík'un!

²³ Tu nku xaáhan ní incha kits'in ko incha tsakúchji nga tu ni xí najmi incha kisasíhín ra ni xi kitsú Pablo.

²⁴ Kui nga b'a kitsúhu nda jun k'aku Romá nga n'ekjas'en Pablo má b'entu já juun. B'a kitsú nga s'ehe tu xi kuítsuyaha á b'a ts'in tíincha kjintáyanehe ra xuto.

²⁵ Tunga nk'iehé nga ja tjín'yúhun já juun nga ngjuáha, b'i kitsú Pablo nga kingjásjaiyaha nda jun xi síjña yo:

—¿A kama s'ehe nku nda Romá xi najmi kjee n'ekokjua?

²⁶ Nk'iehé nga kint'é nda juun niu, as'ai ngjisehe nda jun k'aku ko b'i kitsúhu:

—¿Aha yaní ni xi t'n'ei? Nda Romahá niu.

²⁷ As'ai nda jun k'aku j'aik'úhun Pablo ko b'i kitsúhu:

—T'inyaní, ¿a nda Romá ní?

—Johon —kitsú Pablo.

²⁸ As'ai b'i kitsú nda jun k'aku:

—Tse nkjún toon kis'enkina nga nku nda Romá kits'in ma yjoná.

—Tunga an b'a ts'in kitsinná —kitsú Pablo.

29 Kui nga tjen'yún incha ngji t'axíhín já xi tjíhin nga nguáha rá Pablo, kō santaha nda jun k'aku kitsankjún nk'ie nga kamankjihín nga nku nda Romá xi y'ét'a'yún nga jakj'ánijé.

B'i ts'in tsasinko yjoho Pablo nginkun já tjíxá judio

30 Nístjin xi ma ndyjuun mjehe nda jun k'aku Romá nga skuē sisin á tibatéjénehe rá já judio Pablo. Kui nga kikjexíhín rá n'úkicha xi tjít'a'yúnkoho rá kō b'a kitsú nga kama ñjakú já na'mi k'aku kō ngayjee já tjíxá judio. As'ai kik'onsje Pablo kō tsasínjña nginkun jóo.

23

1 As'ai kinchja Pablo nga tsase ts'íhín rá já tjíxá xi kama ñjakú yo. B'i kitsú:

—Jun já nts'e, santaha nd'ai je tjíya kjuankjintak'unna nginkun Ntjaná xi nkú nga ts'in tífiká yjona.

2 As'ai Ananía xi tjíhín nda na'mi títjun b'a kitsúhu já xi kabinchat'a tíñaha Pablo nga kujich'on'a.

3 B'i kitsú Pablo:

—Ntjaná k'on'ahi ji, nda johonkjin. Yo tinchin nga tíchaseihí tsa nda kō tsa najmi nda títs'ian nga tíchaseihí kjuatéxumoo, tunga tí'mi kontrahá rí ni xi tjít'a kjuatéxumoo nga tí'bahini kjuá nga kujich'on'ana.

4 As'ai b'i incha kitsú já xi kab'entu yo:

—¿Á ch'on tí'mihí rí nda na'mi títjun xi Ntjaná kitsjá xáha rá?

5 B'i kitsú Pablo:

—Jun já nts'e, najmi be tsa nda na'mi tíj_un ni_u. At'aha b'a ts'ín tjí't'a éhen Ntíaná: “Najmi tu ch'on ts'ín chubayanéi nda tjíxáhi.”

⁶ As'ai kikié Pablo nga tjin ajihin já tjíxóo k'ua já saduseo ko k'ua já fariseo. Kui nga 'yún kinchjaha nga b'i kitsú:

—Jun já nts'e, nda fariseoná ko ta já fariseo xi chána. Tín'ekokjuana at'aha tíkuyáha nga kj'uaíya ngáha ra xuta ngabayoo.

⁷ Nk'ie nga b'a kitsú Pablo, as'ai incha y'ésiko xinkjín já fariseo ko já saduseo. Tsakjanya yjoho já xi kama ñjakú yo.

⁸ At'aha já saduseo b'a incha tsu nga najmi ta kj'uaíyaha ra xuta ngabayoo, ko nga najmi tjin ntítsje ko tsa kj'ai sa xi ta tjintu. Tunga já fariseo s'ejihin ngayjee ni xu'bi.

⁹ B'i ngján xaáhan kama. As'ai tsisintjen k'ua já chjine éhen kjuatéxumoo xi mako já fariseo. B'i incha kitsú nga ndjá kinchja:

—Ndaha nku ni xi ch'on tjin najmi tísakújinni tsa kits'ín ndai. Kutsa nkuhú ntítsje ko tsa tjin xi kinchjakoho.

¹⁰ Nk'ie nga ja 'yún tjincha b'ésiko xinkjín jóo, kitsankjún nda jun k'aku Roma at'aha tsa ts'ín xihí jóo Pablo. Kui nga y'éxáha já juun nga incha ngjuaik'aszejihin Pablo ajihin jóo tu xi ngjuaikoho má incha b'entu jóo.

¹¹ Nistjen xi ma ndyjuun Nda Ntíaná tsakúchjiji yjoho Pablo ko b'i kitsúhu:

—Tjen nga'yihin yjohi. At'aha xi nkú ts'ín kuak'iejña chjiní ei Jerusalen, b'a ta ts'ín k'úéjña chjiní nanki Roma.

B'i ts'in kis'enda kō kiya nga n'ek'ien'má Pablo

12 Nistjin xi ma ndyjuun y'éndako k'ua xinkjín já judio nga najmi kjine kō ta ndaha najmi k'úi santa nkúhu nga ts'ínk'ien Pablo kō nga tsa najmi kuayáha Pablo ch'on incha katumat'ain ma.

13 Ma ra ts'ati yachán já xi b'a ts'in y'éndané Pablo.

14 As'ai ngjisehe já na'mi k'aku kō jáchá xi ta tjíhin xá. B'i incha kitsúhu:

—Ja y'endakoi xinki nga najmi chinei kō najmi s'i santaha nga kuayáni Pablo. Kō tsa najmi kuayáni ndo ch'on katumat'ain ma.

15 Kui nga nd'ai jun kō já tjíxá xingisoo b'a t'ihin ruu nda jun k'aku nga kats'in nibánuu Pablo ndyjunni, xi má nga ei chasē sisihuun kjuaha. Jin k'úendai yjoni nga n'ek'iein kintehe ni nga kj'uaí ei.

16 Tunga ntíhi ní na nichja Pablo kint'é ni xi y'enda'má jóo. Kui nga ngjihi má b'entu já juun kō ngji tsúyaha Pablo niu.

17 As'ai Pablo kinchjaha nku nda jun xi kunntá yo kō b'i kitsúhu:

—T'inkoi ndatij nginkun nda jun k'aku, at'aha tjín ni xi kuitsuyaha.

18 Kui nga nda juun ngjikoho ndatiu má tjíña nda jun k'aku kō b'a kitsúhu:

—Nda nubayá xi 'mi Pablo kuanchjana kō kuakankina nga kjúáika ndatij ei. Tjín rú ni xi kuitsuyahi.

19 As'ai nda jun k'aku jak'á ntsja ndatiu kō b'i kitsúhu nga ngjingjásjaiya t'axíhin:

—¿Mí ni xi tjíhin nga k'úinyaní?

20 B'i kitsú ndatiu:

—Ja kab'éndako xinkjín já judio nga kuankihi nga ndyjunni n'ekjí Pablo nginkun já tjíxoo. B'a kuitsuhi nga kuase sisihin kjuaha Pablo.

²¹ Tunga najmi tu n'e s'ejinní niu, at'aha ts'ati yachán já tíncha kuyá 'ma nga mjehe ts'íink'ien Pablo. Ntjaná kats'inkie nga najmi chumi nihi xi incha kjine ko k'úi santa nkúhu nga ts'íink'ien Pablo. Ja tjintu nda nd'ai nga tíncha kuyáha nga n'etjusuin ni xi incha k'uankihi.

²² As'ai kits'inkji ngáha nda jun k'aku ndatiu ko b'i kitsúhu:

—Najmi tu ch'a 'miyaihi ni xi kuak'inyaní.

B'i ts'in kin'ekjisehe Pablo nda títjun Feli

²³ As'ai kinchjaha nda jun k'aku jo já jun k'aku ko b'i kitsúhu nga y'éxá:

—T'endo jo unchan já jun xi tsuku incha ngjuaihi, cháte ko kan já jun xi ndje k'úéntusúhun, ko jo unchan xi k'ua lasa, tu xi incha ngjuaihi Cesarea chubá ñja nga jyuun.

²⁴ Ko tá t'endo ndje xi k'úésun Pablo. Tankínkoo tu xi nda ts'in kuichúhu nginkun nda títjun Feli.

²⁵ As'ai kits'innda nda jun k'aku nku xujun. B'i ts'in y'ét'a:

²⁶ “Claudio Lisia títs'inkjihi kjuasuniña nda títjun Feli.

²⁷ Nda xi títs'inkjíhi ei, kui xi jakj'ánijéhe já judio ko incha mjehe ts'íink'ien. Tunga nk'ie nga kint'e nga nda Roma niu, as'ai ngjika já junna ko kits'ink'ankia.

²⁸ As'ai kits'inkjiá ndo nginkun já tjíxá judio, at'aha mjena nga skue mí kjuaha tísatéjénehe.

29 Kikie nga ngat'aha ni xi tjit'a kjuat'exumaha jóo tísat'énehe. Ndahachí najmi ngabaya ko ta ndaha nubayá tjeheñ ra ndo.

30 Tunga kint'ená nga já judio y'éndako xinkjín xi má nga mjehe ts'ínk'ien ndo. Kui nga tít's'inkjínhina nginkuin. Ko ta ja kixinyaha já xi tibat'énehe nga tjíhin nga nginkuin kuitsuya mí nihi xi tjínkoho ndo.”

31 As'ai nga jyuun incha ngjiko já juun Pablo nanki Antipatri. Kits'in xi nkú ts'in incha kis'exá.

32 Nistjin xi ma ndyjuun já jun xi yjaha sjai incha kik'óya ngáha. Tu já jun xi yjakohó ndje kits'ínko njyá Pablo.

33 Nk'ie nga incha tsichu Cesarea, kitsjáha nda títjuun xujun ko ta kits'ínkjas'ehen Pablo.

34 As'ai kits'inya nda títjuun xujun ko kingjásjaiyaha Pablo má nibáha. Nk'ie nga kint'é nga nda Cilicia niu, b'i kitsú:

35 —Kuasínñjúhu nk'ie nga incha kj'uaí já xi tibat'énehi.

As'ai y'exá já xi kikuntáha Pablo ni'ya masehen Herode.

24

B'i ts'in tsasinntjai yjoho Pablo nginkun nda títjun Feli

1 Nk'ie nga j'a un nistjin, as'ai tsichu nanki Cesarea nda na'mi títjun Anania ko tjenko k'ua jácháha xuta judio ko nku nda chjine'én xi 'mi Tertulo. Incha tsichutéjéne Pablo nginkun nda títjuun.

² Nk'ie nga ngjichj'a Pablo, as'ai kik'atuts'ihin Tertulo nga tsatejénehe. B'i kitsú:

—Máb'achjihí ra ji, nda títjun, tjínni kjuajyu nd'ai. Nda n'e tibatexumakoi kjuankjintak'uhin ngandaha naxinantáni.

³ Kui nii xi tehente ko tu má antehé ni tsjo maní ko 'baihi máb'achjihí ji, nda títjun Feli.

⁴ Tunga najmi mjehéna tse ts'institi. Kui nga títbankihi ra nga tasinñjuhuni kutju.

⁵ 'Yai nga nku nda ch'onk'un nda xu'bi. Tíbinchá'a ngayjee xuta xi ntje judio tjehen ra xi tjín asuntee. Ndai xi nda k'aku hu já xi yankihi nku nda xi nibáha Nazaret.

⁶ Najmi benkjún ninkuni. Kui nga kichjubénijéheni ko mjeni nga n'ekokjuai kai xi nkú ts'in tjíña kjuatéxumani.

⁷ Tunga nda jun k'aku Lisiahá j'aikje'á kjuayúnni ndo.

⁸ B'a kitsúni nga jin xi títbatejénei ndai, nga ji xi tjíhin nga kjúaiseihi. Chasjaiyaihi tu xi cháhani mí kjuaha títbatejéneheni ndo.

⁹ Já judio xi kab'entu yo ta ngji kontraha Pablo. B'a incha kitsú nga kjuaxi niu.

¹⁰ As'ai nda títjuun tsakú Pablo tu xi kuinchjaha. B'i kitsú Pablo:

—Tsjo mana nga kúásinka yjona nginkuin, at'aha be nga ja nkjin nú tjíhin nga tibatexumaihi nankini.

¹¹ As'aihi tjíhin te jo nistjin nk'ie nga ngji ts'intsoho Ntiani Jerusalen. Kama chasjaya nga kjuaxi ni xi tixian.

12 Najmi ch'a y'esíka kō a rā tsincha'á xutā má ma natsihin ninku, kō tā ndaha ni'ya sinagoga, ta ndaha ajin nantio.

13 Najmi tjin xi nkú ts'in kuakúchjiji jái ni xi tít's'ínk'anjina.

14 'Tunga xínyahá ra kui ni. Benján Ntíaha ntje cháni nga tít's'ian ni xi tsakúya Jesu. Jóo bi b'a tjincha tsu nga najmi nda kui ni. S'ejinna ngayjee ni xi tjit'a kjuatéxumani kō xujuhun já profeta.

15 An tikuyáha ni xi kō tā jái tjincha kuyáha, nga Ntíaná ts'íinkj'áíya ngáha rā ngayjee xutā ngabayoo, xi nda kits'in kō xi najmi nda kits'in.

16 Kui xáha ts'in kjua'yún tehentehe rā yjona nga je s'eyaha kjuankjintak'unna nginkun Ntíaná kō nginkun xutā.

17 'Nkjin nú kamana nga najmi tsátejña Jerusalen. Nk'ie nga kik'óya ngáhana, jáitsja chje ninku. Kitsja toon kō chu ninku.

18 B'a kits'ian má ma natsihin ninku kō nk'ie nga ja tít's'in je yjona nginkun Ntíaná, kikiena k'ua já judio xi niba ante Asia. Najmi 'yún tjin xutā kui chubō kō najmi ch'a xáahan tjincha ts'in.

19 Kuihí já judio ts'e Asia xi tjihin nga kj'uaí ngikuin nga kuatéjehena tsa tjin ni xi tjinko ho an.

20 'Tsa najmi tjin jóo, kui jái katsúya mí ni ch'on tjihin xi kis'ejña chji nga kits'ian nk'ie nga ngjia nginkun já tjíxá judio.

21 Tu kuihí ni xi kits'ian. Nk'ie nga tíjñajihin, 'yún kinchja nga b'i kixian: "Tín'ekokjuanú nd'ai at'aha tikuyáha nga kj'uaíya ngáha rā xutā ngabayoo."

22 Nda títjun Feli be sisin nkú tjihin ra ni xi tsakúya Jesu, ko nk'ie nga kint'é ni xi títsu Pablo, y'éjñat'ía kjuo nga b'a kitsúhu jóo:

—Nk'ie nga kj'uaí nda jun k'aku Lisa, kuasjáiyaha kjuanu.

23 As'ai y'éxá nda jun k'akuhu já xi tikuntáha Pablo nga ngjuáya'yún tunga ta kitsjántehé ra nga kama kjúátsú'ba ndaí ko nga kama kj'uaíko ho xuta xinkjín ni xi machjéhen.

24 Nk'ie nga j'a chuba nistjin, j'aiko chjuúhun nda Feli. Nku na xi ntje judio tjeheh ra xi 'mi Drusila tíñako ndo. Y'éxá já xi incha ngjikj'á Pablo ko kingjásjaiyaha nkú tjihin ra ni xi tsakúya Jesu ko á s'ejihin ra jóo.

25 Y'éjña chji Pablo xi nkú ts'in kama naxu kuintsu bahana nginkun Ntiana, xi nkú ts'in k'úech'oho raá yjoná ni xi mjehe animaná, ko nga Ntiana kuasehe ni xi nda ko ni xi najmi nda tín'eé. Nk'ie nga kint'é nda títjun Feli ni xi kinchja Pablo, kitsankjún ko b'i kitsú:

—Katumaha ri, b'a tjiun. Nk'ie nga sakúntena kuinchja ngáhara.

26 Kinchja yaha nda títjun Feli Pablo, at'aha b'a kitsú tsa tu ahá ni Pablo tsjáha toon tu xi ts'in ndaíhi ra. Kui nga nkjin niyá kinchjaha ra ko kinchjanijmíko.

27 J'a jo nú, as'ai Porcio Festo y'ejña ngáha nda títjun antehé nda Feli. Nk'ie nga jet'ain xaha nda Feli, tu nku kingjáya'yúhún Pablo, at'aha mjehe nga nda skuéhe xuta judio.

25

B'i ts'in tsasinntjai yjoho Pablo nginkun nda títjun Festo

¹ Nk'ie nga j'a jan nistjin nga kits'ínkjáihin xáha Festo, as'ai tsitju nanki Cesarea nga ngji Jerusalen.

² Yo incha kinchjakoho já na'mi k'aku ko já tixáha xuta judio nga incha ngji kontraha Pablo.

³ Incha tsankihi nda títjun Festo nku kjuanda, nga ts'ín nibá Pablo nanki Jerusalen. At'aha incha mjehe ts'ínndjuú ni xi y'enda, nga ts'ínk'ien Pablo aya niyóo.

⁴ Tunga b'ahá kitsú Festo nga tu nku nanki Cesarehá s'eya'yún Pablo ko nga yo ja tifi.

⁵ B'i kitsú ya:

—Kats'ínkona niyá jánuu xi tjihin xá. Tsa tjin ni ch'onk'uhun xi kits'in ndo, incha katatéjene.

⁶ Ts'andayaha Festo yo nkú ra ma jin ko tsa te nistjin. As'ai ngji nanki Cesarea. Nistjin xi ma ndyjuun y'ejña ante má nga ts'in kjuá ko y'exá já xi incha ngjikj'á Pablo.

⁷ Nk'ie nga jas'en Pablo, j'aik'úhun já judio xi nibaha Jerusalen ko tsatéjenehe. Nkjin tijká ni ch'onk'un xi incha kikjanínehe Pablo, ni xi najmi incha kamaha y'éntuchji.

⁸ As'ai b'i kitsú Pablo nga tsasinntjai yjoho:

—Najmi chumi jéhe xi tjenna. Najmi ngji kontraha kjuatéxumaha xuta judio, ta ndaha ninku, ko ta ndaha nda títjun k'aku Cesar.

⁹ Tunga mjehé ra Festo nga nda skuéhe já judio, kui nga b'i kitsúhu ra Pablo:

—¿A mjehi k'úin Jerusalen tu xi ján ts'ihinna kjuahi?

10 As'ai b'i kitsú Pablo:

—Sijña nginkun nda xi kitsjá xáha nda títjun k'aku Cesar ko má nga tjihin nga n'ekokjuana. Ya sisin nga najmi chumi nihi xi kits'ihin xuta judio.

11 Tsa ch'on kits'ian ko tsa tjeheñ ra ngabaya ni xi kits'ian, ta tsjanté nga kuayá. Tunga najmi kjuaxihí ngayjee ni xi tichjaninéna. Kui nga najmi ma ts'inkjas'eheñ ra yjona jóo. Tíbankia nga nginkun nda títjun k'aku Cesar n'ekokjuana.

12 As'ai Festo ko já xi basinkoho incha kinchjanimíyaha niu ko b'i kitsú nga kinchjako Pablo:

—Ji tíbinchi nga nginkun nda títjun k'aku Cesar n'ekokjuahi. Nda títjun Cesar k'úinseihí ma.

B'i ts'in incha kinchjanimíyaha kjuaha Pablo nda rei Agripa ko nda títjun Festo

13 Nk'ie nga j'a chuba nistjin, tsichu Cesarea nda rei Agripa ko na Berenice nga incha ngjikjaniñaha nda títjun Festo.

14 Nkjin nistjin incha ts'andayaha yo ko Festo kitsúyaha nda rei kjuaha Pablo. B'i kitsúhu:

—Ei tíña nku nda xi tu nku kik'áya'yúhún nda Feli nubayóo nk'ie nga jet'ain xáha.

15 Nk'ie nga ngjia Jerusalen, já na'mi k'aku ko jácháha xuta judio incha tsatéjénehe ndo ko tsankina nga tsja kjuá nga n'ek'ien.

16 Kixinyaha jóo nga najmi b'a ts'in nkaha já tjíxá Roma, tsa chuba tsjáhá kjuá nga n'ek'ien xuta. At'aha tsa tjín xi tsatéjéne, tjihin nga ta kuasinjña xi tibatéjénehe tu xi kama kuasinkoho yjoho ngat'aha ni xi tichjaninéhe.

17 'Kui b'a maha, nk'ie nga j'aihi jóo ei, najmi kits'ink'andaya. Tjen'yún tsátejñaná nistjin xi ma ndyjuun ante má nga ts'ian kjuá ko y'exá já xi ngjikj'á ndo.

18 Tunga nk'ie nga kinchja já xi tíncha batéjénehe, ndaha nku ni ch'on tjín xi kits'innkjihín k'an ngjinéhe.

19 Tu ni xi ts'e ninkuhu ní ko nku nda xi 'mi Jesu incha y'ésiyáha. Ja k'ien ndo, tunga b'ahá títsu Pablo nk'ie nga tijná ndo.

20 'An najmi be xi nkú ts'in k'uendáhana nku kjuá xi b'a tjín. Kui nga kingjasjáyahá rá Pablo tsa mjehe ngjuaihi Jerusalem tu xi yo n'ekokjuaha.

21 Tunga tsankihí Pablo nga tu sahá s'eya'yún ko nga nginkun nda títjun xi tijná Romá n'ekokjuá. Kui nga b'a kixihinna nga s'eya'yúhun santa nkúhu nga kamana ts'inkjisehe nda títjun k'aku Cesar.

22 As'ai b'i kitsú nda rei Agripa:

—Ko an mjena kuasinñjúhu ndo.

—Ndyjunní kuasinñjúhi —kitsú Festo.

23 Kui nga nistjin xi ma ndyjuun tsichuhu Agripa ko na Berenice. Tsjo nkjún kama nga incha jas'en má ma kjuá. Incha tjenko já jun k'aku ko já k'akuhu naxinantóo. As'ai y'exá Festo nga ngjuaihj'a Pablo ko

24 b'i kitsúhu jóo:

—Ji nda rei Agripa ko ngayjee xuta xi kama ñjakújinná, á ndo ei. Ngayjee xuta judio xi tjín Jerusalem ko xi tjín ei tíncha batéjénehe. Tíncha kjintáya nga títbankina nga tsja kjuá nga n'ek'ien ndo.

²⁵ An najmi tísakújinna ni xi kits'in ndo xi tje_hen ra ngabaya. Tunga kuihí tsanki nga nda títjun xi tíjña Roma ts'ínkòkjuaha. Kui nga b'a kixihinna nga ja ts'inkjihina yo.

²⁶ Tunga najmi bená mí nihi xi k'uet'á xujun xi ts'inkjihí nda títjun k'aku xi kitsjá xána. Kui kjuaha nga eí kuats'in nibáhana ndo nginkun kò ngikuin ji, nda rej Agripa, tu xi chasjaiyaha raá kò b'a ts'in sakúhuna én xi ts'inkjihí nda tíjuun.

²⁷ At'aha b'a mana nga najmi chumi ni chjihí ra tsa chuba ts'inkjiná nku nda nubayá nga najmi xinya mí kjuaha tísatéjénehe.

26

B'i ts'in tsasinko yoho Pablo nginkun nda rei Agripa

¹ As'ai nda rej Agripa b'i kitsúhu Pablo:

—Kama chubai nga kuisinkoi yohi.

As'ai kingjénnk'a ntsja Pablo kò kinchja nga tsasinko yoho:

² —Tsjo nkjún mana, nda rej Agripa, nga kama kúásinka yona nginkuin nd'ai ngat'aha ngayjee ni xi tibatéjéneha já judio.

³ At'aha ji ya sisin xi nkú ts'in tíjña sin cháha xuta xi ntje judio tje_hen ra kò ni xi b'ésiyáha. Kui b'a maha, títbankihi ra nga n'etsentai nga kuásinñjuní.

⁴ 'Be ngayjee xuta xi ntje judio tje_hen ra xi nkú ts'in tsátejñajihín nkúhu nga ndyjana. At'aha tsátejñajihín xutana kò Jerusalen tsátejña.

⁵ Kò ta be ya jóo kò kama kuitsuya tsa mjehe, nga tehente kits'intjusan xi nkú ts'in tíjña niyáha já fariseo, já xi 'yún je fikò ni xi s'ejinni.

6 'Nd'ai síjñã ei nga tìn'ekokjuana at'aha tíkuyáha nga Ntíaná ts'íintjusun ni xi kitsúya títjuhun ntje cháni.

7 Ta kui nihi xi tìncha kuyáha nga ts'íinkjáhìn xutani xi te jo maha ntje chá xi y'aha ra. Kui kjuaha nga tìncha ts'intsjohõ ra Ntíaná nistjin nistjen. Nda rei Agripa, tibatéjéna já judio ngat'aha ni xi an tíkuyáha.

8 ¿Á najmi s'ejihinnuu nga Ntíaná ts'íinkj'áíya ngáha ra xuta ngabayoo?

9 'Nistjin nk'ie b'a kixian nga tjíhin nga kfín kontraha xuta xi s'ejihin Jesu, nda xi nabáha Nazaret.

10 B'a kits'ian Jerusalem. Já na'mi k'aku kitsjana kjuá xi má nga ts'inkjas'en nubayá xuta xi yjankihí Jesu. Kõ nk'ie nga n'ek'ien, an ta kits'inj'a nga b'a n'ehe.

11 Nkjin niyá kõ xki ni'ya sinagoga kits'in'úhun tu xi najmi ta skuenkjúhun Jesu. Tu xí 'yúhún kits'in unkie xuta xu'bõ kõ kitsjennkí unkie santaha tu má nankihí ni.

B'i ts'in kitsúya Pablo xi nkú ts'in jak'áha Jesu-cristo

12 'Kui nií kits'ian. As'ai y'éxána kõ kitsjana kjuá já na'mi k'aku nga kfían Damasco.

13 Tunga nk'ie nga tít'sian niyá, ji nda rej, nk'ie nga masen nistjiun kieke nku nd'í chánka xi nibaha nk'a ján. 'Yún tsat'ai sa nga nd'íhi ts'íu. Kits'in ndzjenna kõ ta kits'in ndzjehen já xi tjenkõna.

14 As'ai tsixuntuj t'anankiu kõ kint'e nku ntã xi én hebreo kinchjakõna. B'a kitsúna: "Saulõ, Saulõ, ¿á unchahaní? ¿Á ta ji tìn'e'uhun ri yjohi?"

15 'As'ai b'a kixian: “¿Yáha ji, Nda Ntia?” B'a kitsúna Nda Ntíaná: “An Jesu xi unchai.

16 Tunga tísintjenni kō t'in. Kuakakuchjīhi ra yjona tū xi n'exát'ahaní kō tū xi kuixínyahani ni xi kuayai kō ni xi chá sai askahan.

17 Ts'inkjisehe xuta judio kō xi najmi judio. Namji tsjanté tsa incha ts'ín'uhin.

18 Chjúx'ánki tunkun xuta tū xi kuitjuhu má jyuun nga kjuas'ehen má ndzjeen, tū xi kuitjujihin ajin nga'yúhūn ndanindoo nga ts'ínkjáihin Ntíaná. Ntíaná ts'ínndyjat'aha ngatitsuhun kō tsjáha ante ajihin xuta xi bichú ma je nginkun tū ngat'aha nga s'ejihin an.”

19 'Kui b'a maha, nda rej Agripa, kint'e'éhen ra xi tsakúchjina yjoho, xi nibaha nk'a ján.

20 Títjun y'enijmíhi éhen Ntíaná xuta xi tjín nanki Damasco, kō askahan xi tjín nanki Jerusalem kō ngayjee nanki xi tjín ante Judea, kō santaha xuta naxinantá xi tjín asuntee. B'a kixihin nga ngjuaikj'áha ra animaha kō ts'ínkjáihin Ntíaná, kō nga ts'ín ni xi kuakúchji nga ja kits'ínk'óntjaiya animaha.

21 Kui kjuaha nga jakj'ánijéhena já judio natsihin ninku kō kama mjehe nga ts'ínk'ienna.

22 'Tunga Ntíanáhá tibasinkona santaha nd'ai. Kui nga síjñahana ei nga tínchjaka xuta x'an kō xi nchiná. Tíxinya ni xi ta kitsúya já profeta kō Moise, ni xi tjihin nga kuitjusun.

23 At'aha kui xi b'a kitsú nga tjihin nga un skuehe xi kits'in nibá Ntíaná kō nga kui xi tjun kj'uaíya ngáha ra ngabayoo, tū xi b'a ts'in ts'ín ndzjehen ra xutani kō xuta naxinantá xi tjín asuntej xi nkú

ts'in k'uankihi.

²⁴ Nk'ie nga b'a kitsú Pablo nga tibasinko yjoho, as'ai b'i kitsú nda títjun Festo nga kikjintáya:

—Ja tíma lukui, nda Pablo! At'aha 'yún mahi xujun, kui nga ja tíma lukuhuni.

²⁵ As'ai b'i kitsú Pablo:

—Najmi luka, nda títjun Festo. Kjuaxi ko b'a tjin ni xi tinchja.

²⁶ Nda rej Agripa be ni xu'bi. Kui nga tinchja kixi kixihina nginkun. At'aha behe k'an nga beyje nda rej ngatentee ni xu'bi. Najmi nku ante xi tijná 'ma má nga b'a kamo.

²⁷ Ji nda rej Agripa, ¿a s'ejihin ni xi kitsú já profeta? Be nk'ie nga s'ejihin.

²⁸ B'i kitsú nda rej Agripa:

—Chuba mahá ndyjaha nk'ie nga n'e maní nku nda xi s'ejihin Jesucristo.

²⁹ As'ai b'i kitsú Pablo:

—Ndaha tsa chuba ndyjaha ko tsa tse ndyjaha, tunga tbankihí ra Ntjaná nga najmi tu nku ji, ko ní ngatentee xi tibasínjuna nd'ai kuichú ma xi nkúhu an, tunga najmi kohó n'úkicha xu'bi s'et'aha.

³⁰ As'ai tsisintjen nda rej, nda títjuun, na Berenice ko ngayjee xi incha kab'entukoho yo.

³¹ Incha ngji nchjaníjmíya t'axín kjuo. B'i incha kitsúhu xinkjín:

—Najmi ngabaya ko ta ndaha nubayá tjeheñ ra ni xi kits'in ndo.

³² As'ai nda rej Agripa b'i kitsúhu nda títjun Festo:

—Tsa najmi tsanki ndo nga nginkun nda títjun k'aku Cesar n'ekokjua, kama n'e ndaíhi kai.

27

B'i ts'in kin'ekji Pablo nanki Roma

¹ Nk'ie nga j'ai kjuá nga tjihin nga n'ekjini ante Italia, as'ai kin'ekjas'en Pablo ko kj'ai sa já nubayá aya ntsja nku nda jun k'aku xi 'mi Julio. Kui xi tijnajihin já jun xi 'mi Já juhun Nda títjuun.

² Tsitjas'ein nku tsutsu xi nibaha nanki Adramitio xi ja ma kuitjuhú nga ngjuai nanki xi tjin ante Asia. As'ai kin'eij niyá ntá. Ta ngjikoni Aristarco, kui xi nibáha Tesalonika, nanki xi tijnajihin ante Macedonia.

³ Nistjin xi ma ndyjuun tsichii nanki Sidon, ko nda jun Julio kits'ihin nku kjuanda Pablo. Kit-sjantehe nga ngjitsubek'un já xi nda nchjakoho ko nga kui jóo tsjáha ni xi machjehen.

⁴ As'ai tsitjukoji tsutsu yo ko tsitjandái xjo Chipre, at'aha tjen kontrani ntjo.

⁵ Tsitjatíkjai ntáchak'uun andaihi Cilicia ko Panfilia ko tsichii nanki Mira, nanki xi tijnajihin Licia.

⁶ Yo kisakúhu nda jun k'aku nku tsutsu xi nibaha nanki Alejandria ko ante Italia tífi. Yo kits'ínkjas'enni.

⁷ Nkjin nistjin kin'e nda ndai niyá ntá ko tu 'yaha tsichu tiñai ankin nanki Gnido. Tjen kontra sani ntjo, kui nga tsitjahani ankin nanki Salmon ko y'etjindaihi xjo Creta.

⁸ Tu nku b'ahá ts'in 'ni kin'eij niyá ntá andaihi xjo Creta. Askahan tsichii nku ante xi 'mi Ante Tsjo K'un xi tijná mahá nanki Lasea.

⁹ Nkjin nkjún nistjin ts'ayani ngat'aha ntjo ko ja tábichú tiña nistjin nga ch'on ma nga tsutsu

bankínkáá, at'aha ja tíbichú tiña nistjin chunch'ón. Kui nga b'a kitsúhu Pablo:

¹⁰ —Jun já, ndzjen tímana. Tsa kuankínndjaá, ch'on kamat'aán. N'endya tsutsu ko ch'aha, ko santaha kjuichúkjuá nga kuayáá ko ñá.

¹¹ Tunga najmi kits'insihín rá nda jun k'aku ni xi kitsú Pablo. Tu ni xi kitsúhu nda xi ts'ínko tsutsu ko nda xi ts'e yóo tsasínñuju.

¹² Ante xu'bo ya najmi nda ma tsa yo n'ek'ja nistjin chunch'ón. Kui nga nkjin incha kamaha xi b'a incha kitsú nga tu sahá nda tjín nga incha kuitju yo, tsa tu ahá ni b'a ts'ín incha kuichú Fenice, nanki xi tíñajihín xjo Creta. Yo má bichú tsutsu ko nda ts'ín s'entu. B'a ts'ín yo kama incha ts'íinkj'aha nistjin chunch'ón.

B'i ts'ín kamané ntjo tsutsu xi tjíya Pablo

¹³ As'ai kitsjen nku ntjo xi najmi 'yún, xi nibaha ajin ntáchak'uun. B'a kamaha jóo tsa nda ts'ín ngjuai tímaha. Kui nga tsitjukoho tsutsu ko incha ngjiko tiña andai xjo Creta.

¹⁴ Tunga najmi ts'andayahá rá nga kama nku ntjo xi tu xí 'yúhún, xi nibaha asun t'anankiu. Be jóo nkú 'mi ntjo.

¹⁵ Kui xi kikjebéfe tsutsu. Najmi ta kama tsankinkohoni má nga mjeni. Kui nga kik'aintehení nga ngjuaikohoni ntjo.

¹⁶ As'ai tsitjandái nku xjo ichí xi 'mi Cauda. Kui xi y'échjaha ichí ntjo, ko tu 'yaha kamani kichju'yúin tsutsu ichí xi y'a tsutsu.

¹⁷ Nk'ie nga kin'ekjas'ein tsutsu ichíu, as'ai n'ú'ya y'é'yúnkjáha jóo tsutsu chánka xi tjenkoj tu xi najmi kuakjahan. Incha kitsankjún tsa tsumí xi tjín ante

xi 'mi Sirte kjuas'enjin. Kui nga incha kikjejehen najyuhun tsutsuu, kui xi basinya'yún ntjo. As'ai kitsjánte nga ngjuaikoho ntjo.

¹⁸ Nistjin xi ma ndyjuun 'yún kitsjen sa ntjo. Kui nga incha kikjaníkj'ajin ntáchak'uun ch'áha tsutsuu.

¹⁹ Nistjin xi ma jahan incha kik'aníkj'ajin santaha ko ni xi ts'ínchjén nga fiko tsutsuu.

²⁰ J'a nkjin nistjin nga najmi kama sje ko ta ndaha najmi kama chji niñuu ko ntjo xi 'yún tjennení. B'a tsixín nga najmi ta kuintsubahani.

²¹ Nkjin nistjin j'a nga najmi chumi nihi kichineí. As'ai Pablo tsasinjña ndju ko b'i kitsú:

—Jun já, najmi nda kin'o nga najmi tsasinñjunú, nk'ie nga tsitjukoo tsutsuu xjo Creta. Un tibenuu nd'ai ko tín'e ndyjo ni xi kich'o.

²² Tunga nd'ai b'a tíxinnuu nga tjen nga'yúhuun yjonuu, at'aha najmi ch'a kuayá. Tu tsutsuuhú xi ndyja.

²³ At'aha nkui jyún kabakúchjina yjoho nku ntítsjehe Ntía xi ts'ena ko xi ts'inxát'aha.

²⁴ B'a katsúna: “Najmi tu binkjuin, Pablo. Tjihin nga k'úin nginkun nda títtjun k'aku Cesar. Ntíaná títsjáhi kjuanda xu'bi nga najmi kuayá ngayjee já xi tíntuyákohi tsutsuu.”

²⁵ Kui b'a maha, jun já, tjen nga'yúhuun yjonuu. At'aha s'ejinna Ntíaná nga b'a kama xi nkú nga ka'mina.

²⁶ Tunga tjihín ni nga nku xjo kuichúkóná ntjo.

²⁷ Nk'ie nga tsichu nistjen nga ja tínni jo tuntjáí, ko nga ja tífikoni ntjo ajin ntáchak'un Adria, nkú ra ma masen nistjen kieke já xi tíincha ts'ínko tsutsuu nga ja tábichú tiñai ante kixiu.

28 Kui nga kik'achubaha nga nankaha ntóo. Kan tj'ion nku metru kama. As'ai ngjindju sa ko ta kik'achubahá ngáha. Kui xi kama kan ún jo metru.

29 Incha kitsankjún tsa naxiu satékjokoho, kui nga incha kikjaník'aha ñju ni xi fáya'yún tsutsuu. Incha mangimjehe nga kitsa kama sen.

30 As'ai mjehe kuanka já xi tíncha ts'ínko tsutsuu. Kui nga incha kikjaník'ajihin ntóo tsutsu ichí xi kjit'aha tsutsu chánko. B'a incha kitsú nga incha kjaník'a sa ankjín tsutsuu ni xi kjuáya'yúhun tsutsuu.

31 Tunga b'ahá kitsú Pablo nga kinchjako nda jun k'aku ko já juun:

—Tsa najmi k'úentu já xu'bi aya tsutsuu, jun najmi k'uankiu.

32 As'ai incha tsatekjá já juun n'ú'ya xi tjít'a tsutsu ichíu. Incha kikjanítja'ba niu.

33 Nk'ie nga ja tñibá ma sen, Pablo b'a kitsúhu ngayjee jóo nga tjíhin nga incha kjine nichine. B'i kitsúhu:

—Ja tñinnu jo tuntjái nd'ai nga 'yún tñ'enkjíhun tak'un ko nga tintsuba kjintío. Najmi tichino niñu.

34 Tíbankihinu nga chinehenu ichí nd'ai. Kuasinkonuu tu xi k'uankihinu. At'aha ndaha nku ntsjaku najmi ndyja.

35 Nk'ie nga b'a kitsú Pablo, as'ai jakj'a nku ninkuan ko kitsjáha máb'achjíhi Ntíaná nginkun ngayjee jóo. Tsakjanya ko kikjine.

36 As'ai kama 'yún tak'un ngayjee já xingisoo ko ta incha kikjine ninkuon.

37 Jo unchan ko cháte ko kan ún nku mahani ngayjei xi tintsubayai tsutsuu.

38 Nk'ie nga ja incha kikjine niñu, as'ai tu xi kama kijnaha tsutsuu incha kikjaník'ajin ntáchak'uun tuniñu xi y'a yóo.

B'i ts'in tsakjan tsutsu xi tjya Pablo

39 Nk'ie nga kama seen, najmi kamankjihin jóo má incha tsichu. Tunga kkiehé nku ante kixi má nga tjín tsumí ko incha kama mjehe nga ngjuaiko tsutsuu yo, tsa tu ahá ni kuichúko.

40 Kui nga incha tsate'yuhun n'ú'ya xi y'aha ra ni xi fáya'yuhun tsutsuu. Incha kikjanítjab'a niu ko kits'in ndáihí ni xi bakú niyáha tsutsuu. As'ai kingjénnk'a najyuhun tsutsuu xi basinya'yún ntjo tu xi ngjuaikoho ra ntjo ante kixiu.

41 Tunga nkuhú ante má nga tjín tsumí tsichu yóo. Yo kisasínkjá'yún ankjín tsutsuu. Ndahachí najmi tá kama kits'inniyáha niu. As'ai t'éhen ntóo kikjexuba astun tsutsuu.

42 B'a incha kitsúhu xinkjín já juun nga incha ts'íink'ien já nubayóo tu xi najmi incha kuankajin ntáha.

43 Tunga mjehé ra nda jun k'aku nga ts'íink'anki Pablo, kui nga najmi kitsjantehe nga b'a incha ts'íihin jóo. Tu sa ní b'a kitsú nga tjun kjaník'ajin ntá yjoho xi maha ntá tu xi kuichúhu ante kixiu,

44 ko nga já xingisoo ngjuaiko yáte ko tsa t'íaha tsutsuu. B'a ts'in incha tsichuhuni ante kixiu ko incha ts'ankiyjei.

28

B'i ts'in kits'in kjuankjún Pablo xjo Malta

1 Nk'ie nga tsitjujin ntái, kik'inyaní nga Malta 'mi yo.

² Xuta xi tjin xjo xu'bi nda animaha ko nda kits'inkjainni. Incha kits'in'yun nku nd'i chanka, at'aha nch'an ko ts'i tib'a kui nistjin.

³ J'aya Pablo chuba chikin ko y'entujin nd'iu. As'ai tu tsitjuhú nku ye xi tibankaha nt'aihi nd'iu ko kikjinehe ntsja Pablo.

⁴ Nk'ie nga kieke xuta xi tjin yo nga tjenb'ankit'a ye ntsja Pablo, b'i ngjan kinchjako xinkjin. B'i incha kitsú:

—Kjuaxi nk'ie nga anima ts'ink'ien ndai. Ndaha tsa kuitjuij ntachak'uun tunga Ntjaná najmi mjehe tsa k'úejña tik'un sa.

⁵ Tunga y'étsujnehé Pablo ye ajin nd'iu. Ndahachi najmi chumi nihi xi kamaha.

⁶ Incha kikuyá xuto nga kujin Pablo ko a ra tjen'yun kuayáha. Tunga b'ahá ts'in j'aha chuba nga tincha kuya. Nk'ie nga incha kieke nga najmi chumi nihi xi kamaha, kits'ink'ontjaiya kjuankjintak'uhun. B'a incha kitsú nga nku ntia Pablo.

⁷ Tiña ante xu'bo tihin ni'ya nku nda xi 'mi Publio, xi nda titjuhun xjo Malta. Kui xi kits'inkjainni. Nda ts'in kits'insinni jan nistjin tihin.

⁸ Tunga kjijña uhun na'mihi Publio. Ch'in tinchaha ko tifa. As'ai jas'en Pablo má kjijña. Askahan nk'ie nga kinchjako Ntjaná, kingjenne ntsja ko kits'innkihi.

⁹ Nk'ie nga b'a kamo, ta incha j'ai ya k'ai xuta un xi tjin yo. Ta incha kama nkihi.

¹⁰ Nkjin ni xi kitsjani xuto, ko nk'ie nga kichjubé ngahani k'ai tsutsu ta kitsjani ni xi machjen nga neé niyá.

B'i ts'in tsichu Pablo nanki Roma

¹¹ Nk'ie nga j'a jan sá, as'ai tsankinko*j* nku tsutsu xi yo kits'inkj'a nistjin chunch'oon. Alejandria nibaha yoo ko tjit'a chjih*i* sénnistjihin ntia Castor ko Polux.

¹² Tsichii Siracusa ko jan nistjin ts'andayani yo.

¹³ Nk'ie nga tsitju*i* yo, tsankint'a tiñai nanki xi tjin yo ko tsichii nanki Regio. Nistjin xi ma ndyjuun kamané*i* nku ntjo, ko nistjin xi ma joho tsichukoni tsutsuu nanki Puteoli.

¹⁴ Yo kisakúni k'ua já nts'eé xi b'a kitsúni nga kuintsubakoi nku tuntjái tji*h*in. Nk'ie nga ja kamo*o* kin'e*i* niyá nga tsankiin nanki Roma.

¹⁵ Já nts'eé xi tjintu nanki Roma, nk'ie nga kint'é nga tsichii yo, as'ai incha j'aikj'a niyáni má nga 'mi Natsin Apio ko má nga 'mi Jan Ni'ya, yo má n'ekj'a nistjen. Nk'ie nga kkie Pablo jóo, kitsjáha máb'achji*h*i Ntiana ko tsjo kik'iehe animaha.

¹⁶ Nk'ie nga tsitjas'ein nanki Roma, kik'aintehe Pablo nga t'axin k'úejña ko nku nda jun kikunntaha.

B'i ts'in y'énijmhi Pablo xuta judio xi tjin Roma

¹⁷ Nk'ie nga j'a jan nistjin, as'ai Pablo kinchja ñjakúhu já k'aku*h*u xuta xi ntje judio tje*h*en ra xi tjin yo. Nk'ie nga kama ñja jóo, as'ai b'a kitsúhu:

—Jun já nts'e, najmi chumi nihi xi kits'ihin xutaná ko ta ndaha najmi ngji kontra*h*a sin chá xi kits'inkjas'enná ntje cháná. Tunga xuta xi tjintuhú Jerusalem kits'inkjas'ennijéna aya ntsja já Roma.

¹⁸ Kingjásjaiyana ko kama mjehe nga ts'ín ndaína, at'aha najmi chumi nihi xi kits'ian xi tje*h*en ra ngabaya.

19 Tunga najmi kits'in yuhú já judio xi tibatéjéneha. Kui nga tsankihina nga nginkun ndatítjun k'aku Cesar n'ekokjuahana, ndaha tsa najmi tjín ni xi kuatejénehena xutaaná.

20 Kui kjuaha nga kinchjahanuu. Mjena skuenuu ko xinyanuu nga tjínkjá'yúnna n'úkicha i tu ngat'aha nga tikuyáha ni xi tichuyáá ngayjeé ñá xi xuta Israel.

21 As'ai b'i incha kitsú jóo:

—Ndaha nku xujun xi nibaha ante Judea xi tinchjanimiyaha ri najmi j'aini, ko ta ndaha já nts'eé xi incha nibáha ján najmi chumi ni ch'onk'uhun xi kinchja ngat'a ts'i.

22 Tunga mjehéni kuasinñjuí xi nkú ts'in n'enkjink'uin, at'aha yai nga tu má antehé ni najmi nda tichubanimiyaha xuta xi yjankihí én xi tít'enijmí.

23 Kui nga incha y'éhe ra nku nistjin nga Pablo kuakúya ko nkjin nkjún xuta incha j'ai kui nistjiun ni'yaha. Nku nistjin kik'aha Pablo nga y'éjña chji ko kitsúya nkú ts'in batéxuma Ntjaná. Kits'inchjén xujun kjuatéxumaha Moise ko xujuhun já profeta nga y'éjña chjihí xuta yáha Jesu.

24 As'ai tjín xi kits'ínkjáíhín ni xi kitsú Pablo ko tjín xi najmi kis'ejihín.

25 Najmi tsichu ma nkuko xinkjín. Nk'ie nga incha kik'atuts'ihín nga incha ngji ni'yaha, b'i kitsú Pablo:

—Kjuaxi ni xi kitsúhu Espiritu Santo ntje chánuu nga kits'ínkinchja nda profeta Isaia. B'i kitsú:

26 T'ihinseihí naxinantá xu'bo ko b'a t'ihín:
'Yún kuasinñju tunga najmi kamankjihínnuu,
ko 'yún chaso tunga najmi chanú.

27 At'aha ja kama ndjá animaha xuta xu'bi,
 kits'in staya yjoho ko kik'íechja tunkun,
 tu xi najmi skuehe ko najmi kuint'éhe,
 ko najmi kamankjihin ra,
 tsa ts'íink'óntjaiya animaha ko nga an ts'innkíhi.

28 'Kui nga tjihin nga chahanu nd'ai nga Ntíaná
 ts'íinkjihí ra naxinantá xi tjin asunnteí én xi
 ts'íink'ankihí. Kuihí xuto xi kuasínñjuhu éen.

29 Nk'ie nga b'a kitsú Pablo, 'yún incha
 kinchjatiko xinkjín já judio. As'ai incha ngji.

30 Jo nú kamaha Pablo nga y'ejñaya ni'ya xi
 y'échjí sá. Kits'ínkjáihín ngayjee xi tsichusehe.

31 Y'énijmí xi nkú ts'in batéxuma Ntíaná ko
 tsakúya nga Jesucristo xi Nda Ntíaná. Kinchja chji
 chji ko najmi ch'a xi y'échjaha nga b'a kits'in.

Éhen Ntíaná
New Testament in Mazatec, Jalapa de Díaz
(MX:maj:Mazatec, Jalapa de Díaz)

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Jalapa de Díaz

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
e05183c2-7c34-5cdd-8c78-15ea51bd8cbb